

**NATIONAL ASSEMBLY OF
SEYCHELLES**

Tuesday 19th July, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab. Bonzour nou *staff* ki pe asiste nou e bonzour tou piblik ki pe swiv nou. Byenveni zot tou pou nou travay lasemenn. Nou a komans par fer en *reading Public Bill First Reading* Madanm Clerk.

Si ou napa ou dokiman ou kapab pran *First Reading* en pe pli tar dan lazournen. Byen, nou a pran *First Reading* en pe pli tar dan lazournen. Onorab Georges ou mikro in bon?

HON BERNARD GEORGES

Bonzour Mr Speaker. Mersi.

MR SPEAKER

Sanble byen. Mersi. Nou pe al pran kestyon, nou pe sanz lord en pti pe labitid, pou permet *Leader* Lopozisyon tenir en randevou avek Prezidan Kenyatta, nou'n les li sa moman

e nou pran, nou pou pran *Private Notice Question* a lafen *Question Time*.

Alors, nou a komans avek *Kestyon for Oral Answers* pou lot Minis, e mon a demann madanm raporter pou apel Minis Zialor silvouple. Byen nou a fer *First Reading Public Bill*. Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Nou *Bill* ki pe ganny prezante i;
The Judiciary (Amendment) Bill, 2022. This Act may be cited as The Judiciary (Amendment) Act, 2022. Mersi Mr Speaker.

MR SPEAKER

Mersi. Bonzour Minis Zialor. Minis pou Lafanmir, Lazenes ek *Sport*. Byenveni pou nou *Question Time* e byenveni osi son delegasyon Mr Clive Roucou, *PS* pou Lafanmir, Departman Lafanmir e Mrs Yasmin Umarji, *CEO* pou *National Council for Children*, ki la avek nou pou premye seri kestyon. Bon nou a komans avek kestyon 101. Mon annan 8 kestyon pou Minis, alors nou ava pran apepre 15minit par kestyon. Onorab Richard Labrosse ou kestyon.

HON RICHARD LABROSSE

Mersi Mr Speaker. Bonzour Mr Speaker. Bonzour tou dimoun ki a lekout, bann koleg aprezan. Bonzour spesyal pou Minis Zialor ek Mr Roucou 2 zanfan Plaisance.

Mr Speaker kestyon limero 101 i al koumsa;

Swivan demann pour *accommodate* bann dimoun aze ki napa en sipor familyal ouswa en lakaz, eski Minis pou Lafanmir i kapab eksplik Lasanble, si i annan okenn nouvo Polisi ouswa kriter ki'n met an plas ou pe al ganny met an plas, pour asiste dimoun ki dan sa bezwen?

E dan menm laliny, eski Minister osi pe revwar fason pou sansibiliz dimoun pour pran ka ek zot vye paran etandonnen presyon ki i annan lo sa servis? Mersi Mr Speaker.

MR SPEAKER

Mersi Onorab. Minis ou repons silvouple.

MINISTER MARIE-CELINE ZIALOR

Mersi Mr Speaker. Bonzour tou ban Manm Onorab e bonzour tou bann dimoun a lekout.

Mr Speaker mon ti ava kontan dir Onorab Labrosse atraver ou, ki nou partaz menm

konsern ki i annan lo sa size. I annan plis demann pou lakaz bann dimoun aze e ki depans lakantite ki nou kapab fourni. E mon ava komans avek sa dezyenm kestyon.

Nou'n servi tou loportinite ki nou'n gannyen kot Minister, pou nou sansibiliz bann zanfan pou zot pran swen avek zot vye paran ki'n sonny zot, ki'n elev zot pandan en kantite lannen. Nou'n lans Tenm pou Departman Lafanmir pou sa prosen 2an; Mon Fanmir, Mon Leker, zisteman pou fer sa kalite sansibilizasyon.

E sa in kree pa mal loportinite pou nou kapab ganny loportinite fer bokou sansibilizasyon e nou pa pou manke Mr Speaker pou kre ankor lezot loportinite pou nou fer li.

Me mon ti ava osi dir ki nou pe vwar ki i annan bann fanmir ki la, pe fer zefor pou pran swen avek zot bann pros e mon ti ava kontan felisit zot, Mr Speaker e ankouraz zot e dir avek larestan pran sa legzanp e fer parey.

E pour sa premye kestyon larepons i sen non, nou napa okenn nouvo kriter pou admet. Kriter pou admet i ankor parey bann dimoun aze dan lakaz dimoun aze. Mersi Mr Speaker.

MR SPEAKER

Mersi Minis. Onorab ou annan kestyon siplemanter?

HON RICHARD LABROSSE

Wi Mr Speaker. Mersi Minis pou ou larepons byen bref. Minis an se moman ki nou pe koze la. Ki sityasyon selman vreman ek bann *Home Elderlies* dan pei li menm?

E mon dezyenm kestyon, mon kontan zot pe fer en zefor, zot pe met sa sansibilizasyon pou dimoun pran ka ek zot bann vye paran. Me lo menm laliny osi, eski Minister Lafanmir zot menm, la mon pe koz osi bann vye paran osi kot lakour pou mwan sorti en ou lo sa kestyon.

Eski zot annan bann, ankor lo Polisi bann nouvo fason pou bann dimoun bann vye dimoun dan lakour ki pe ganny asiste ek bann *carer*, konmsi si i annan bann nouvo formasyon eksetera lo sa laliny? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mr Speaker si ou permet, mon ti ava kontan petet demann *PS Roucou* pou pran sa 2 kestyon. Mersi.

MR SPEAKER

Mersi. *PS* ou annan laparol.

PS CLIVE ROUCOU

Mersi Mr Speaker. Bonzour tou Manm Onorab. Bonzour Onorab Labrosse. Mr Speaker spesifikman pou lakaz nou pou bann *Elderly Homes*, parey Minis in met lanfaz lo la ki demann in deza en kantite. Zis *from* sa lannen, nou annan en kenzenn dimoun ki lo lalis pe espere.

E nou kontinyen ankouraz bann Manm fanmir pou pran sa loportinite pou okip zot bann *elderlies as* demann i sitan o. An term sipor familyal nou travay an tre pros kolaborasyon avek lezot antite parey nou pe travay tre pros avek *SIB*.

Ki nou'n deza annan bann miting *from* oparavan kot deza nou annan later ki *available*, pou nou fer premyerman ki nou'n diskite se en fasilite rezidansyel kot bann dimoun i kapab reste endepandan.

Dezyenmman, nou'n diskite i annan bann fasilite ki nou kapab parey bann *Nursing Home*, kot bann dimoun aze ki bezwen latansyon medikal 24 lo 24 i kapab reste.

E trwazyenmman nou'n diskite bann fasilite ki nou apel bann *Elderly Daycare* kot bann

manm lafanmir i kapab anmenn zot bann *elderly from* bomaten 4er, ler zot sorti travay zot pase zot ava pran zot.

So i annan sa bann diskisyon an term sipor pou bann fanmir, an relasyon avek nou bann dimoun aze. So travay i la kot Departman Lafanmir pou asire ki nou bann *elderly* i viv zot lavi byen. Mersi Mr Speaker.

MR SPEAKER

Mersi *PS*. Nou a pran kestyon Onorab Romain.

HON GEORGES ROMAIN

Mersi Mr Speaker. Bonzour Minis avek ou delegasyon. Bonzour tou bann koleg Onorab e tou dimoun a lekout. Mon kestyon in reponn en pe par *PS Roucou*. Me selman mon ti ava al dan sa laliny ki mon konnen Anse Etoile in enn sa fasilite prive, kot bann dimoun aze pe reste.

E mon ti anvi demann Minis, akoz in deza mansyonnen dan ansyen ladministrasyon ki zot ti pe ankouraze pou donn later bann biznes prive, kot zot ti kapab fer en pe dan sa bann *Homes* kot bann dimoun i annan larzan, byensir sa biznes prive i ava donn sa fasilite kot bann

dimoun ki annan larzan met zot fanmir.

Me akoz kekfw zot pa kapab vreman zot menm okip zot fanmir, me selman sa *Home* li menm i a donn sa servis valer pou sa larzan.

Alors mon ti pe demann Minis atraver ou *PS* osi, kekfw *PS* ou kapab reponn, ki vreman - ki bor zot in arive lo sa progre pou ankouraz sekter prive vreman pou antre dan sa kalite parey ki annan Anse Etoile? Kot i ava ed plis bann dimoun ki dan sa problemn, ek kekfw bann dimoun aze, byensir i ti a pli bon ankouraze pou reste kot zot, dan fanmir.

Me selman i annan fanmir kekfw fason travay, oubyen son fanmir ki mannyer i ete, ti a pli meyer dan en *Home* kot i pe ganny sa servis vreman. Mersi Mr Speaker.

MR SPEAKER

Mersi Onorab. Minis in sinyal *PS* pou reponn kestyon.

PS CLIVE ROUCOU

Mersi Onorab pou ou kestyon. Onorab parey mon dir oparavan nou'n deza dan sa diskisyon avek *SIB*, e le 3 kriter in deza met an plas pou fer tel fasilite en pe parey sa enn Anse Etoile menm kot ou.

So sel problemn ki nou ti gannyen, ler nou'n fer sa alokasyon napa bokou endividi dimoun prive mon krwar ki'n vin devan. *In fact* mon krwar ti annan zis enn ki'n vini. Me apre diskisyon ki nou'n fer avek *SIB* la, nou pe remet sa deor e remet sa bann kont later ki *available* pou dimoun revwar, refer zot prosedir pou nou annan tel fasilite nesese pou nou bann dimoun aze. Mersi.

MR SPEAKER

Mersi *PS*. Onorab Roucou ou kestyon.

HON MICHEL ROUCOU

Mersi Mr Speaker. Bonzour Minis, *PS* ek ou lekip. En bonzour spesyal zabitan Mont Fleuri.

Minis si ou kapab dir avek nou, eski i annan en vizit ki ganny fer par bann zofisye kot bann *Home* oubyen ou kapab dir en pti pe bann zofisye pou al get en pti pe sityasyon, akoz souvandfwa espesyalman bann ki reste kot bann lakour ki bann *carer* i travay avek, pa tou.

Be selman i annan kot ler ou vini petet i annan sa problemn *hygiene*, kot ou vini ennler parey mon pou dir ou zis parey North East Point ler ou pou ale, kot ou pou vini i annan

sa loder ki vin zwenn ou, si i annan en serten louvraz ki pe ganny fer pou revwar sa?

Apre osi Minis si ou kapab dir avek nou, an term bann nouvo fason fer ki ou Minister pe mazin anmennen dan bann *Home*? Mersi.

MR SPEAKER

Mersi. *PS* ou annan laparol.

PS CLIVE ROUCOU

Mersi Onorab Roucou. Onorab Roucou premye parti ou kestyon ou'n fer referans avek North East Point, e i pa tonm dan nou ziridiksyon mon kapab dir, i tonm avek Minister Lasante.

Me par kont lo nou kote nou annan en divizyon spesifik pou nou bann *Elderly Homes* espesyalman e sa mon garanti ou ki le nesese i ganny fer atraver nou Direkter Zeneral - nou Direkter nou bann dimoun ki lo, ki travay kot bann *Homes* pou asire ki tou bann fasilite bann servis i a la oter kot nou bann *Homes*.

So nou annan sa kriter entern ki nou fer sir nou kit li lo sa standar ki nou bann dimoun aze dan nou bann *Home* i viv en lavi bon ziska zot dernyen zour mon kapab dir. Mersi.

MR SPEAKER

Mersi *PS*. Onorab Cosgrow ou kestyon.

HON WALLACE COSGROW

Mersi Mr Speaker. Bonzour Minis. Bonzour *PS*. Bonzour Mrs Umarji. Minis dan ou larepons boner ou'n dir nou poudir zot term pou sa prosen 2an, sa 2an ki devan nou, i konsern la fanmir, nou leker lafanmir i sipoze nou leker, lafanmir i sipoze nou leker.

Minis enn bann sityasyon ki pe arive ozordi se ki lot Minister ki ansarz pou servis *homecare, carer* i ti Polisi kot dimoun ki ti pe travay avek zot bann vye, sirtou par egzant bann msye, bann madanm ki ti pe travay ek zot msye ouswa zot madanm ouswa serten Manm lafanmir ki ti pe travay avek zot bann vye paran, ki zot war zot dan difikilte pa kapab prezan travay koman *carer* zot bezwen rod en lot dimoun pou travay koman *carer*.

E sa Minis i pe met presyon lo sa fanmir pou zot kapab gard sa manm fanmir dan sa lakour dan sa *household*, pou zot *take care* ek sa fanmir. Eski Minis ou pare pou pran petet pran sa dan lanmen e diskite avek sa lot Minister pou kapab realiz zot Polisi?

An sa ki konsern lafanmir, nou anvi ki lafanmir i reste ansanm, *but at the same time* lot Minister i annan en Polisi kot i pe *sort of* - mon pa pe dir ka sa fanmir - me selman i pe fer li difisil pou sa manm fanmir kapab *take care of* son *family member*, e petet fors li al rod en *Home*.

So eski ou krwar zot kapab re aliny zot Polisi eski ou pare pou ou *lead* sa diskisyon pou anliny sa bann Polisi? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon.

Toulezour, preski tou le semenn nou an diskisyon avek sa ki nou dir nou bann *stakeholders* enkli Departman Sosyal kot ankor pe koz lo la kot *ASP* kot bann *carer*. E kot nou si i annan okenn fanmir ki vin kot nou ki dan bezwen e ki nou kapab ede, fer en diskisyon avek *ASP*, ouswa Departman Sosyal, ouswa *Local Government* nou fer li preski toulezour bann diskisyon ka par ka.

Departman *ASP* nou annan son bann kriter petet

kekfwa bann kestyon Mr Speaker Onorab i merit met devan zot, akoz zot kriter zot konnen akoz ki zot pe sanz sa. E i annan en proze mon konnen akoz nou pe travay avek zot lo la pou profesyonalizasyon *carer*, i annan en travay ki pe ganny fer pou fer sa.

Parfwa osi tou ou fanmir li ki vin en problem. Parfwa bann pros ki ou krwar i sipoze pe vey en papa en manman ouswa en zanfan, i annan en kantite keksoz ki zot bezwen regarde bann kriter e Minister Lasante osi i enkli *involve* dan sa bann diskisyon.

Selman nou si kot nou santi nou fer ou, nou pa pe al koman fer li la nou deza pe fer diskisyon si i annan okenn Manm fanmir ki pa pe ganny asiste avek *carer*, ouswa nou vwar i annan en problem kot nou kapab ede, siporte, nou siporte. Mersi Mr Speaker.

MR SPEAKER

Mersi. Onorab zis si en bout pa'n ganny reponn silvouple. Mon annan lezot Manm pe espere.

HON WALLACE COSGROW

Wi Mr Speaker mersi. Mr Speaker mon ti'n demann Minis si zot pare pou diskite pou revwar Polisi. Akoz la in dir

mon *ad hoc*, bann *ad hoc situations* zot dil avek. Eski li koman sa Minis ki anmas fardo, problem lafanmir, eski ou pare pou kapab annan en Polisi kler dan en Gouvernman, en Polisi kler ki viz ver byennet lafanmir an sa ki konsern *the carer system*? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Zis en koreksyon, nou Minister pa anmas fardo lafanmir Mr Speaker.

Mon krwar i annan en kestyon taler mon ava ganny loportinite pou nou koz lo la, nou pe anmas fardo person. Nou fer sa bann diskisyon avek nou bann partner pou regarde ki mannyer si i annan pou zot kapab revwar si an ka Polisi.

Sa kestyon Polisi Mr Speaker mon krwar Onorab i merit demann avek sa Minister ki fer Polisi.

Nou, nou pa vwar poudir nou pou al *advocate* pou en Polisi. Polisi i pa *issue* li, i lenplimantasyon i sanmenm sa ki nou bezwen fer. Ler ou annan plis ki la pou ou kapab annan keksoz ki transparan ki *fair*, par ler osi tou i letan pe

ganny enplimante parey ou pou apel *ad hoc*.

Ka par ka, bann dimoun parfwa se sa ki ou merit pe ganny fer e letan i vini ki en dimoun i annan konsern, nou sa ki nou pare pou nou kapab ale pou nou fer avek Departman Sosyal. E si Mr Speaker Onorab i pa satisfè avek sa larepons annou agree pou dezagree. Mersi.

MR SPEAKER

Mersi. Onorab Aglae ou kestyon.

HON EGBERT AGLAE

Mersi Mr Speaker. Bonzour Minis ek *panel*. Minis an vi ki i annan gran demann pou ganny akse avek en *Home*, eski Minister pe mazin reviz en pe bann *staying condition*, sa i konsern ladministrasyon li menm dan sa bann *Home*?

E dezyenman bann kontribisyon finansyel ki sa bann dimoun ki pe reste dan *Home* i fer ozordi? Mersi.

MR SPEAKER

Mersi. Minis. *PS* i ava reponn. Wi *PS*.

PS CLIVE ROUCOU

Mersi Mr Speaker. Mersi Onorab pou ou kestyon. Wi Onorab i annan gran demann

pou bann, demann pou *Home*. Wi nou'n revwar en pe nou bann kriter pou ladmisyon, kriter pou viv dan *Home*, me en keksoz ki enportan se ki nou vwar ki nou bann dimoun i pe reste pli bokou letan, pli lontan.

So nou annan bann dimoun ki'n vyei dan *Homes*. E lo sa pwen i annan diskisyon ki pe arive avek Minister Lasante, me demann pou reste problem, pa problem *as such* me dimoun i reste pli lontan e nou vwar ki demann an deor i vini.

Nou pa pou reviz ladmisyon *as such* pou *Home*. Me fason viv dan *Home*, lafason servis ki nou pe fer dan *Home* tousala pe donn nou en benefis kot nou war nou bann dimoun pe viv pli byen. E laplipar en kantite dimoun pe anvi reste e en kantite dimoun ki anvi reste pa pe sorti kekfwa parey avan. Dimoun ti sorti dan *Home* pou al kot fanmir.

La nou war bann dimoun bon pe kontinyen reste dan nou *Home* e zot pe viv pli lontan e la nou war sa *backlog* i vini prezan. Mersi.

MR SPEAKER

Mersi. Wi Onorab si en pwen pa'n ganny adrese silvouple.

HON EGBERT AGLAE

Mr Speaker kontribisyon finansyel ki en dimoun i fer ler i dan *Home*. Detay.

MR SPEAKER

PS ou kapab reponn sa vitman silvouple. Kontribisyon finansyel Mersi.

PS CLIVE ROUCOU

Wi Mr Speaker. Mersi Onorab. Mr Speaker pou la ek mwan mon napa sa detay *how much*. Nou peye me selman wi nou'n revwar sa kontribisyon ki zot fer dan *Home* me mon napa sa lenformasyon avek mwan la, mon kapab fer ou gannyen Onorab. Mersi.

MR SPEAKER

Mersi. Onorab Esparon ou kestyon.

HON REGINA ESPARON

Mersi Mr Speaker. Bonzour tou dimoun. Mr Speaker mon anvi demann avek Minis an vi ki bann *Regional Home* i tonm anba Minister Lafanmir, e parey in fer sorti ki lopital North East Point sa bout *Regional Home* kot lopital North East Point i tonm anba Minister Lasante.

Eski i annan sa kordinasyon ant sa Departman kot Minister Lafanmir ki okip *elderly* avek lopital North East Point li menn sa bout *Regional*

Home e ki laz ladmisyon dan bann *Regional Home*? Mersi.

MR SPEAKER

Mersi. PS?

PS CLIVE ROUCOU

Mersi Onorab. Onorab kolaborasyon, travay kolaborasyon nou Minister i met en kantite lanfaz lo la e nou Minis osi tou, nou met en kantite lanfaz lo *collaboration work*. E nou Minister i travay tre pros avek Minister Lasante.

In fact la i annan sa travay ki nou pe fer pou nou fer *exchange of* bann rezidan, bann ki'n vyei e in malad dan nou bann *Elderly Homes*, kot pou nou fer sa sanzman avek Minister Lasante, me sa i ankor dan en diskisyon. So travay kolaborasyon i la. E ki dezyenm parti ou kestyon Onorab, eskiz mwan?

HON REGINA ESPARON

Ki laz ladmisyon dan bann *Regional Home*? Mersi.

PS CLIVE ROUCOU

Ok thank you Onorab. Onorab sa ki nou, nou'n revwar la, se ki nou'n anmenn li pli ba ki, nou'n anmenn li 60an pou komanse la. Me tousala i depan lo kriter osi ki ou pas ladan avek nou divizyon, ki fer tou son bann

evalyasyon pou ladmisyon dan *Home*. Meri.

MR SPEAKER

Mersi *PS*. Onorab Gabriel ou kestyon.

HON CONRAD GABRIEL

Mersi Mr Speaker. Bonzour tou dimoun a lekout. *Welcome* Minis ek ou delegasyon. Minis ou'n ganny dir napa gran, gran nouvo kriter pou le moman pou *old people*. Me solman mon annan en pti konsern Pointe Larue petet.

I annan en dimoun ki'n viv en pe letan Ponte Larue in pas atraver serten labi i *badly need* en *home*, e in ganny dir i pa pou kapab ganny Pointe Larue malgre i annan landrwa ki vid. I pou ganny La Digue or Praslin.

Zis petet eksplik nou en pti pe *why is this, because* son tenm e mon fanmir, i annan zis en fere isi ti kapab pase vin vizit li, me sa landrwa ki zot pe al anvoy li i ekstrememan difisil pou li. Eski nou kapab konnen *what is the issue?*

Aprè parey Onorab Roucou osi in pas en pti pe lo la, Onorab Aglae osi, petet ti a bon sirtou dan wikenn, get byen sa bann *Old People Home* konmsi. Mersi Mr Speaker

MR SPEAKER

Mersi. E *PS* ou adrese *please?*

PS CLIVE ROUCOU

Mersi Onorab pou ou kestyon. Onorab pou ou lenformasyon *Home* Pointe Larue i plen, nou an zis en lasanm ki *available* e nou an en dimoun ki'n fini pe marke pou vin ladan. Sel landrwa kot ti annan 2 *rooms* ki ti *available* se Praslin Grand Anse ti annan enn, epi La Digue ti annan enn.

So si demann i vini aköz nou ti sa dimoun ki ti'n fini pare pou antre ladan e si nou annan en lot dimoun ki'n vini dan sa ka spesifik *only* landrwa ki *available* se Praslin oubyen La Digue. Nou pa kapab tir en dimoun pou remet en lot.

An term wikenn ki ou'n koz lo la, me an term wikenn nou annan dimoun, nou annan nou bann *carers* ki la *available* e nou bann *Home administrator* i pase pou fer sir tou keksoz i annord. Mersi.

MR SPEAKER

Mersi. Bon mon a pran kestyon Onorab Loizeau kantmenm in lev son lanmen en pe tar. Onorab?

HON NORBERT LOIZEAU

Mersi Mr Speaker mon'n lev mon lanmen en pe tar aköz i annan en repons ki Onorab-

MR SPEAKER

Ale demann kestyon, demann kestyon.

HON NORBERT LOIZEAU

Mon anvi demann *PS Roucou*. *PS Roucou* in dir ki ladmisyon dan *Home* i devret 60an, konmsi mon anvi demann Onorab Roucou be pandan tou sa bann letan ziska 60an, kote tou sa bann dimoun ti pe reste?

Zot ti annan en fanmir, zot ti pe reste anba en ros? 60an ou'n deside viv dan *Home* konmsi mon ti a kontan konnen kote zot sorti tou sa bann letan pou zot vin dan *Home*? Mersi.

MR SPEAKER

Mersi. Eski ou'n, Minis ek *PS eski Onorab* in byen konpran zot repons? *PS* ou adrese silvouple.

PS CLIVE ROUCOU

Mersi Mr Speaker. Mersi Onorab pou ou kestyon, pou ou propozisyon, pou sizesyon.

Wi Onorab nou ler nou ganny sa bann *request* kot zot vin fer zot aplikasyon, nou pa al dan sa detay pou gete kote ki i ti ete avan, me nou fer tou laplikasyon lo en baz endividyel. Zot *assessment* i ganny fer *proper e whoever* ki bezwen ganny admit nou fer le

neseser zot ladmisyon i ale. Mersi.

MR SPEAKER

Mersi.

HON NORBERT LOIZEAU

Be selman sa bann dimoun zot ti bezwen pe reste en landrwa, ou konpran? Mwan mon manman pe reste kot mwan, ler i ganny 60an mon pran li, mon anvoy li dan *Home* konmsi, zis akoz kriter i koumsa alor 60an, alors ou pa pou dir ek Norbert Loizeau be non ou manman okip ou manman i ti okip ou ler ou ti ptipti.

MR SPEAKER

Onorab eskiz mwan. Mon krwar *PS* in dir poudir zot pa tro regarde kote sa dimoun ti ete, Minis ou ti a kontan donn en leksplikasyon, en leklersisman?

MINISTER MARIE-CELINE ZIALOR

Mersi Mr Speaker. Mersi Onorab pou lev sa konsern. Sa sizesyon i ganny pran, nou ava regarde sirtou letan nou pe regard en formasyon ki nou anmase, analis ki nou'n fer, pou al regard sa bann dimoun ki pe admet ki zot rezon akoz zot vin admet dan *Home*.

Pou nou kapab fer analiz rode kote problemn i ete e letan

pou konnen kote problemn i ete, nou ava kapab regarde ki mannyer pou rezourd. Mersi pou ou sizesyon. Mersi.

MR SPEAKER

Mersi. Nou a pas lo prosen kestyon, kestyon 102, Onorab Naddy Zialor.

HON NADDY ZIALOR

Mersi Mr Speaker. Bonzour Minis. Bonzour tou dimoun, an lakordans avek *Standing Order* 32(1) kestyon 102 i lir koumsa;

Eski Minis i kapab enform Lasanble lo bann nouvo kriter ki'n ganny met an plas pour ganny akse avek *Disabled Trust Fund*?

Ki kantite aplikan in annan depi ki sa nouvo prosedir in ganny etabli e konbyen dimoun ki'n ganny asiste?

Eski i annan okenn aplikasyon ki ti *pending* avan nouvo prosedir in vin an plas e ki pa ankor ganny asiste? Mersi Mr Speaker.

MR SPEAKER

Mersi. Minis. *PS.* Wi.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mr Speaker bann nouvo kriter ki'n

ganny met an plas, in fer provizyon premyerman pour ki sa fon i ganny servi pou aste bann lekipman en pe pli spesyalize ki bann dimoun avek dezabilite i bezwen.

Dezyenmman ki sa dimoun i bezwen ganny sertifye ava ek en dokter ki i annan en dezabilite. Trwazyenmman ki i pa pe ganny sa lasistans en lot landrwa pou menm bezwen e lot kriter finalman se byensir sa respipyan i en Seselwa.

Lot parti kestyon in annan 46 aplikan ki'n ganny soumet, 6 in fini ganny asiste e 5 in ganny aprouve, asiste byento e larestan zot bezwen met annord zot bann dokiman avan ki zot kapab ganny lasistans.

Lot parti kestyon an ki konsern laplikasyon ki la, ki ti la avan bann nouvo kriter wi in annan bann laplikasyon 2 ladan i asiste e larestan zot bezwen met zot bann dokiman annord.

E mon ti ava profit sa lokasyon Mr Speaker pou dir ki i annan osi bann endividi avek bann biznes ki pe ede avek aste lekipman pou bann dimoun aze, dezabilite (pardon) e nou dir zot mersi bokou. E nou ti ava profite pou lans en lapel avek lezot ki kapab ede ki nou pa depan lo zis sa fon. Mersi Mr Speaker.

MR SPEAKER

Mersi Minis. Siplemanter Onorab Zialor.

HON NADDY ZIALOR

Mersi Mr Speaker. Mersi Minis po ou larepons. Minis, eski ou kapab petet enform nou pou sa lannen ki kantite larzan i annan dan sa *Trust Fund* pou asiste sa bann group kategori ki ou'n mansyonnen?

Epi ki kalite sansibilizasyon ki Minister pe fer pou edik nou bann dimoun an term ki kalite lekipman spesyalize vremen ki pou ganny spesyalize anba sa *Trust Fund*?

E dan zot evalyasyon eski zot annan bann profesyonnel ki pe asiste zot pou konfirman vremen si sa kalite lekipman ki sa aplikan pe rode, i vremen sa lekipman ki annan en nesosite? Mersi Mr Speaker.

MR SPEAKER

Mersi. Onorab. *PS*.

PS CLIVE ROUCOU

Mersi Onorab pou ou kestyon. Onorab par lannen sa *fund* i *equal to* R400mil ziska la Zilyet nou'n depans nou R130mil avek bann demann sorti kot nou bann aplikan.

E sansibilizasyon i ganny fer, nou deza annan bann

program televize kot nou Direkter in deza koz lo la, lo ki sa *fund* i ganny *allocated for* e ledikasyon i kontinyen *on a one-to-one* ler bann aplikan i vini.

So lenformasyon i la, kot nou divizyon e nou'n deza fer li televize parey mon'n dir be selman nou bezwen fer sir tou parey Minis in dir tou bann dokiman i azour. Nou fer sir ki i egal an term fason administrasyon ki nou fer.

So dan tou sa ki nou fer, nou fer sir *above board* e tou dimoun zot dokiman i azour, pou fer sa laplikasyon. *So all in all* nou'n depans R130mil ziska la konmela lo sa 400mil. Mersi.

MR SPEAKER

Thank you. Kestyon Onorab Labonte.

HON ANDY LABONTE

Mersi Mr Speaker. Bonzour Minis avek *panel*. Bonzour tou Manm koleg Onorab, e tou Manm ki a lekout. Minis petet an bref si ou ti kapab donn serten legzanp, ki bann kalite ka ki zot pran konsiderasyon - konmsi kriter ki zot servi pou donn sa kalite lasistans? Apre petet ki pli o sonm ki zot *provide* sa lasistans? Mersi.

MR SPEAKER

Mersi. Onorab. *PS* i a adrese.

PS CLIVE ROUCOU

Mersi Onorab pou ou kestyon. Dan sa lasistans nou very *specific*. I pa kapab en keksoz tro ouver vi ki nou Bidze i en pe limite.

So dan sa ki nou'n ede sa 6 dimoun se lekiman parey *wheelchair* nou'n deza asiste. E modifikasyon bann lakour pou fer li *more disabled friendly*, pou bann lakour ki annan sa kelken ki pe vin ek sa dezabilite. Par egzanp en *ramp*, en *railing*, oubyen lasanmben fer li vin pli *disabled friendly*.

So *we've helped already* sa bann dimoun ki annan tel dezabilite kot zot. Me si ou dezyenm kestyon parti ou kestyon. Anr, *the highest cost* ki nou'n ale ziska la in 40mil a R50mil. Mersi.

MR SPEAKER

Mersi *PS*. Onorab Vidot kestyon.

HON AUDREY VIDOT

Mersi Mr Speaker. Bonzour Minis ek ou delegasyon. Tou Manm Onorab e tou dimoun ki a lekout. Minis oubyen *PS*, Minis dan ou larepons ou'n dir ki i annan ki zot bann dokiman pa annord. Petet osi ou kapab eklersi dan ki spesifikman ki zot pa pe - ki zot pa ankor

konplete pou zot kapab kalifye pou ganny sa lasistans?

Aprè zis pour konplimant en pri pe sa bout, konn en pti pe plis detay en term ki mannyer pou akse e ganny sipor atraver sa fon.

Vi ki ou'n dir ki i annan bann lavertisman ki zot in fer, eski i annan en *guidelines* ki zot in annan an plas, ki petet pou desantraliz li dan bann Ladministrasyon Distrik, ki permet bann Lotorite Distrik letan i annan bann vizit ki zot fer, si zot vwar ki annan dimoun ki petet i kapab fasilman ganny serten sipor akse avek sa fon, e i kapab gid zot pou zot vin atraver Minister pou zot kapab ganny sa servis? Mersi.

MR SPEAKER

Mersi. *PS* ou adrese.

PS CLIVE ROUCOU

Mersi Onorab pou ou kestyon. Onorab an term dokiman se laplipar di tan se napa kotasyon. Dimoun i fer laplikasyon par egzanp fer krwar i dir i oule en *wheelchair*, me selman pa vin avek en kotasyon konbyen sa i pou arive. Nou pa pou kapab zis *disperse* san ki nou annan en kotasyon ki nou konnen egzaktman *how much* ki nou pou donner.

An term laplikasyon, nou'n deza komanse lo nivo distrik kot ou kapab al rod ou *application form* pou ou *fill in*, me osi nou kot Oliaji *Building* kot nou divizyon pou *elderly and disabled* i sitye, dimoun i kapab akse servis laba, pou rod nenport ki laplikasyon oubyen pou lenformasyon e ranpli sa form. Mersi.

MR SPEAKER

Mersi PS. Nou a pas lo kestyon 103 ki kestyon Onorab Porice, ki mon konpran Onorab Bistoquet ki pou met li dan son plas, Onorab Porice in ganny eskize pou labsans ozordi.

HON ROSIE BISTOQUET

Mersi Mr Speaker. Bonzour Mr Speaker. Bonzour Minis avek ou delegasyon, bonzour tou bann Onorab. Kestyon pou Onorab Porice i lir koumsa;

Etandonnen ki i annan pa mal problemm lafanmir dan tou distrik, espesyalman lo Praslin, parey problem sosyal, lakaz, zanfan, eksetera, eski Minis i kapab enform Lasanble ki plan son Minister kot i konsern rezourd sa bann problem lafanmir dan distrik e lo plan Nasyonal?

(b) Eski pou annan en groupman ki pou ganny formen dan distrik, ouswa lo nivo

nasyonal ki pou desarz sa programm lafanmir?

(c) Eski i annan en Bidze ki pe ganny *allocate* avek sa bann programm? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mon kontan sa kestyon Mr Speaker, akoz i donn mwan sans pou eksplik en pe manda Departman Lafanmir pou tir en pe bann konfizyon. Nou'n deza ganny en konfizyon deza la bomaten.

Nou sosyete i ranpli avek problemm sosyal e parey sa kestyon pou Onorab Porice nou'n osi nou vreman konsernen. Sa kantite problemm labi lalkol ki annan Sesel labi drog, sa bann ka vyolans domestik, bann diferan labi kont zanfan bann ka depresyon sever e lezot ankor.

E tousala i dekoul dan sa problemm ogmantasyon problemm lakaz. Departman Lafanmir i annan manda pou travay lo bann programm pou fer prevansyon e pou ede devlop bann pli bon pratik e bann fason viv dan fanmir, pou transform nou sosyete en fason

viv pli pozitiv. Pour ki nou annan mwens sa bann problem i mon fek mansyonnen.

Nou a pe osi revwar bann polisi ansanm avek lezot partener pou met zot azour avek nou realite fanmir e realite sosyete ki nou pe viv la 2022.

Pour sa *part (b)* Departman Lafanmir e Minister i swete ki bann zefor pou ed bann fanmir i pa sorti zis kot Gouvernman. Definitivman i pou annan bann program pou fanmir ki pou ganny desantralize, nivo swa rezyonal ouswa dan nivo distrik.

Par egzantp ler Departman Lafanmir i ava komans son bann program spesyal pou bann koup, i posib zot ava kapab osi fer li lo nivo rezyonal pa zis lo nivo Nasyonal. E bann sesyon par egzantp ki *NCC* pe fer pou *parenting* i ganny fer dan bann lekol - savedir lo nivo distrik.

Mr Speaker mon mazine sa keston pe demande si mon pa tronpe, si sak distrik pou annan en group sipor pou lafanmir. E Mr Speaker sa i ava depan lo Lotorite Distrik, lo Sosyete Sivil e lezot ki decide pou fer li parey distrik Cascade in fer.

Distrik Cascade zot in decide pou zot fer regroupman

pou sipor e zot ti'n vin vwar nou, zot ti vin vwar nou kot Departman Lafanmir e nou ti ekout zot proze e nou ti decide pou nou parey nou pou fer avek tou lede pe ankouraz zot.

E Departman Lafanmir in ede fasilite, fasilite lansman, fasilite deroulman sa proze e nou ankore nou ti ava kontan felisite sa bann linisyativ parey.

E nou anvi dir Mr Speaker tou dimoun, tou distrik, nenport ki endividi group ki annan sa bann aksyon pozitiv zot anvi fer, nou, nou pare kot Lafanmir pou nou ede, pou nou siporte e nou a fer li akote sa bann program ki nou, nou deza pe fer ouswa nou annan lide pou fer.

Pou sa dernyen keston prenon kont mon larepons ki mon fek dir Mr Speaker, nou napa Bidze spesifik akoz sa program spesifik ki Onorab pe demande nou napa. Mersi bokou.

MR SPEAKER

Mersi. Onorab Bistoquet ou annan siplemanter.

HON ROSIE BISTOQUET

Mr Speaker i annan 3 siplemanter. Selman i annan sa enn trwazyenm ki mon krwar Minis in reponn mon ava demann sa 2 larestan.

MR SPEAKER

Mon a dir ou mersi. Annou al lo sa de.

HON ROSIE BISTOQUET

Eski ou Minister i annan travay ki'n ganny fer avek lezot Minister, ou Lazans pou antreprann sa bann programm lafanmir apre lot, eski pou annan en lofis ki pou baze la an distrik kot bann zabitan pou kapab anmenn zot problemm? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon siplemanter. Mon ava reponn sa en dezyenm, mon ava les PS Roucou, akoz li ki fer programm pou koz lo sa bann diferan Lazans nou travay avek.

Non, mon krwar mon'n fini reponn sa kestyon Mr Speaker, ki i pou napa okenn biro kot dimoun i anmenn zot problemm. E i annan bann Lazans spesifik sirtou kot Lazans Sosyal, kot Tribinal, enn de bann landrwa kot bann keksoz spesifik i deza annan kot bann dimoun i ale.

Nou parey nou pe dir bann programm ki nou pe fer, se bann programm prevansyon avan ler ou al dan problemm, avan ler ou antre dan problemm bann dimoun osi ki napa problemm avan ler i vin en problemm li osi i bezwen sipor kot nou kapab pe fer sa.

E pe travay avek bann larestan programm pou donn dimoun en pti pe plis *skill* e kit zot en pti pe plis pou zot kapab tenir bann stres ki annan dan lavi lafanmir. Mersi e mon ti a kontan pas laparol avek PS Roucou pou sa premye kestyon. Mersi.

MR SPEAKER

Mersi. PS ou annan laparol.

PS CLIVE ROUCOU

Mersi Onorab pou ou kestyon. Onorab sir ki i annan, e i annan bann travay ki'n ganny fer e ki pe ganny fer. Par egzanp nou Divizyon Resers ek Planifikasyon, nou pe revwar nou Polisi pou Lafanmir. E nou kontinyen travay tre pros an kolaborasyon avek lezot Minister e Lazans e Divizyon an relasyon ek lafanmir.

E nou lot Divizyon dan nou Departman ki apel *Quality of Life Division* kot nou ofer diferan servis - parey bann servis sirtou sosyal, kot bann

endividi kot nou bann lafanmir osi ki nou travay antre pros kolaborasyon avek bann lezot Lazans par egzanp nou fer sir nou komans bann program lo avek bann zenn garson, pou vin bann ki pe vin bann papa demen pou zot vin pli responsab.

E zot kontinyen travay pros pou nou mentenir sa eleman lafanmir Sesel, ki sa linite primordyal pou asire ki nou annan en sosyete pli bon pou demen.

So all in all nou'n travay tre pros avek tou nou bann MDAs e nou kot Departman Lafanmir nou reste *committed* pou asire ki lafanmir i reste sa pilye nou sosyete. Mersi.

MR SPEAKER

Mersi. Onorab Labonte ou kestyon.

HON ANDY LABONTE

Mersi Mr speaker. Minis petet zis en pti klarifikasyon, dan ou larepons ou'n dir poudir zot pe mazin travay avek plizyer lezot Lazans.

Me parey lazenes zot deza annan zot SNYC e nou osi annan bann diferan groupman dan bann distrik e lafanmir i enn bann groupman ki egziste deza atraver Biro Distrik. Eski ou pe mazin petet pi annan en

striktir en pe parey SNYC kot i kapab annan en lasistans pou lafanmir lo nivo distrik? Mersi.

MR SPEAKER

Mersi. Minis ou reponn.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Non, Mr Speaker nou pe sanz lafason fer keksoz. Nou, nou anvii ki i annan en pe plis *ownership* lo lapar bann larestan kominoter bann dimoun, akoz i annan pa mal bann dimoun dan kominoter ki kapab ki annan sa, i pa merit dan en striktir Gouvernman kontrole.

Nou, nou fasilite keksoz ki i annan okenn proze spesifik. Nou annan nou bann programm spesifik dapre bann resers. Kot Divizyon kot Departman Lafanmir i annan en Divizyon pou resers, pou zot fer bann resers vwar ki bann demografik, nou kapab travay.

Mon a donn ou en legzanp par egzanp ki nou bezwen fer, se al revwar en pti kot sa lanplwa, regarde ki mannyer bann fanmir pe travay, eski i pa pe anmenn plis problem dan fanmir ki mannyer nou pe travay. Sa i bann gran laliny ki nou bezwen fer an term Polisi.

Bann lezot programm ankadre nou fer en pe kot Divizyon *Quality Of Life*, be selman mon dir sa kantite problemm i annan plis problemm, en kantite. E nou ti ava swete mon pe fer rapel pour ki bann larestan regroupman bann larelizyon, en pe bann group i vini e nou tou ansanm.

Sa i pou bezwen en lager antoure sa, pou nou kapab transform nou sosyete, transform nou bann fanmir. Nou fasilite keksoz nou donn en pti koudmen, me nou pou napa en striktir formel parey pe demande. Mersi Mr Speaker.

MR SPEAKER

Mersi. Onorab Vidot pou son kestyon.

HON AUDREY VIDOT

Mersi Mr Speaker. Minis ou'n fer resorti ki pou napa okenn lofis ni swa dan ou Minister oubyen dan distrik, ki pou anmas problemm dimoun. Me zot dir zot annan program ki zot pe sey fer pou regarde ki mannyer zot kapab fer prevansyon.

So lo sa not mon pou demann avek ou Minis, eski zot Minister dan zot bann seksyon program, prenon kot ki nou annan bokou konsern lo la kantite ka ki swa bann ki'n

komet swisid ki pe arive e nou konnen sa i afekte en kantite nou bann kominote.

Eski zot annan en program ki zot kapab al dan kominote - parey ou'n dir ki swa lo nivo rezyonal, pou anmenn serten sipor psikolojik avek dimoun, pou ankouraz zot pou vin devan - petet pou regard en pti pe ki mannyer zot a kapab donn serten gidans sipor moral nou sitwayen ozordi ki pe pas dan bokou difikilte e ki krwar rezon pli fasil se komet swisid.

Baze lo statistik osi ki resaman nou'n demann avek Minis pou kote Departman Lapolis, prenon kont ki zot ki rikord sa bann lenformasyon, eski zot annan travay ki zot kapab fer ansanm oubyen ki zot pe konsidere pou zot kapab al dan sa laliny, pou nou siport en pti pe leta lespri espesyalman nou bann zenn? Mersi.

MR SPEAKER

Mersi. *PS.*

PS CLIVE ROUCOU

Mersi Onorab pou ou kestyon. Onorab mon a konmans lo dernyen bout ou kestyon. Wi, kot nou Divizyon *Quality Of Life Division* kot nou ofer sa servis. Wi nou rankontre en kantite dimoun ki pe vini avek *attempt*

swisid. Deza lo sa baz nou vwar zot en *one-to-one* kot *counselling* e terapi i ganny ofer.

Me lo nivo distrik wi nou pou napa en biro *as such a one-to-one*, me selman nou fer li kot nou Departman nou annan nou lofis ki *conducive* pou sa tel servis. Me an term program nou'n deza pe komanse nou bann lekòl lo bann landrwa travay, ki nou Divizyon pe ofer sa tel servis. E nou *advertise of how* pou vin akse nou servis kot nou Divizyon. So nou deza dan sa travay i deza pe ganny fer. Mersi.

MR SPEAKER

Mersi. Onorab Bistoquet wi. Ou kestyon.

HON ROSIE BISTOQUET

Mersi Mr Speaker. Minis ki pa'n ou Minister pou redwir problem, pa mal problem ki annan, pou bann zenn manman ki'n ansent anba laz pe fer fas avek, sirtou bann ki annan problem sosyal.

Bann ki annan problem lakaz e sirtou ki mon konnen i annan parey dan distrik Pointe Larue bann ki'n ansent, napa person pou kapab kit zanfan avek. I annan ki'n ansent annan *twins* tou e zot pa kapab al travay, zot sey zot mye, me zot ganny dir poudir nou pa pe

kapab pran zot, akòz zot bezwen kit boner ouswa zot zanfan i malad, bezwen al pran vaksen bann keksoz parey?

E sirtou pou donn zot kapasite pou zot kapab fer fas avek sa sityasyon, petet si pou annan en groupman ki nou kapab petet komet an plas lo kote rezyon ouswa lo kote bann distrik, ki ou Minister petet sa i en plan ki kapab vin avek pour Sesel? Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mon ti ava kontan pas laparol avek CEO Umarji akòz i deza annan en program ki i pe fer kot NCC. Mersi.

MR SPEAKER

Mersi. Wi CEO.

CEO NCC YASMIN UMARJI

Mersi Mr Speaker. Mersi MNA pou ou kestyon.

E ki nou pe fer nou kot NCC nou osi letan nou'n vwar sa nou'n get bann statistik nou'n vremen alarman par ba kantite zanfan ki nou'n vwar, ki anba laz ki'n ganny baba e

nou'n pran sa nou'n pe travay avek bann lezot Lazans.

Nou pe regarde ki manner nou kapab siport sas bann zanfan. Nou, nou'n komans fer en *Teenage Mothers forum* e nou'n al fer 3 fwa sa. Nou'n ganny 15 manmay anba 18an ki'n vin kot nou e nou'n asiste zot. Nou'n envit ASP, nou'n envit Lanplwa osi in vin koz avek zot, donn zot en pe bann direksyon ki kot zot kapab ganny bann sipor.

E zot in amenn zot problem, nou'n servi Mrs Loréal osi ki pe ed nou koman en *midwife*, ki pe donn zot bokou bann leksplikasyon osi ki manner zot pou azir avek zot bann pti baba.

Parske zot osi zot zanfan zot bezwen aprann ki manner pou *nurture* sa zanfan, koumsa nou pa ganny problem ankore sa zanfan pe grandi.

E nou'n vwar nou poudir la nou kot NCC, nou pe donn enn sa manman sipor parey Minis pe dir oparavan *emotional*, *psychological support* zot bezwen en kantite sa. Mon konnen nou koz lakaz, nou koz paran, me nou bezwen get sa zanfan osi i ankore en zanfan i annan en lot zanfan pou okipe. E alor nou kot NCC nou pe get sa zanfan osi ki

manner nou kapab pe siport li emosyonnelman.

Kot *Housing* nou pa'n kapab fer sa nou pe sey set en *working group* parey Minis pe dir. Nou anvi get en *campaign* lo *teenage pregnancy*. Nou anvi redwir nou ti a kontan nou pe travay ek Ledikasyon. La mwan ek Mrs Loreal lot semen nou'n boukte nou pe al vwar Mrs Hermitte pou nou gete ki bann Polisi, Ledikasyon i annan.

Akoz parey Minister Zialor in eksplike nou Departman i prevansyon. Alor kot NCC nou enterese regarde ki sa ki egziste dan pei *already*, ki annan ki pe fer bann ledikasyon pou tou zanfan. E nou pa komans sa dan segonder, nou komans bezwen komans en pe pli boner. Nou bezwen komans *tackle* sa pli ba e sa ki nou pe al travay ek Ledikasyon, Sosyal, Lasante. Mersi.

MR SPEAKER

Mersi. CEO. Bon nou an pas lo prosen keston. Kestyon 104 Onorab Egbert Aglae.

HON EGBERT AGLAE

Mersi Mr Speaker. Bonzour Minis ankore enn fwa ek *panel* Mrs Umarji;

Etandonnen zerans Vilaz Prezidan i en gro *challenge* ki swa finansyel ou resours imen,

eski Minis i kapab dir ek sa Lasanble, ki bann reform ouswa transformasyon ou Minister pe mazin vin avek?

Asir en bon zerans e *management* sa Vilaz?

Asir plis sekirite nou bann zanfan ki reste dan Vilaz? E etabli bann pli bon relasyon ant Vilaz e lezot *stakeholders* Enportan.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou kestyon. Mr Speaker detwa mwan pase, mon ganny par Onorab Waven William lo son par pou li, e lo par trwa lezot Onorab lo lapar Onorab Phillip Arissol, Onorab Adelaide e Onorab Aglae ki loter kestyon.

Zot ti pe demann en meeting pou zisteman adres sa bann konsern Vilaz Prezidan, e sa trwa kestyon ti osi parmi sa bann konsern.

Mon lofis, ti organiz *meeting* pou sa kat Manm Onorab, pou zwenn *CEO* Umarji ki e osi mon ti fer mon lekor *available* mwan menm. Nou *meeting* ti ganny fer le 30 Me 2022. E trwa Onorab ki ti vini dan kat. Onorab Aglae ti

prezant son leskiz avek Onorab William e i pa ti vini, e i pa ti anvoy en reprezantan.

Nou ti pas omwen 2erdtan i pa plis, pou adres tou sa bann konsern e osi propoz solisyon. Mr Speaker selman pou benefis tou dimoun ki konsernen ek Vilaz Prezidan, mon ti ava kontan partaz sa bann lenformasyon.

Premyerman kriter pou anploy nouvo travayer lo Vilaz in pran en lot dimansyon, kot nou sers travayer avek plis bagaz e konesans anliny avek kalite zanfan ki Servis Sosyal i depoz lo Vilaz. Dan en fason pou kapab mannyer konpran zot pli byen, anver zot latitud, anver zot konportman. E Vilaz in ranplas sa post *counsellor* avek en *post provisional psychologist* an Novanm 2021.

E sa pe ede pou adres bann problem mantal ek emosyonnel souvandfwa, bann zanfan i fer fas avek. E plizyer aktivite e program i ganny organize lo en baz regilye avek zanfan, pou tous laspe spirityel mantal fizik. E avek bann defi zot pe fer fas avek.

Sa dezyenm bout nou'n ranforsi lakantite zofisye sekirite ki travay lizour e aswar. Avan 2020, nou ti annan zis en sekirite lo *duty* lizour e aswar. Me avek plizyer lensidan e

konsern ki'n arive, ti enportan pou annan de ankor plis sirveyans lo vilaz. Sa in anmenn en pe soulazman.

E an plis, an 2021 nou ti rod resours, nou'n enstal pou premye fwa plizyer *camera* sekirite dan tou kwen Vilaz. Koman prevansyon e ranforsi sirveyans. E nou osi annan bon korperasyon, avek Lapolis Port Glaud ki fer bann *spot check* regilye sirtou aswar. E Lapolis in entervenir enn de lensidan. En nou rekonnèt, nou apresye zot sipor.

E trwazyenmman in deza, e i ankor annan bon relasyon avek son bann partener e *stakeholders*. Zis pou mwan donn detrwa legzanp;-premyerman nou an bon relasyon travay avek primer Port Glaud e lekòl segonder Anse Boileau.

Nou osi annan *meeting* o nivo lo en baz regilye avek Servis Sosyal, avek Ledikasyon, avek Lapolis, konsernan okenn keksoz ki konsern bann zanfan lo Vilaz. E nou osi annan afilyasyon, aktiv avek lorganizasyon travay ki ed nou bann zanfan lo program *TIVET*, osi dan reentegrasyon ler zot retourn kot zot fanmir. Dan en fason pou ganny en travay an ka zot pa kalifye en pos-segonder.

E nou pa bliye osi bann letablisman lotel ki pandan lannen zot in envit nou bann zanfan pou partisip dan bann aktivite ki zot met an plas e an plis, zot osi vizit Vilaz.

Nou annan pa mal bann travay volonter, pe fer netwaye, koupaye e aktivite spor e rekreasyonnel. E i annan osi bann endividi ki donn zot letan, e ki zot osi tou zot ed nou.

E byensir Mr Speaker i annan plas, pou nou fer vin bokou plis e avek plis partisipasyon. E parey la mon ti ava kontan remersye, partisipasyon Onorab Arissol, partisipasyon Onorab William, e partisipasyon Onorab Adelaide. Mersi bokou.

MR SPEAKER

Mersi Onorab Aglae. Ou Kestyon Siplemanter.

HON EGBERT AGLAE

Mersi Minis. Minis i byen ou pe ekersi sa kestyon, pou piblik, pa pou mwan. Me pou piblik konnen e tou bann ki annan en zanfan dan Vilaz. Minis ti annan en, en demann ouswa ti en plan pou annan *en boundary wall fencing* otour Vilaz. Eski i ankor reste dan plan pou materyalize, pour petet asir ankor en pe sa nivo sekirite pou nou bann zanfan dan Vilaz?

E dezyenmman, eski zot pe mazin osi pou met en pe plis resours adisyonnèl, kot i konsèrn devlop bann program pou zanfan ki reste dan Vilaz? Akoz parfwa nou zanfan i santi ki zot parey dan en pti - mon pa anvi dir prizon mwan.

Me eski zot kapab met serten resours osi, pou retir zot in deza fer oparavan, pou zot kapab osi entegre an deor Vilaz. E dan lakominote, e fer bann program pou kit zot enn pti pli eze? Mersi.

MR SPEAKER

Mersi Onorab. Minis wi?

MINISTER MARIE-CELINE ZIALOR

Mersi Mr Speaker. Mersi pou ou de kekyon adisyonnèl. Mon pou les CEO reponn premye. Selman mon ti ava kontan pran sa enn dezyenm. Akoz zisteman Mr Speaker, se sa ki sa trwa Onorab ti, pare *meeting* zot ti zwenn avek CEO pou nou kapab regarde dan bann distrik, ki mannyer nou kapab, fer sa ansanm avek Departman Sosyal.

Mazinen sa bann zanfan zot paran, se Departman Sosyal, i pa nou. Nou demann permisyon e regarde ki mannyer zot kapab entegre sa. Sa ti ganny diskite longman lo

ki mannyer nou kapab anmenn sa bann solisyon, nou kapab - nou tou sa bann zanfan i pou nou tou dan en fason. Ki mannyer nou tou nou kapab kontribye pou kapab fer sa.

Sa program i deza la, me mon ti a kontan pas parol prezan ek CEO pou donn detay lo sa *boundary wall*. Mersi.

MR SPEAKER

Mersi. CEO ou annan laparol.

CEO NCC YASMIN UMARJI

Mersi Mr Speaker. Mersi pou sa kekyon, Onorab. Definitivman, en miray nou'n tyek ladan. E parey ou konpran, nou bezwen *Planning permission*, nou'n fini anmenn en *architect* lo vilaz, in tyeke.

Mon ti ek DG Laboudalon yer osi, mon pe diskite. Parske si nou pe fer sa parey ou'n eksplike, nou pa kapab fer li parey en prizon. Bann zanfan in ganny retire kot zot paran, nou bezwen donn zot en landrwa ki sa bann zanfan i santi i dan lakour. Akoz nou'n tir zot pou anmenn zot en landrwa kot i pli bon ki dan lakour. E alor la nou pe gete ki mannyer nou kapab fer sa *boundary wall*, ki konmsi i parey en *friendly*, i parey kot nou fer dan lakour kot nou.

Me i pou kout nou, nou pe eksplere sa i pou en keksoz

kekfwa ki pou arive. Me selman lo sa osi Onorab, nou pe get osi nou bann *fencing*, nou *reinforce* tanzantan. Nou pa *give up*, nou *reinforce*. E ki nou ti fer dernyerman Onorab, ki nou vwar pa'n kase. Nou'n servi sa nide.

Nou'n pran zanfan, e nou ti annan bann *Duke of Edinburgh's Award Scheme* ki ti vini sorti kot *International School*, nou'n fer zot travay ek nou zanfan. Nou bann zanfan ki'n *mend* sa *fence*. Prezan ler ou donn zanfan sa *ownership*, sa responsabilite, sa bann zanfan pa pou kase, parse se zot travay, sa. E *so far God bless*, zot pa ankor kas sa *fence*.

Lo ou lot kestyon mon kapab raporte ki mon *really happy*, mon vreman kontan Bondye in ed nou kantite. Mon remerci li, nou'n ganny sa ki bann *MNA* ti vin diskit avek nou. Nou'n *very lucky*, nou'n ganny bann plasman pou 5 zanfan, dan kominote. I annan enn nou garson, i pe travay kot en mekanik 4 zour dan lasemenn.

Akoz i vwar lekol i en pe tro difisil. E la ki parey *Minister* in eksplike, nou kolaborasyon avek lekol pe mars pli byen sa lannen. Akoz bann lekol osi, mon'n fer en miting avek *PS Eulentin* avek bann lekol ek

bann psikolog kot *Ledikasyon*. E la nou pe vwar bann keksoz pe delivre vreman byen sa semenn.

Nou vwar bann zanfan pe ale sa bann plasman, zot lo laferm, zot kot mekanik, zot kot *hairdresser*. E parey ou'n demann nou, nou pe fer en zefor. Bann manrmay ki annan laz, ki annan permisyon. Akoz ou bezwen dan *S4*.

Bann lezot zanfan nou pe *still* sey lot - parey *swimming* la nou annan en garson, nou'n anmenn li kot Roche Caiman. *Thanks to NSC* ankor, nou travay an kolaborasyon. I *swim* byen. Alor la bann *coach* pe pran li *every day after school*.

Zot pe *train* li, i annan loportinite si sa garson i al son *swimming lessons* dan Sanmdi tou, nou pou sey fer li vin enn pti *instructor*. Konmsi nou pe *raise* lo sa *inspirations*. Nou pe fer zot vwar pli lwen ki dan lakour e ki lo vilaz. Nou pe montre zot ki deor i annan.

Me avek sa nou bezwen devlop sa *trusting relationship*. Akoz bann zanfan koumsa ler ou donn zot enn pti laliberte, zot ale zot pran enn pti pe plis. Alor nou bezwen siperviz zot, nou bezwen *supervision* bokou.

Me selman mersi bann ki'n ed nou parski dan kominote osi nou pe ganny

bokou led. Nou remersye zot tou. Bann piblik, bann *private*, bann lekol, bann edikater, Sosyal osi pe ede nou en kantite. Mersi bokou.

MR SPEAKER

Mersi. Yes, Onorab vitman.

HON EGBERT AGLAE

Mersi Mrs Umarji pou ou larepons e mon kontan Minis ki mon ti ganny sans adere pou zwenn avek Mrs Umarji, pou nou fer diskisyon lo bann size vilaz. E mon kontan ki zot ekout sa trwa Onorab, ki ti zwenn zot. Mersi.

MR SPEAKER

Mersi. Kestyon Onorab Arissol Sandy.

HON SANDY ARISSOL

Mersi Mr Speaker. Bonzour Minis ek ou lekip. Bonzour tou dimoun ki a lekout. De kestyon Mr Speaker, mon ti a kontan demann Minis si - anefè mon ti a kontan felisit zot, sa travay ki zot pe fer avek nou bann zanfan. Mersi pou sa.

Mon ti a kontan demann zot an relasyon avek bann zanfan, ki reste Vilaz. Eski i annan en travay ki pe ganny fer par Gouvernman, pou asire ki bann zanfan pou ankouraz bann paran ki annan zot paran

zot zanfan ki reste dan Vilaz i kapab rebran zot zanfan anba sipervizyon, i kapab vin pran zot zanfan? Osi pou bann zanfan ki napa paran, pou zot komans annan en program reabilitasyon dan bann fanmir.

En fason ki letan zot sorti a laz 18an, zot pa vwar zot tousel lo semen en egzantp.

Mon dezyenm kestyon Speaker, mon ti a kontan demann avek Minis, eski i annan en kontribisyon ki bann paran, oubyen bann fanmir ki responsab sa bann zanfan ki ankor vivan, ki pe reste dan bann Vilaz.

Mon demann sa kestyon parske taler nou'n aprann poudir bann trwazyenm-az ki reste dan bann *Homes*, i bezwen fer kontribisyon. Bann papa ki pa pey alimoni i ganny kondannen.

Be alor eski mwan ki annan mon zanfan ki reste Vilaz, eski mon pe ganny ankouraze pou fer en kontribisyon zisteman dan son *management* toulezour? Mersi bokou Mr Speaker.

MR SPEAKER

Mersi. Minis.

MINISTER MARIE-CELINE ZIALOR

Wi mersi Mr Speaker. Mersi Onorab pou ou kestyon. Mon zis pran enn pti bout sa dezyenm kestyon, apre larestan kestyon, Mrs Umarji i ava pran. Bann zanfan ki lo Vilaz se bann zanfan ki Mr Speaker, ki zot nou apel sa bann *social orphans* an Angle. Zot paran i deza en problem sosyal. E pou ou al rod en kontribisyon avek zot, zot telman dan problem.

Nou pa pou gannnen, nou pa pou gannnen. E vwala se akoz Sosyal letan i deside retir zanfan pou protez sa zanfan, pou byennet sa zanfan, zot fer li.

E i sipoze lo en baz tanporer tou fason. E travay avek sa bann paran pour ki zot kapab pran zot zanfan. I annan ki kapab pran, ou konnen i annan parfwa i annan bann paran i tonm en kou dan lavi, apre i releve, se sa. Me mon a les bann detay avek Mrs Umarji. Mersi.

MR SPEAKER

Mersi Mrs Umarji.

CEO NCC YASMIN UMARJI

Mersi Mr Speaker. Mersi Onorab pou kestyon. Parey Minis eksplike Sosyal ki responsab pou fer *integration, reintegration back* into the families.

Me solman nou travay avek zot, par egzanp la se sa ki nou pe anvoy bann zanfan lo *work placement*. Akoz si zot annan sa pti metye dan zot lanmen ler zot retourn dan lasosyete, ler zot in ganny 18an ou 17an, zot ti fini annan en pti keksoz, zot kapab kontinyen.

Nou'n vwar a in mars byen, letan nou'n fer sa ek Sosyal, nou'n travay ansanm. Me osi pou *reintegrate in society*, nou dir Sosyal bann keksoz ki nou, nou vwar bann zanfan i dir avek nou. Koumsa Sosyal i kapab anmenn sa kot zot paran. Selman mon bezwen dir, i annan bokou louvraz pou bann sosyal *social workers* fer ek lafanmir.

Selman en keksoz nou'n entrodwir lo Vilaz, depi *last year* akoz *COVID restriction*, nou'n fer nou apel sa *weekend for parents*. Nou'n fer sa an Novanm 2021, apre la an Me. Mwan osi mon mont lo Vilaz, *social workers* osi i vini. Nou ouver Vilaz pou bann paran vini, pou vin vizit zot bann fanmir, zot bann zanfan, e bokou paran in vini.

E la ki la zot fer en zefor, zot anmenn en pti keksoz. Zot anmenn manze enn pti keksoz pou zot zanfan, zot donn enn pti larzan tou. I annan i pa vini akoz zot napa nanryen, zot

telefonnen. Mon dir ek zot vini, nou fer bann pti *gift bag*, nou *manager* i fer bann pti *gift bag* i met pare, pou bann paran ki pa pou kapab donnen.

Oubyen si en paran son zanfan pa vini, nou oubyen enn ant nou oubyen en *social worker* i pas letan ek sa zanfan, nou donn li enn pti *gift bag*. Koumsa i pa *feel left out*, sa ki la prezan nou pe travay. Be i annan bokou travay pou fer ek paran. Mersi Onorab.

MR SPEAKER

Mersi. Mersi *CEO* mon annan kestyon, Onorab Loizeau.

HON NORBERT LOIZEAU

Mersi Mr Speaker. Mr Speaker mon ti annan de kestyon, enn Onorab Arissol in demande. Mon demann sa enn dezyenm. Mr Speaker mon anvi demann Minis. Minis vi ki sa fwaye i Port Glaud li, i dan distrik Port Glaud, eski Minis ou'n deza resevwar, okenn korespondans sorti kot Lotorite Distrik Port Glaud, partikilyerman *MNA* distrik lo bann defi, ki distrik Port Glaud pe vwar Lotorite Distrik pe vwar.

E osi propozisyon pou anmenn okenn solisyon pou

soulaz bann zanfan e osi bann travayer dan sa fwaye? Mersi.

MR SPEAKER

Mersi Minis. Ou ti a kontan adres sa?

MINISTER MARIE-CELINE ZIALOR

Mersi bokou Mr Speaker. Mersi Onorab pou ou kestyon. Zisteman Mr Speaker, se pour kwa aköz lentrodiksyon reponn sa kestyon. Mon ti le fer pase sa pwen. Aköz sa bann zanfan parey mon pe dir, i nou bann zanfan.

E pa toultan ki en konsern ouswa en *challenge*, petet nou adres li dan en fason pour zis rod problenm, ouswa adrese. Be selman regard enn pti git, ki mannyer nou fer sa solisyon pa la parey nou pe fer. Mon vwar, mon konnen nou *live* lo televizyon, devan *camera*. Me bann zefor ki pli onnet, bann zefor ki sorti kot leker, se bann zefor kot ou fer napa *camera* kot napa personn ki konnen.

Menm si parfwa ou pou ganny kritike, ouswa parfwa dimoun pa pou konpran poudir aköz ou pe fer sa avek ou leker. Menm sa enn kantmenm ou pa pou ganny gen politik. Sa ki mon le dir.

E sa ki mon ti ler fer konnen kot i konsern nou

zanfan, fodre ki nou met sa bann zafer de kote e ki nou anmenn sa devan.

Mwan kot mon lofis, mon pa konn petet si Onorab Aglae in fer direkteman sa zefor atraver NCC. Kot mon lofis non. Kot mon lofis i sa trwa Onorab ki ti pe ensiste menm. Onorab William ti pe ensiste menm, pou anmenn sa bann konsern devan.

E nou ti'n swete, mwan mon ti vreman dezapwente ki Onorab Aglae pa ti vini. Kanmenm i pa ti kapab vini, *at least* en reprezantan, ouswa petet kekfwa pour *reach out* kekfwa avek Minister. Si in fer avek NCC, kekfwa petet Mrs Umarji i a kapab endike. Selman avek mwan non.

Selman mon'n fer sa pwen egzakteman Mr Speaker. Akoz i annan bann keksoz, parey zanfana. Parey zanfana nou, nou bezwen par ler met sa de kote, e fer keksoz avek nou leker byen. Mersi bokou.

MR SPEAKER

Mersi. Mon a pran kestyon Onorab Mondon.

HON TERENCE MONDON

Mersi Mr Speaker.

(Interruption)

MR SPEAKER

Silvouple! Silvouple! Onorab mon konnen en legzanp in ganny mete. E referans in fer avek ou.

(Interruption)

HON EGBERT AGLAE

(Off-Mic)

Non Mr Speaker. Si Onorab i annan kestyon ... kont mwan - lo mwan *Standing Orders* i prevwar sa ...

MR SPEAKER

Mersi.

(Interruption)

MR SPEAKER

Ase! Arete silvouple! Onorab Arissol ou a permet mwan, *ok?* Wi Onorab mon a pran ou pwen. E nou a regarde si i annan en regleman dan *Standing Orders* pou sa. Onorab Mondon demann ou kestyon silvouple, mon bezwen bouze.

HON TERENCE MONDON

Mersi Mr Speaker. Bonzour Minis ek ou lekip. Minis dan en Lartik Nasyon an Desanm 2020, apre vizit Madanm Prezidan kot Vilaz, zot ti fer resorti dan sa Lartik, ki enn

bann pli gran *challenge* se sa standar, kantite *staff* vizavi zanfan. E dezyenmman sa melanz kalite zanfan ki kot Vilaz. I annan bann ki sorti dan bann fanmir, ki annan problemm sosyal.

E i annan bann ki zis problemm konportman. E ler mon'n ekout Mr Umarji, in donn sa - in eksplik sa bann bon travay ki pe ganny fer si oule pou ankouraz bann manrmay pran ...

Eski ozordi nou kapab, pe dir nou pa nesese annan en lot fasilite, pou sa bann zanfan ki annan sa bann problemm konportman? Ouswa nou kapab met tou ansanm pou kapab fer sa travay? E lo kote sa standar eski zot pe kapab *achieve* ki standar zot annan ozordi. Konbyen *staff* avek zanfan? Mersi.

MR SPEAKER

Mersi. Mrs Umarji pou adres ou kestyon.

CEO NCC YASMIN UMARJI

Mersi Mr Speaker. Mersi Onorab. Wi mon a komans avek *staff*, lo standar ki nou'n fer nou'n fer sa *Scheme of Service* ki nou'n met bann kriter, ki annan plis kalifikasyon, e *expertise* ek *skills* pou travay avek sa bann zanfan, parey ki'n

ganny tire kot zot paran. Me ki zot pe vwar nou *challenge* Onorab, i difisil pou *recruit* Sesel.

Mon a dir zot laverite, nou remerci Gouvernman. Lannen pase Minis Zialor, in al *fight* pou nou. Nou'n ganny 5an plis, la nou'n ganny larzan pou *appoint* 5 adisyonnal *child support officer*. Nou annan larzan pou *appoint staff*, nou pa pe ganny sa kalite *staff* ki nou bezwen pou travay ek sa bann zanfan ki annan sa bann konportman.

Nou bezwen bann *expert* ki kapab travay ek zot emosyonnelman, ki konnen ki mannyer pou *manage anger* bann zanfan, ki mannyer i konnen ki mannyer pou soulaz bann zanfan ler zot separe ek zot paran.

Ler zot pa vwar zot fanmir, ler zot ankoler zot zoure zot tir zot lakoler lo nou, bann adilt. Ki mannyer nou, nou konport nou, nou pa ankoler avek zot. E sa i, ou pa kapab sa ou annan *training* ki ou fer. E nou pe seye fer sa avek nou bann *staff* ki nou annan. E Sosyal osi pou donn nou enn pti koudmen ek ledikasyon.

Me parey ou pe eksplike, ki i annan zanfan ki kekfwa ler in vin la, in vin ek bann *challenges* ki nou lo Vilaz

kekfwa, nou napa sa *staff* ek sa *expertise* pou *deal* avek.

Parey si en zanfan i vini *already*, i pe servi sibstans. Nou napa en *rehabilitation program at the moment* ki pou ed nou. Me pa vedir nou pa pe *research*, nou pe serse. Nou pe rode, nou pe parey nou pe koze avan, nou pe get sa bann *stakeholder* si zot kapab vin ed nou.

Epi mon krwar i ki ou ti pe dir, kekfwa laz bann zanfan. Nou pran depi lan, an se moman, la nou annan en pti baba lan. E nou pli gran i annan bann en garson 17an. Alor nou laz, nou *spectrum of age i wide* en nou annan *both sexes*.

Nou annan fiy ek garson, nou separ zot, *in terms of accommodation*. Me nou fer bokou aktivite ansanm. E alor i demann bokou sipervizyon. Akoz bann *teenagers* osi ou bezwen veye, e sa kekfwa sa en *challenge*. Me si pli tar, mon konnen Sosyal pe sey rod bann *how do you say* - bann *centres* ki zot a met bann zanfan kekfwa, ki zot pou vwar li difisil pou reste dan en lenstisyon parey Prezidan Vilaz. Akoz i pa en *orphanage* li, i en *residential children care home*.

Nou donn manze, nou donn landrwa dormi. E nou travay ek bann zanfan, pou fer

zot adres bann keksoz emosyonnel ki zot in eksperyans pou zot kapab, *become better citizen*. Sa ki nou, nou *aim*.

Nou anvi ler nou zanfan i sorti la. I kapab *reintegrate* dan *society*. E *contribute to the society, that they are going to be members of*. Sa nou bi. Me wi kekfwa i annan zanfan ki bezwen plis ki nou an se moman nou kapab donner.

Me pa bezwen ki nou pe *give up*, non, non, non. Nou kontinyen travay, nou pa pou tir zot, nou pa pou zet zot nou. Nou pou seye nou mye pou ankadre zot avek nou bann *stakeholders*. Mersi.

MR SPEAKER

Mersi *CEO*. Nou pou aret la pour sa kestyon. Akoz mon bezwen pran en lot kestyon avan nou pran poz. Donk mon a remersye, *PS Roucou* e *CEO Umarji* pou zot partisipasyon. E mon a swet zot bon depar. E an menm tan mon a demann raporter, pou apel delegasyon swivan, ki pou kestyon 108.

(PS ROUCOU AND MRS UMARJI WERE EXCUSED FROM THE HOUSE)

MR SPEAKER

Nou a pran enn pti poz pou *sanitizing*.

(technical break)

MR SPEAKER

Bon mon swet bonzour e byenveni Mr Ralph Jean-Louis PS pou Lazenes e Spor, Mr Jean Larue CEO Sports Council, e Mrs Wendy Pierre Registrar General. E nou pe pran kestyon dan en lord enn pti pe soz pour, laranzman delegasyon. Alor nou al lo kestyon 108 dan non Onorab Porice e Onorab Bistoquet, pou poz son kestyon. Onorab ou'n pare.

HON ROSIE BISTOQUET

Bonzour, larestan delegasyon Minis. Mon pe al demande. Mr Speaker nimeron 108 ouswa nimeron 105?

MR SPEAKER

Sorry. Petet, non, nou pe al lo 108 mon krwar. Atann enn pti moman. *Sorry* mon'n tronp nimeron kestyon. Mersi bokou Onorab. Kestyon i pou Onorab Phillip Arissol.

HON PHILLIP ARISSOL

Mersi bokou Mr Speaker. Bonzour tou dimoun. Kestyon 108 i lir koumsa: -

Vi ki i annan serten lasosyasyon ou federasyon ki

an defo ek Rezistrar, e zot pou ganny *strike off*, e etandonnen ki Zwe de Zil pa lwen e ki sa bann atlet pa pou kapab partisipe si nanryen pa ganny fer,

a) Eski Minis i kapab donn Lasanble en pe rezon prensipal ki sa bann lasosyasyon i an defo avek Biro Rezistrar Zeneral?

b) Konbyen lasosyasyon ou federasyon an tou ki war zot dan sa sityasyon an defo avek Rezistrar? E

c) Ki son Minister pe fer pou asiste bann lasosyasyon ou Federasyon, sirtou sa bann ki pou partisip dan Zwe de Zil? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Onorab pou kestyon. Mr Speaker sa de premye kestyon, mon ava les pou Rezistrar reponn. Pou sa trwazyenm kestyon, nou'n deza komans travay avek Biro Rezistrar, pou organiz bann sesyon pou ed tou Federasyon, tou lasosyasyon sport, pou met zot annord.

Enn bann legzanp, parey nou'n fer avek Lasosyasyon Bisiklet ki mon ti ava kontan servi sa koman en legzanp pou felisit zot. Lasosyasyon Bisiklet

zot ti annan problemm avek Rezistrar.

Sa ki'n arive ki'n fer li marse, se ki ansyen lasosyasyon ki ti annan problemm, ti vini ti pare pou travay. Sa bann larestan manm Federasyon, ki ti pe ganny difikilte zot osi. Menm si zot ti annan en pe difikilte antre zot, zot tou zot ti pare ou vini pou nou vwar en solisyon.

E nou'n nobou kapab negosye, NSC in nobou kapab negosye avek Rezistrar pour nou kapab ed Federasyon Bisiklet. E mon konnen Departman osi ed zot, pour nou pti git, par pti git pou met zot annord.

Mon ti ava kontan sit sa koman en legzanp Mr Speaker, pou nou kapab servi poudir nou pa les zot tousel. Ki nou pe fer zefor pou ed zot. E nou'n osi fer partenarya avek bann *expert* ki dan zesyon sportif, akoz nou vwar, nou vwar febles dan sa ki nou dir *sports management* an Angle.

Zesyon sportif, e pa zis lo kote Federasyon, lo kapasite osi, pou NSC e pou Departman Sport ek Lazenés. E la mon pou lans lapel avek tou Federasyon avek tou lasosyasyon sportif. Zot fer zefor, sirtou benefis nou bann atlet.

Lo nou kote, nou pe fer bokou pour ki napa atlet, swa Zwe De Zil, ouswa lezot konpetisyon mazer, ki pou bezwen pey lakonsekans si an ka i annan okenn Federasyon, okenn lasosyasyon, ki an defo avek Rezistrar. Mersi Mr Speaker. Mon ti a kontan pas laparol avek Rezistrar, pou sa de premye.

MR SPEAKER

Byen, mersi. *Registrar* ou annan laparol.

REGISTRAR GENERAL **WENDY PIERRE**

Mersi Mr Speaker. Bonzour a tou Manm. So an term statistik, nou annan ... *well* an term rezon prensipal, nou annan bann lasosyasyon zot prensipalman ki zot pa pe *submit*, zot pa pe fayle bann kont odite.

Detay zot bann Zofisye, apre zot bann *minutes meeting* ki ganny demande anba provizyon Lalwa *Registration of Associations Act*. Pou klarifye an term statistik; pou met dan konteks, nou annan nou 790 lasosyasyon lo nou rezis.

Enn bann kategori se sportif. Total kategori bann lasosyasyon sportif, Nou annan nou apepre en santenn koumsa, ki enkli bann klib ki

anrezistre avek nou, koman asosyasyon. Me selman nou konprenezon ki annan apepre en trantenn ki afilyasyon, *in one way or another, be* i viziter oubyen fasilite avek NSC.

So depi nou'n komans sa legzersis, ki nou apel sa bann *compliance reviews of* bann asosyasyon lo nou rezis, ki ti komanse an 2019-2020, in annan 5 asosyasyon ki'n ganny *struck off*, pou rezon prensipal ki zot bann odit pa'n ganny *submit* avek zot bann detay ek zot bann manm, avek zot bann detay par egzantp zot bann *minutes of meeting*. Ki pou kapab *allow* Rezistrar pou etabli ki prosedir neserer zot in swiv pour lafason ki zot *operate* zot lasosyasyon.

I annan en lasosyasyon parmi, ki ler nou'n donn li notis pou nou lentansyon pou tir lo rezis, me in fer aplikasyon *appeal* Ankour. So sa ka i devan Lakour. Nou annan nou la, i annan nou 6 lasosyasyon la, ki zot kont 2019, *in addition - Well* i annan sa 5, apre i annan sa 6 *in addition* ki zot kont pou 2019-2021, i *due*, me selman sa *moratorium* ki nou ti met an plas 2021. Akoz bann defi ki *COVID-19* ti pe prezante. Ki zot annan la zot ziske, Zilyet 31 Zilyet pou zot fayle zot kont. Si

non zot pou vin an defo avek Lalwa.

Nou osi annan bann ka, kot i annan 3 ka ki nou pe *deal* avek la. Ki nou pe regard ladan. Kot i annan bann konplent, oubyen bann alegasyon. Labi pouwar par bann Manm sirtou dan Legzekitiv.

Refi akse a rikord, *mismanagement office*, resours, *funds*. Menm bann alegasyon koripsyon, labi, viktimizasyon vizavi bann atlet. So parey mon'n mansyonnen i annan 3 sa bann ka ki lo nou latab. So nou pe zis regarde, akoz i enportan ki mon fer mansyonnen Mr Speaker, ki i annan en tandans lekspektasyon ki Rezistrar i kapab entervenir dan tou ka ki tous bann lasosyasyon sportif.

E i enportan ki tou bann parti konsernan oubyen enterese zot regard byen ki Lalwa Asosyasyon i dir, kot bann ka ki, oubyen *what* bann lobligasyon legal ki reste lo bann asosyasyon ki anrezistre, e vizavi Rezistrar.

Akoz dan tou kou kot nenport dimoun, i fer i le fer konplent kont en lasosyasyon sportif, i annan sa tandans ki sa i vin tonm lo mon latab, mon lofis. *So as much as possible*, nou sey gid bann dimoun.

E se pour kwa parey Minis in mansyonnen osi, parti sa bann program sansibilizasyon ki nou'n komanse sa lannen, espesyalman ek sa nouvo Lalwa Lasosyasyon, nou pe kree sa *you know* sa konesans, sa *understanding* an term ki rol egzakt Rezistrar. E osi ki bann lobligasyon ki i sipoze, enpoze lo bann asosyasyon.

E osi *part of* sa osi, se ki relasyon i egziste avek Rezistrar avek NSC. Akoz i osi, par egzant annandler, bann *issues* ki vini, i annan en tandans kot i annan bann endividi i panse ki nou kapab donn - Rezistrar i kapab entervenir e donn direktiv NSC pou fer serten keksoz, *which is not the case*.

Akoz Lofis Rezistrar i egziste endependaman *from be it NSC*. An term son pouvwar, son fonksyon osi. I egziste endependaman osi *from* Minister Sportif.

So sa i enportan pou mwan mansyonnen, akoz i annan en pti pe sa konfizyon *out there*. Ki fer ki annan bokou ka ki menm an deor *Registration of Association Act* i ganny anmenn kot nou. E dimoun i vin enn pti pe fristre, ler zot kekfw zot pe ekspekte ki nou kapab enn pti pe plis ki nou kapab fer. So sa mon'n anvi

mansyonnen, ozordi Mr Speaker. *Thank you*.

MR SPEAKER

Mersi *Registrar*. Onorab siplemanter.?

HON PHILLIP ARISSOL

Mersi Mr Speaker. Mersi pour ou larepons Mrs Pierre. Eski Minis i kapab dir Lasanble si NSC, ouswa ou Minister i fer okenn swivi pou vwar si larzan ki lasosyasyon ou federasyon i gannyen, i ganny byen depanse?

E Minis mon ti a kontan konnen, ki pa, ki bann mezir pou asire ki sa bann keksoz i ganny sivre, e pa ariv ankor kot nou vwar bann Federasyon, ouswa bann lasosyasyon pe ganny *strike off*. Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon siplemanter. Mon pou les sa premye kestyon avek *CEO NSC*. Sa dezyenm kestyon ki nou pe fer pour ki i pa ariv ankor, kot nou kapab pou anpes *strike off*.

Me vwala mon plede ozordi, i depan lo zefor tou partener, akoz bann dimoun osi

tou. Kominike sportif. Nou merit, enn pti pe vizilan osi tou, ler Eleksyon i annan *meeting* zeneral ki ganny fer. Pou nou swazir lekel sa manm Egzekitif ki pe zer en disiplin.

I enportan e i annan bann dimoun osi, ki petet zot pa ale *meeting*, zot ti ava annan kek kontribisyon, pou zot fer pou anmennen, zot pa ale, akoz mon pa konnen kekfwa kiltirelman, bann dimoun kekfwa in les sa avek enn pti group.

Ouswa zot pa vwar, selman apre letan i annan bann difikilte, nou ti ava swete, parey Rezistrar in dir i annan en lotorite, ki vini ki vin donn lord. Be Lalwa par ler, ouswa si sa lasosyasyon Federasyon i annan en Konstitisyon li, ki'n anrezistre kot Rezistrar. I dapre sa Konstitisyon, e ki mannyer osi sanz sa Konstitisyon, i en tou faktor legal. Nou ki nou kapab fer se donn formasyon, donn bokou formasyon, apre travay pou nou kapab revwar ki mannyer kriter, kriter, standar avek bann lasosyasyon federasyon.

Si i ankor kot AG ki mannyer, nou kapab fer sa petet antre dan Lalwa *Act*, NSC. Ki nou ankor pe travay lo la. En nouvo *Act* pou mete li azour, tout a prenon kont, ki bann

standar enternasyonal ki mannyer sa i marse, an term gard lendepandans federasyon sportif. Fer sir ki sport i ganny run par son lasosyasyon. Son Federasyon, apre biznes prive tou.

Me selman Gouvernman i reste regilater. Ki mannyer nou pou fer sa, sa nou ankor pe, akoz nou osi tou dan term lokal pou nou annan sa kapasite nou ti kontan gannyen en *expert* sorti *Cyprus*, ki'n la dan pei detrwa semenn pase. Ki'n donn enn pti pe akoz zot ti kot nou ete detrwa lannen pase.

Prezan regarde kwa, e met dan konteks Sesel selman. Me nou bezwen selman al ver bann lasosyasyon Federasyon Komite Sportif, pou nou fer sa konversasyon. Nou bezwen kapab al fer sa konversasyon, regarde, annan en balans ki tou lede pe dir pou nou kapab zwenn dan milye, pou nou kapab fer standar regilasyon.

Tou lede i ava aksepte, pou nou kapab bouz devan. Be garanti ki pa pou arive, nou pa kapab donn sa kalite garanti, i depan lo aksyon bann endividi. I depan lo lekel aksyon endividi. Selman ou garanti si i annan okenn difikilte. Nou pou sey travay avek sirtou pou benefis bann atlet.

E mon ti ava kontan CEO Mr Speaker, i pran premye kestyon. Mersi.

MR SPEAKER

Mersi CEO.

CEO JEAN LARUE

Mersi Mr Speaker. Bonzour tou bann Manm Onorab, e mersi pou kestyon Onorab Arissol. Ou kestyon se swivi, ki fer sir poudir larzan i ganny byen depanse. Nou ki nou pe fer dan nou restriktirasyon dan Konsey Nasyonal pou Spor, se annan en zofisye ki nou apel sa en *compliance officer*. Akoz letan nou travay ansanm, anfe nou'n siny en *lettre d'entente* avek Rezistrar. En fason ki nou partaz lenformasyon, *share* sa lenformasyon ki nou, nou annan avek Rezistrar. En fason ki tou lede lorganizasyon, kantmenm nou travay endepandan, me solman nou konplemant kanmarad.

Nou kapab partaz sa lenformasyon kot i ed nou pou nou fer nou bann desizyon. An plis nou'n met an plas en striktir kot dan lepase bann Federasyon Lasosyasyon, zot napa larzan, zot ti al pran bann tiket avyon par egzansp, zot fer bann depans, apre zot vini zot dir ek NSC peye. E depi ozordi,

en pe letan pase nou'n fini dir zot non.

Bann lasosyasyon, bann landrwa ki vann tiket, bann lotel nou'n dir zot si NSC pa'n aprouve, NSC pa responsab. So sa i en bann fason, ki nou'n fer sir poudir prezan bann landrwa ki vann tiket, zot kontakte NSC ziske ou aprouve wi oubyen non depandan si nou annan sa finansman. So sa i en keksoz, konmsi in ede pour nou redwir. E *follow-up* letan zot napa larzan.

An plis i osi enportan ki nou pe demann bann Federasyon pou *update* zot bann Konstitisyon. I annan Konstitisyon ki date depi 1994, e ozordi keksoz in sanze. Alor letan nou pe koz bon gouvènanans, i enportan ki zot osi zot vin azour.

Me sa travay i annan apepre 3 mwan pase, kot nou ti zwenn ansanm avek bann Lasosyasyon Federasyon ansanm avek Rezistrar, kot nou'n met zot azour avek serten keksoz. E parey Rezistrar in fek dir la, zot bezwen *update* zot bann dokimantasyon avan le 31 Zilyet.

So i annan bann travay, ki pe ganny fer pou fer sir poudir nou met zot dan lord. So nou travay ansanm avek zot mersi.

MR SPEAKER

Mersi bon nou pou termin la pou sa kestyon. E nou pou pran poz. Nou a rebran travay 11.05. Mersi.

(BREAK)

MR SPEAKER

Bon permet mwan en moman pou adres *point of order* Onorab Aglae.

Mon'n pas en pe dan *Standing Orders* e sa ki mon'n vwar ki kapab aplikab se 36 (b) ki dir, "*A question shall not include the names of persons unless they be strictly necessary to render the question intelligible.*"

E mon krwar i dan lentera Lasanble pou nou evit nonm bann Manm oubyen manm piblik dan kestyon.

Dan sa ka mon krwar Onorab Loizeau ti'n kapab demann son kestyon avek menm lefe san mansyonn non Onorab Aglae, e Minis ti'n kapab parey i ti fer reponn kestyon ki i pa ganny ase *feedback from the public*.

Donk mon envit bann Manm pou pran *note* sa *Standing Order* e pou swiv li a lavenir. Mersi bokou.

Nou ava kontinyen avek kestyon e Onorab Pillay wi ou ki ou annan en *point of order*?

HON SEBASTIEN PILLAY

Wi Mr Speaker wi Onorab Georges mon'n arive. Mon krwar i byen ki ou'n fer referans avek 36 (b).

Me i annan en lot lord ki mon krwar Manm Lasanble i bezwen pran konsyans *ok e sase* an relasyon avek *imputation*. Sa ki ou'n dir i antyerman korek. Mon ti ava zis demann ou pou *extend* sa ki ou'n dir an relasyon avek *imputation*.

An relasyon avek si en kestyon i vini i fer referans avek en Manm Lasanble. Akoz si ou pe fer referans ek en Manm Lasanble, ou pe fer en *imputation* an relasyon ek son kestyon. Mon ti ava envit ou pou regard sa morso nou *Standing Order* ki *deal* avek *imputation* an relasyon avek en Manm Lasanble, avek Prezidan Larepiblik, an relasyon avek en Minis, an relasyon avek Sef Ziz.

MR SPEAKER

Non sa bann pwen ki ou'n mansyonnen i fer referans avek *conduct*. Silvouple Onorab mon krwar sa *ruling* ki mon'n donner i satisfè pou sa lokazyon, mersi!

Ok nou ava pran prosen kestyon ...

HON SEBASTIEN PILLAY*(Off-Mic)***MR SPEAKER**

... e silvouple! Onorab Pillay ou pa pou konmanse silvouple! Mon oule en pe lord dan Lasanble! Mersi.

Nou ava pran kestyon 105. E 105 i en kestyon ki mon'n mansyonnen mon krwar dan non Onorab Porice e Onorab Bistoquet pou poz son kestyon.

HON ROSIE BISTOQUET

Mersi Mr Speaker. Kestyon Onorab Porice i lir koumsa;

Pou ankouraz plis zenn pou partisip dan spor lo Praslin espesyalman dan distrik Baie Sainte Anne,

(a) Ki plan Minister i annan pour bann zenn atlet lo Praslin sirtou dan distrik Baie Sainte Anne?

Ki plan Minister pour Lenfrastriktir spesyalman pour *volleyball, judo, karate* e atletik an menm tan avek *swimming*?

E Mr Speaker mon oule profit sa lokazyon osi pou mon felisit Onorab Doyace Porice pou pran sa linisyativ avek en group dimoun Praslin, pou li devlop en *fitness trail* Marie-Jeanne Estate pou bann zabitan Praslin espesyalman ...

MR SPEAKER

Onorab mon ...

HON ROSIE BISTOQUET

Mersi e mersi Mr Speaker.

(APPLAUSE)**MR SPEAKER**

Onorab mon apresye ki ou'n apresye zefor Onorab Porice, selman ou devret demann mon aprouvasyon avan ou fer komanter ki an deor ou kestyon. Mersi.

HON ROSIE BISTOQUET

Mersi.

MR SPEAKER

Onorab Bistoquet mersi pou poz kestyon Onorab Porice.

Minis mon ava envit ou pou reponn silvouple.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon. Mr Speaker plis partisipasyon dan Spor par nou popilasyon, i enn parmi nou bann priyorite dan Minister Lazenés Sport ek Lafanmir.

E mon asire ki nou partaz sa avek Minister Lasante sirtou, e lezot Departman Gouvernman.

Kot NSC i annan en program idantifikasyon bann zenn talan, e program profesyonelizayon pou bann zenn atlet ki nou konmanse pou tou zenn dan Sesel enkli bann zenn lo Praslin - La Digue.

E resaman mon krwar nou'n kapab vwar nou bann zofisye ti lo Praslin ek La Digue.

Akoz se dan sa de lekol ki zot in fer pli byen dan sanpyonna atletik le 18 Zen. E la mon ti ava kontan felisit sa bann zenn atlet pou zot bann bon lakonplisman.

E dan sa program sa bann zofisye NSC zot in al pli lwen e zwenn ek bann paran tou, e regarde ki mannyer nou kapab zisteman anmenn plis partisipasyon, me selman annan bann program pou devlop zot talan plis. E travay konzwent avek Minister Ledikasyon pe entansifye, pou ki Spor dan lekol i ganny menm valer avek lezot size akademik. E mon konnen poudir Minis Valentin in pronons son lekor e osi tou lo kote lar osi tou.

E la mon ti ava swete lans lapel avek bann lasosyasyon ek Federasyon sportif pou fer en pti pe plis zot osi a kote nou, a kote NSC pou ede ogmant partisipasyon nou bann zenn dan spor.

Pou sa dezyenm kestyon Mr Speaker. Plan pou lefitir si i annan en fasilite en pti pe parey nou annan *Palais de Sport* lo Ile Eve obor *swimming pool*.

E ladan pou annan fasilite *judo, karate, volleyball, basketball* e si tou keksoz i al dapre nou plan nou pe mazin met li dan Bidze 2023. E mon ti ava profite pou remersye Onorab Porice avek sa son lekip pou bann bon kontribisyon pou ede elev spor lo Praslin Mr Speaker.

MR SPEAKER

Mersi Minis. Onorab Bistoquet ou annan siplemanter?

HON ROSIE BISTOQUET

Wi Mr Speaker i annan de siplemanter.

Minis konbyen letan i pou pran pou revwar sa bann lenfrastiktir? Sa i enn.

Apré dezyenm Minis ti annan dan lepase anba *India Grant* konsernan sa kort Marie-Jeanne Estate Baie Sainte Anne, eski i anann okenn lemformasyon lo la?

Apré ki pe arive konsernen sa *India Grant* pou fer sa proze? Mersi.

MR SPEAKER

Mersi. Wi *CEO NSC* i ava adres sa bann kestyon.

CEO JEAN LARUE

Mersi Mr Speaker Onorab pour sa kestyon.

Ou pe dir travay pe konmanse avek lakonpanyen oubyen nou *partenaire SIA* akoz zot ki annan bann teknisyen zot ki pe travay lo sa plan obor kot basen naze i ete.

E an plis ki sa nou'n deza konmans en konversasyon avek Federasyon Enternasyonal *judo*, akoz son Prezidan in deza fer en - pa en promes me selman zot anvi ed nou ek en fasilite kouver. E se pou sa rezon letan nou travay ek nou bann teknisyen nou ava ganny en nide kler ki kalite fasilite nou mete laba.

An se ki konsern lenformasyon kot Marie-Jeanne Estate sa plan *India Grant*, malerezman mon napa sa lenformasyon.

MR SPEAKER

Mersi. Mersi *CEO*. Nou ava kapab prezan pas lo prosen kestyon. E sa se kestyon 106 ki donn ou Onorab Sylvanne Lemiel. Onorab ou kestyon.

HON SYLVANNE LEMIEL

Mersi Mr Speaker. Bonzour Minis avek ou

delegasyon. Mon kestyon i al *comme* swivan;

Dan Bidze 2022 ti annan en sonm R3milyon ki ti'n ganny bidzete pou konmans sa *regional sport centre* Anse Royale.

Eski Minis i kapab enform sa Lasanble e osi bann *sportsman* Anse Royale ki zistans zot in arive pou lenplimantasyon sa proze? Mersi.

MR SPEAKER

Mersi. Minis repons.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon.

Mr Speaker ti annan en *meeting* ki ti ganny organize par *NSC* par Minister Finans e avek lenfrastruktir le 11 Avril sa lannen, pou nou kapab revwar devlopman sa sant sportif rezyonal e nouvo plan ti ganny diskite.

Sa plan in ganny e ganny sirkile e mon prezimen Onorab Lemiel in ganny en kopi e nou apresye Onorab Lemiel kontribisyon ki ou pe fer pou sa proze.

E swivan sa *meeting* Minis Finans avek mwan menm nou ti vizit sa fasilite Anse Royale pou pran bann desizyon ki konsern

Bidze pou sa proze. E nou'n vwar konstate, nou'n konstate ki proze i kapab konmanse sa lannen. Sirtou kort tenis avek fasilite *outdoor* lo sa bann kort *basketball* ki la *volleyball*.

E osi pou nou fer fasilite twalet pou bann atlet, pou sa bann spor e osi lezot dimoun ki deservi sa fasilite par egzans ki lo *game*, ki pou ganny fer Anse Royale e ki pe nou kontan akòz i aktivite sportif ki pe ganny bokou lentere nou bann dimoun.

E nou a pe esper laas lenfrastriktir prezan pou donn nou bann demarkasyon final, pou konn grander ki teren i kapab servi, akòz i annan en lanmar obor tou la.

E sa *complex* byento i ava pas devan *Cabinet* e *meeting* i ava ganny organize pou nou kapab prezant li avek Komite Sportif Anse Royale e bann dimoun dan zalantour pou nou agree lo en pe.

Me selman sa bann larestan deor i kapab a ganny fer sa lannen. Mersi Mr Speaker.

MR SPEAKER

Mersi. Onorab ou annan siplemanter?

HON SYLVANNE LEMIEL

Mersi *Minister*. Mr Speaker ki mwan mon ti ava kontan konnen, akòz Minis ou pe dir poudir ou krwar mon'n ganny en plan. Mon'n ganny en kopi en plan.

So i annan detrwa mwan pase, mon krwar si mon pa tronpe apepre 3 mwan pase, mon ti ganny en plan wi, me selman mannyer mon pe ganny en konpran in annan lamannman ki zot pe fer dan sa plan.

Petet mon ti ava kontan ozordi ou eksplik *sportsmen* Anse Royale egzakteman, mon pa konnen si ou pou kapab ou dir ou pe al met devan *Cabinet* avan, konmsi donn en apersi ki zot pe mazine anmennen dan sa *Sports Complex* e kwa ki pou nouvo ki zot pe mazine anmennen pou benefis *sportsmen* Anse Royale larezyon sid? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou sa bann leklersisman.

Mon pou pas laparol avek *CEO* ki annan en pe bann detay. Be selman sa plan li avek sa bann lenfrastriktir

sportif i pa tro sanze. Sa ki pe sanze akoz lazans lenfrastriktir bann demarkasyon avek grander. Se sa bann grander ki mno ava les *CEO* apre eksplike ki manner.

Me selman letan sa i bezwen pas devan *Cabinet* regarde, i pou bezwen retourn kot zabitan Anse Royale, retourn definitivman kot Onorab Lemiel sirtou partisipasyon pou kapab ansanm, ansanm nou oule deside lo kwa egzakteman ki bann diferan spor pou ki gannnen.

Me selman i annan apepre an mazorite bann disiplin sportif ki deza la. Me selman apre osi tou bann ki pa'n deza la..

Me selman mon ava les *CEO* donn en pti pe plis detay Mr Speaker. Mersi.

MR SPEAKER

Mersi. Mon pas laparol avek *CEO*.

CEO JEAN LARUE

Mersi Mr Speaker. Mersi Onorab pou ou keston. Premyerman i annan en laplenn futbol. Ki menm Federasyon Foutbol Sesel in pare pou travay avek *FIFA* pou fer sir nou met li lo la standar. Sa i premye.

E dezyenm i annan en *track* e nou oule fer li vin en 6 *lane track* - en *tartan track* e an plis kot ou vwar sa bout ki vir avek lanmar kot nou pou met *sitting facilities* avek son twalet.

Se pou sa rezon dernyen lenformasyon ki nou'n gannnen avek *SIA* letan zot fer sa *mapping*, zot vwar poudir lanmar i vin plis lo kote lo laplenn.

I vedir prezan nou pou bezwen zot pou bezwen ansanm reaziste bann fasilite sa fasilite laplenn pos li en pti pe plis an montan.

An menm tan nou fer provizyon annan nou en *multi-purpose court*.

Konmsi dimoun i kapab zwe *volleyball*, *basketball indoor*. E an menm tan deor nou oule kit sa kort *basketball* avek sa kort *volleyball* deor. Me selman reamenaz li, remet nouvo sirfas apre met nouvo lalimyer, akoz nou konnen dan lepase nou pe ganny problemm, zis rearanze, aranze me met lalimyer normal. E an menm tan osi fer sir poudir sa kort deor nou kapab zwe 3 kont 3 *basketball* ki ozordi bann zabitan pe demande.

An menm tan reamenaz sa tenis kort, *ok*. E osi revwar i annan en *gym* la, so i annan

dimoun ki enterese avek *gym* e refer li.

E lot keksoz ki nou pe demande annan provizyon se en basen naze. So sa i dan sa plan. E se sa bann keksoz nouvo dan sa *planning*.

Me ankor parey Minis pe dir *SIA* i ava redesinnen, remap li, met sa bann fasilite apre zot pou bezwen zwe avek lespas ki nou annan. Mersi.

MR SPEAKER

Mersi. En klarifikasyon Onorab wi.

HON SYLVANNE LEMIEL

Mersi Mr Speaker. Mersi *CEO* avek Minis. Mon kontan *CEO* ki nou'n nonm lo kote amenazman bann ki deza la.

Akoz Minis nou pe ganny pa mal problem sirtou ek sa zafer lalimyer lo laplenn futbol. Mon krwar tou le mwan mon pe anvoy en *email* kot *CEO*, ki zot bezwen vin aranze. Pour benefis bann foutboler silvouple *please* mon pa konnen si zot pe rankontre okenn problem avek sa zafer lalimyer, silvouple annou gete ki mannyer nou kapab adres sa en pti pe o pli vit posib.

Me par kont Minis mon konnen ou'n dir letan i pe al ganny met devan *Cabinet* li

menm, ki apre sa zabitan Anse Royale pou ganny sans vwar.

Eski ou pe mazine ki sa 3 milyon ekek ki i dan Bidze la, eski ou pe plan i ki pou konplet sa proze an antye parey son plan i ete?

Or ou pe mazin bidzet larzan ankor pour lannen prosenn pou nou kapab nou konplet li. E apre si in ganny *approval Cabinet* lannen prosenn sanmenm sa lannen i en zabitan Anse Royale i aksepte ki mannyer i ete nou konmanse, eski ou annan en *timeframe* petet kan ki ou pe mazine poudir sa fasilite li menm i pare pou dimoun kapab servi li?

E menm kot nou kapab akerir bann par egzantp futbol, desantraliz sa bann *matches* ki ganny fer, eski ou annan en *timeframe* petet kan ki sa fasilite i kapab ganny konplete?

MR SPEAKER

Mersi Onorab. Minis ou ava eklersi sa de pwen silvouple.

MINISTER MARIE-CELINE ZIALOR

Mersi Mr Speaker. Mersi Onorab pou keston.

Dezyenm pwen lo plan spesifik mon ava les *CEO* adrese. Lo premye konsernan

Bidze, vwala rezon akoz nou ti anmenn Minis Finans avek son lekip pou al regarde e pou evalye.

Nou - sa 3milyon i definitivman pa pou kapab fer sa *complex*. Me selman avek sa larzan parey mon ti pe dir kort tenis avek kort deor, twalet sa i kapab ganny fer, i kapab ganny fer sa lannen.

Larestan i ankor annan nou annan en *meeting* lenfrastriktir sportif ki nou pe fer sa semenn ansanm. Nou fer *meeting* en fwa par mwan avek Minis Finans pou konsernan lenfrastriktir spor avek en pe lezot lenfrastriktir, pou nou kapab met azour pou fer sir ki nou annan en fason evalye.

En fason apre donn sipor ki sa bann lenfrastriktir i ganny fer. E en pti pe - mon pa konnen si mon'n reponn sa premye kestyon selman *CEO* i ava kapab donn detay lo sa dezyenm. Mersi Mr Speaker.

MR SPEAKER

Mersi. *CEO*.

CEO JEAN LARUE

Mersi Mr Speaker. Mersi Onorab. Keksoz ki nou kapab fer imedyatman se travay lo sa de kort *volleyball - basketball* akoz deswit nou kapab parey

mon pe dir rearanz met nouvo lalimyer.

So nou kapab servi en pe sa 3.5 milyon deswit aranz sa bann lalimyer, aranz twalet, aranz sa bann kort ki deor. Mersi.

MR SPEAKER

Mersi. Onorab Henrie, ou kestyon.

HON GERVAIS HENRIE

Mersi Mr Speaker. bonzour tou dimoun. Mr Speaker sa sonm ki'n ganny mansyonnen dan sa kestyon, i form parti en *package* finansyel ki Lasanble Nasyonal ti aprouve tar lannen pase, en total R11 milyon ki ladan ti annan 2milyon pou renovasyon Stad Linite, 2 milyon pou renovasyon *Palais de Sport*, 3.75milyon pou renovasyon *Anse Royale Sport Complex*, 1.75milyon pou renovasyon *La Digue Sports Complex*. E en alokasyon 1.5milyon pou renovasyon bann lezot fasilite sportif ki mon prezimen kapab tonm dan bann distrik.

Now nou'n ariv mwan *juillet* in fini la. Out ziska Desanm 5 mwan. Mon en pe trakase pou dir ki i pou annan tre pe ki nou pou kapab fer, ki nou pou kapab vwar tanzib ek lizye avan lafen lannen.

So mon pe demann *panel*, akoz *so far* mon'n vwar zis en reportaz lo televizyon konsernen *Palais de Sport*.

So i traka lekel pou asire nou vwar en keksoz avek nou lizye di-si Desanm?

Eski i Lazans Lenfrastriktir, eski i annan NSC, eski Minis Finans eski Minister Spor? Silvouple.

MR SPEAKER

Mersi Onorab. Ou Kestyon in depas size *Sports Complex* Anse Royale. Me selman Minis ou kapab zis adres son dernyen pwen lekel ki pe okip sa bann program?

MINISTER MARIE-CELINE ZIALOR

Mersi Mr Speaker. Mersi Onorab pou kestyon konsern. Nou osi nou tre, tre konsernen, se pou se la rezon akoz nou bezwen travay ansanm. I pa kapab zis en lenstitisyon ki pran sarz sa.

E mon ava dir ou akoz. Akoz kot NSC letan nou ti pe revwar sa lannen, nou ankor pe revwar ki mannyer fason nou pe zer keksoz.

Lenfrastriktir pou *maintain* li, pou konstriksiyon i en febles. I en gro febles. Gro febles sa.

E letan prezan nou pe aranz febles nou bezwen fer sir nou pe lo fondasyon ki nou pe fer lo la i bon.

E vwala akoz nou ti bezwen demann sipor avek sa bann lezot Lazans, pandan ki nou pe refer sa bout kote *management* kot NSC. Nou pe rod sipor led avek lezot Lazans ki donn nou.

Nou napa par egzanz arsitek enzenyer nou kot NSC.

Nou napa sa bann dimoun napa kapasite. Nou rod sa bann lasistans nou fer en Komite ki zwenn tou le mwan. I *chair* par Minis Finans - kot *Chair* pa mwan. Nou fer pou nou fer sir zisteman ki larzan ki dan Bidze regarde revwar ki mannyer. E nou'n *extend* sa pou Minister an antye.

Akoz antye dan Minister kot nou annan sa bann defayans pou nou kapab zisteman fer sir ki nou annan en pti pe lizye lo ki mannyer pe arive.

I annan en pe lenformasyon lo kote sa bann lezot lenfrastriktir, me selman Mr Speaker in dir nou pe koz zis lo Anse Royale.

I annan travay ki pe ganny fer li. Parfwa letan ou konnen ou dan ou pe fouy fondasyon pou ou kapab fer monte sa *building*, person pa vwar. E

nou dir i pa vizib ou pa pe fer nanryen. Nou pe fer. Nou bezwen fer en bon pe travay fondasyon, pou fer sir ki nou pe –

Ler nou pe profesyonnalizm spor li osi tou *sports management* ki enkli sa tou ladan ki nou kapab fer. Pou lemoman nou pe ganny sipor en pti pe partou. Mon ti ava kontan dir mersi bokou bann dimoun ki siporte, pou nou kapab arive met nou bann lenfrastruktir lo en nivo. E i pou pran en pe letan. Mon pou bezwen dir i pou pran en pe letan pou nou kapab fer li ariv kot nou bezwen arive. Mersi Mr Speaker.

MR SPEAKER

Mersi. Pou rezon letan mon pou pas lo zis en kestyon. E sa se kestyon 107 dan non Onorab Rocky Uranie, ki pa prezan dan Lasanble. E son kestyon pou ganny poze par Onorab Aglae.

HON EGBERT AGLAE

Mersi Mr Speaker. bonzour Minis e le de lo *panel CEO* avek *PS*.

Kestyon demande par Onorab Rocky Uranie;

Swivan vizit Minis an Desanm 2020 e osi vizit Komite Lasanble Nasyonal pou Medya,

Lazenes e Kiltir an 2021, nou ti vwar ki leta ki *Sports Complex* La Digue i ladan, i pa enn ki akseptab, vi ki sa *complex* i ganny servi par 2 zil prensipal La Digue e osi Praslin pour aktivite sportif, san bliy osi zanfan lekol.

Ki plan ou Minister kot i konsern sa *complex*? Mersi.

MR SPEAKER

Mersi Onorab. Minis ou repons.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon.

Mr Speaker mon kontan ki Onorab Uranie in fer sorti ki mon ti vizit fasilite spor La Digue an Desanm 2020. E ki leta sa *complex* pa ti akseptab.

Sa vizit ti zis en mwan, apre ki nou tou nou ti'n ganny apwente Minis dan nouvo Gouvernman.

Ki vedir pe avoue ki son Gouvernman pa ti'n pran Komite Sportif La Digue an konsiderasyon.

(APPLAUSE)

MINISTER MARIE-CELINE ZIALOR

E mon ti ava kontan Mr Speaker pou osi enform

Lasanble, ki ti annan en lekip sorti kot Minister ki ti La Digue ant le 30 e le 01 Zilyet e *CEO* ti form parti *NSC* delegasyon e de *meeting* ti ganny fer pou zisteman diskrit plan pou sa *complex* e osi lezot konsern *sport* lo La Digue.

E Onorab Uranie pa ti vin *meeting*. I ti anvoy en reprezantan tre byen nou apresye. Me mon ti ava mazine ki son reprezantan ti ava vin donn li en kontrandi lo sa *meeting*.

Nou Mr Speaker nou rekonnet talan e zefor Komite Sportif lo La Digue e mazine ki La Digue in raport plis lakoup ki nenport ki lezot lekol dan katriyenm edisyon Sanpyonna Atletik bann Lekol.

E ankor nou oule felisit zot e pou zot benefis mon ti ava donn sa bann lenformasyon souvan.

Tender pou ranplas twatir in fini ganny fer i apepre en sonm R1.2milyon. E i ava ganny fer byento. Diskisyon prevwar konstri nouvo fasilite in ganny fer avek *stakeholders* lo La Digue detruwa semenn pase e arsitek la i pe prepar nou nouvo plan.

Tout an prenon kont demann zabitan avek bann *sportsmen* La Digue ki nou ti remont ankor La Digue, mon ti

monte mwan menm nou zwenn Komite Sportif demann zot egzaktman ki bann lenfrastruktir, ki bann disiplin, ki nou anvi vwar pou nou zisteman kapab diskrit lo kote Bidze, e pou kapab nobou kapab vin en plan.

E i ti retournen La Digue pou nou kapab al regard en pti git ki pe arive en pti git ki mannyer nou pou bouz devan. Mersi Mr Speaker.

MR SPEAKER

Mersi. Siplemanter Onorab.

HON EGBERT AGLAE

Mersi Minis pou ou larepons. Zis pou lo rikord. Onorab Uranie in ganny en pti rezimen vizit ki ti ganny fer le 30 Zen par son *clerk*.

Minis dan sa vizit ti fer resorti baze lo Bidze, ti annan 3.5 milyon ki'n ganny donner. E enn ladan sete pou osi kapab *upgrade* sa twatir parey ou'n dir ki *tender*.

Eski larestan larzan ki'n ganny bidzete pou asire pou fer bann lezot travay ki reste, ki konpri baze sepa ki tonm dakor pandan sa vizit? E eski zot anvizaze fini sa travay sa lannen menm?

Dezyenmman Minis kot i konsern ti annan en diskisyon

kot konsern fasilite *grand stand* avek bann fasilite entern. Eski diskisyon avek sa lakonpanyen *GICC* in fini materyalize, pou kapab antreprann bann travay neserer? An vi ki *GICC* i deza lo La Digue avek lopital. Mersi.

MR SPEAKER

Mersi. Minis repons.

MINISTER MARIE-CELINE ZIALOR

Mersi Mr Speaker. Mersi Onorab pou Kestyon Siplemanter. Mon ti ava kontan sa bann detay ki *CEO Larue* i ava kapab donnen. Mersi.

MR SPEAKER

Mersi. *CEO*.

CEO JEAN LARUE

Mersi Mr Speaker. Mersi Onorab. Travay wi annefe *tender* pou twatir ti frenmen le 14 *juillet* ok? Savedir tre byento nou ava konnen lekel sa lakonpanyen ki pou tir sa bann twatir e remete nouvo.

Larestan larzan nou pou travay pou rearanz re-amenaz sa tenis kort. E sa, bann zabitan in demann nou lefe tol toultan ti pe sorti lo kort. So rearanz twatir e apre *upgrade* sa tenis kort e mon krwar i pa pou

- nou kapab servi sanmenm sa larzan.

An plis zot in demann nou osi pou fer *fencing* pou *fence* sa tenis kort. So sa osi i ava vedir ki en pe sa larzan i ava ganny depanse. An menm tan zot in dir nou zot oule fer parey en *fitness trail*, so sa osi i ava servi masin konmsi pou grate pou met li - ok?

Aprè zot in dir nou osi dan zot plan, zot anvi en *indoor gym* dan zot plan. E menm zot in mansyonnen ki zot ti ava kontan *NSC* i *provide* zot ek en *physio therapist*, zot dir aköz lasistans *physio therapist* ki sorti Praslin tou le Merkrede.

Me selman La Digue lefe ki i annan en kantite atlet. So mon krwar dan sa *gym* nou ava kapab fer sir ki nou'n ganny en dimoun en *physio therapist*.

Konsernen *grand stand* kot sa dormitwar oubyen dortwar, wi konversasyon avek *GICC* pe kontinyen. So pou lemoman nou napa en plan konkret, me solman sa konversasyon pe kontinyen. Mersi.

MR SPEAKER

Mersi. Bon nou bezwen - mon pou bezwen vitman kestyon silvouple gard li lo *Sports Complex* La Digue, Onorab Pillay.

HON SEBASTIEN PILLAY

Mersi Mr Speaker bonzour. Bonzour Minis ek ou delegasyon. Bonzour dimoun a lekout.

Mr Speaker prenon kont ki nouvo Gouvernman i la, eski Minis i kapab dir nou *in terms of* en *timeframe*, kan eski zabitan La Digue i kapab vwar baze lo plan ki zot annan, kan eski zabitan La Digue pou kapab vwar sa bann keksoz in fini konplete, oubyen parti sa bann keksoz pou ganny konplete, zot kapab vwar en amelyorasyon an se ki konsern sa *complex*, akoz lo *Order Paper* mon pa oule *preempt* deba lo en lot size, i annan en Mosyon ki *relate* avek sa ki nou pe diskite la, en Mosyon anmennen par Onorab Wavel Woodcock ki pa dan Lasanble ozordi, ki koz zisteman lo performans bann atlet. (Eski Onorab Larue Mr Speaker i kapab reste trankil)?

MR SPEAKER

Ale Onorab. Fini ou kestyon silvouple.

HON SEBASTIEN PILLAY

Aret malelve dan Lasanble!

MR SPEAKER

Fini ou kestyon silvouple.

(Off-Mic)

HON SEBASTIEN PILLAY

So eski Minis i kapab donn nou en *timeframe* lo kan sa bann keksoz pou ganny fer, akoz mon pe swiv lo kestyon Onorab Henrie vizavi konsern ki ou Minis e Onorab Henrie ou'n eksprimen, vizavi larzan ki zot annan redevlopman sa bann proze.

MR SPEAKER

Mersi. Minis ou repons?

MINISTER MARIE-CELINE ZIALOR

Mersi Mr Speaker. mon pou lo kote *timeframe*, mon pou pas laparol avek *CEO* ki zot pe fer plan loperasyon pour *timeframe*.

Selman mon ti ava kontan fer en lapel prenon kont pran loportinite sa kestyon. Mersi bokou Onorab Pillay pou lev sa pwen.

Ler nou met en *timeframe* e nou dir pou konplete par petet sa mwan ouswa lot mwan, i pou osi depan lo volonte. Mon pou repet ankor sa, tou dimoun ki vremen senser pou zot kapab vin devan, ouswa pou zot pa retard proze ouswa parfwa zisteman nou ganny dir akoz

nouvo Gouvernman ki pe fer, pa fer.

Akoz nou ganny pa mal difikilte osi tou avek bann retar bann proze lo kote sportif.

Akoz Mr Speaker taler Onorab Henrie in demann sa tou, enn parmi - pa zis mank kapasite nou bann defi, se bann dimoun ki fer ekspre pa fer - zot fer ekspre pa fer.

Be letan zot pa fer zot pe mazine pou zis Gouvernman pou *fail* atlet sportif osi tou. Mon pa pe koz sa aköz zis nou anvi rod leskiz, i en fe sa. E letan lekip e nou pe fer sanmenm bann lekip ki pe monte, nou pe al rod bann fe, sa i parmi bann defi ki lekip i retourn avek rapor i dir nou ki nou gannyen sa bann difikilte.

Mon pe lans lapel la pou dir *sport* i bon pou nou lasante, spor i bon nou lenfrastruktir nou bezwen pou nou met an plas.

Nou'n ganny en defi la avek tou sa bann lenfrastruktir pou nou met an plas nou, nou annan langazman pou nou fer li avek nou leker 100poursan, e nou anvi ki annou donn nou en pti koudmen, silvouple pa bezwen met retar nou bann proze ki nou kapab fer byen.

E pou lo kote *timeframe* mon ava les CEO Larue Mr Speaker reponn. Mersi.

MR SPEAKER

CEO wi.

CEO JEAN LARUE

Mersi Mr Speaker. *Timeframe* se ki parey mon'n dir zot le 14 *juillet* tender in fini fermen.

E nou espekte ki travay i ava konmanse byento osi tou avek sa twatir.

E letan nou travay an lekip teknisyen sorti ki SIA pe mont La Digue, tou le de semenn zis pou al verifeye poudir sa proze kote i ete. Savedir NSC prezan nou resevwar lenformasyon ki donn nou kote, ki semen kote, nou ete avek sa bann travay. Mersi.

MR SPEAKER

Onorab Pillay in reponn en bout ou kestyon. Mon konpran i napa lenformasyon lo *timeframe*. CEO kestyon Onorab Pillay si i kapab ganny en *timeframe* pou dimoun La Digue kapab benefisye avek sa bann proze.

Eski ou kapab zis donn en fraz kan si ou pa kapab donn en *timeframe* zis dir mon silvouple ou pa kapab e nou ava aksepte sa.

CEO JEAN LARUE

Mersi Mr Speaker. Mon bezwen travay ek teknisyen SIA pou mon kapab ganny en *timeframe*. Mersi.

MR SPEAKER

Mersi, mon ava pran kestyon Onorab Larue.

HON FLORY LARUE

Bonzour Mr Speaker. Bonzour Minis ek ou delegasyon.

Minis, eski ou kapab dir nou ki lefe ki nou pe fer renovasyon otour Sesel, me la nou pe koz spesifik lo La Digue eski nou pe regard standar e nivo renovasyon pe ganny fer, pou ki nou kapab delivre en nivo kalite atlet ki pei pe rode, lefe nou pe koz lo bann meday Olenpik, alor eski bann lenfrastruktir ki pe ganny renouvle i lo nivo enternasyonal pou nou kapab fer sa bann kalite atlet?

Mr Speaker atraver ou Onorab Pillay pa ti la bomaten li en zournen, in al vwar Prezidan Kenyatta, Onorab Woodcock osi pe fer parey...

(Mic switched off)

MR SPEAKER

Onorab mon pa pe antre ladan. Silvouple pa gat letan Lasanble. Minis ou kapab

reponn sa kestyon lo standar *Sport Complex La Digue* silvouple. CEO pou reponn? Minis.

MINISTER MARIE-CELINE ZIALOR

Wi mersi Mr Speaker. Mersi Onorab pou ou kestyon. Standar definitivman wi vwala akoz par ler i pran nou en pti pe plis letan pou nou kapab vin avek en plan, ouswa pou nou kapab vin avek bann lenfrastruktir, parey Onorab Henrie taler in demann nou, pou vwar vizibleman. Akoz sa i bann kestyon ki nou demande.

Nou pe osi regard sa bann ki'n deza fini fer. I annan bann lenfrastruktir ki'n fek fini fer, bann atlet solman pe konplent pe dir ou sa i pa standar. Nou pe fer letour partou nou pe regarde pou nou zisteman pou nou fer li, met li lo standar, e kot nou napa kapasite bann dimoun ki kapab ed nou pou nou met lo standar. Mersi.

MR SPEAKER

Mersi nou ava pas lo prosen kestyon e sa se nimero 109 Onorab Kelly Samynadin.

HON KELLY SAMYNADIN

Mersi Mr Speaker. Bonzour Minis bonzour PS e CEO.

Mr Speaker avan mon konmanse avan mon demann mon kestyon, mon ti ava voudre avek ou permisyon bomaten nou fek aprann lanmor Mr Peter Jules. En vedet en dimoun ki'n kontribye en kantite dan Sesel.

So lapar *Caucus LDS*, nou ti a kontan *extend* nou senpati nou kondoleans lafanmir Mr Peter Jules.

Minis mon kestyon i lir koumsa, eski Minis i kapab dir avek Lasanble, an vi ki Federasyon Foutbol Sesel pe opte pour *host* lakoup mondyal *FIFA* pour *beach soccer*;

Premyerman eski Sesel in pare e ekipe an term resours e lenfrastruktir pour *host* en tel tournwa?

E dezyenmman an term lekip, eski nou lekip Nasyonal pe ganny lantrennman nesese e sifizan an preparasyon pour sa tournwa? Mersi.

MR SPEAKER

Mersi. Minis ou repons.

MINISTER MARIE-CELINE ZIALOR

Mersi Mr Speaker. Mersi Onorab pou ou kestyon - premye parti.

Mr Speaker Federasyon in pare depi ki i ti anonse ki i pou *bid*. I pa ankor gannyen *bid*.

Fotespere nou gannyen nou pe espere e in soumet tou bann garanti - *FIFA* ti demann bann garanti depi Zanvye sa lannen.

E mon ti ava kontan remersye tou bann Departman i annan en kantite Departman ki'n bezwen ede pou nou kapab soumet sa *bid*.

E lo kote lenfrastruktir ki pou servi, i deza annan en *pitch* Roche Caiman pou ganny servi pou lantrennman e pou annan *pitch* ki demontab ki sa *FIFA* pou vin avek zot ki pou anmennen avek zot bann zofisye.

E lezot resours i konsern plis pou lozistik. Sa ki Federasyon in rod en konsiltan pou ede prepare e ki nou osi ganny soumet avek *FIFA*.

Dezyenm parti kestyon Mr Speaker, lekip Nasyonal in fini ganny selekte e mon aprann ki Federasyon Foutbol in fini rod en *head coach* e i annan en plan ki'n met an plas e in osi met an plas en Komite Teknik. Mersi Mr Speaker.

MR SPEAKER

Mersi. Siplemanter Onorab?

HON KELLY SAMYNADIN

Mersi Mr Speaker. Minis eski i annan okenn form lantrennman ki pou ganny fer

enternasyonalman pou kapab permit nou lekip nasyonal ganny sifizaman *exposure* avan sa tournwa?

E dezyenman eski i annan okenn *issues* mazer avek nou *beach soccer arena* aktyel ki Minister oubyen NSC i bezwen adrese?

E eski Gouvernman pe mazin *venture* dan konstriksyon en lot *beach soccer arena*, avek bi pou ankouraz e promouvwar plis konpetisyon e *exposure* enternasyonal dan sa *sport*? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mon pou pas laparol avek Sekreter Prensipal. Akoz li ki pe lyez direk avek sa proze plito, pou li kapab reponn bann kestyon. Mersi.

MR SPEAKER

Wi PS Jean-Louis.

PS RALPH JEAN-LOUIS

Mersi Mr Speaker. Bonzour tou Onorab. Lo kote lenfrastruktir parey Minis in dir, sa *demountable stadium* ki zot pou vin avek *provided by FIFA*.

Plan se ler sa *beach soccer* si nou ganny sa *bid*, se pou separ li an de. i annan plan pou anvoy en bout Praslin. E menm en bout La Digue. Kot sa *actual beach soccer arena* i ete, i napa en problemm avek. Annefe i pou *host* en *match* enternasyonal sa Sanmdi kot Sesel pe zwe kont Madagascar *Afcon Qualifiers*.

E li i pou ganny servi konman en *training pitch* pou sa konpetisyon si nou ganny sa *bid*.

Training aletranze. Definitivman. Mon pa ni anvi nonm lakantite *match* zot pe *plan* pou zwe. Me dapre *Chairman* Federasyon ki mon'n koz, avek i en size ki nou'n koz lo la tanzantan. E pe mazin en bon pe *match* enternasyonal, e menm si i kapab anvoy sa lekip plase aletranze, bann landrwa kot *beach soccer* i en pe popiler parey *Portugal*.

E an se moman nou annan en *coach - top coach* ki dan pei, sa *coach* ki ti ganny meday lor avek tim *Russian Union Federation* la 2021 ki dan pei ki pe asiste Federasyon Foutbol e zot pe sey ganny li dan *technical advisor* pou asiste sa tim. Akoz si nou ganny sa *bid* sa konpetisyon pou fer lannen 2023 petet an Septanm.

Akoz i annan en pe letan ki nou pe espere - menm

Foreign Affairs tou lazournen pe kontakte biro pe gete kan pou anonse, kan pou anonse.

E dernyen lenformasyon ki nou annan se i sipoze - lanons i sipoze ganny fer an Septanm sa lannen. Mersi.

MR SPEAKER

Mersi. Mon ava pas lo enn de siplemanter vitman. Onorab Pillay wi?

HON SEBASTIEN PILLAY

Mersi Mr Speaker. Mr Speaker zis permet mon vitman pou zwenn avek mon koleg avek lot kote latab ki mansyonn depar Mr Peter Jules. Mon krwar Mr Jean-Louis i konn tre byen en dimoun ki nou ti konn li tre byen.

I en nouvel vreman tris e tou nou senpati avek son fanmir. E avek sa ki pe pase tanzantan ler ou tann sa bann lanmor i en keksoz trakasan.

Mr Speaker, mon ti ava kontan demann Minis lefe ki *beach soccer* pe pran pe sey ganny en souf lavi Sesel.

Eski NSC in konsider lezot fason siport bann lekip *beach soccer* ki pe fer sa aktivite, e pou ankouraz plis zenn pou fer li? E an relasyon avek sa fasilite ki nou annan ozordi, mon'n tann PS dir fasilite i *ok*.

Eski zot annan plan fer serten *touch up*, serten pti renovasyon pou fer fasilite - konmsi pou gard li lo sa nivo e pa espere keksoz i sa. Akoz mon'n ganny sans *attend* detrwa *match* laba.

E pou lekip nasyonal, eski nou pe *work out* en fason vi pou nou ankouraz bann partisipan bann partisipan dan *beach soccer*, eski nou pou fer en fason pou siport sa bann atlet ler pou zot kapab vin *training*, pou zot kapab partisip dan bann *training camp*? Akoz sa in ganny difikilte toultan vizavi atlet ler pou deplase avek zot landrwa travay. Mersi Mr Speaker.

MR SPEAKER

Mersi. Minis repons *please*.

MINISTER MARIE-CELINE ZIALOR

Mersi Mr Speaker. Mon ti pou envit PS avek CEO tou le de mon mazine premye kestyon i ava pou NSC.

Me selman zis pou mansyonnen Mr Speaker, Federasyon Foutbol i enn parmi enn ki pli byen ganny finanse enternasyonalman, e avek nou pe resours ki nou annan kot NSC nou, nou prefere petet

regard bann lezot ki napa sa kantite mwayen.

E *beach soccer* i konmans vin popiler wi. E sitou bann foutbol bann madanm osi tou. *FIFA* i fer kontribisyon finansyel kot Federasyon Foutbol. Byensir nou, nou travay avek zot, pou nou regarde ki mannyer nou anmenn sa diskisyon pli pre avek zot.

Me si i annan okenn sipor kot *NSC CEO* i ava adrese. E mon mazine sa de lezot kestyon *PS* i kapab pran. Mersi Mr Speaker

MR SPEAKER

Mersi wi. *PS* ou ava pran laparol.

PS RALPH JEAN-LOUIS

Mersi Mr Speaker. Lo kote lekip li menm Onorab plan Federasyon se pran en group zwer met zot *fulltime* e zot ganny zot saler tou zot bann benefis pou sa 1an, pou prepare pou sa zwe. Parey mon dir ti annan zot pe mazin bann plasman petet 3 mwan 6 mwan aletranze, kot zot ganny *as much game practice as possible*, pou zot pare pou sa konpetisyon. Mersi Mr Speaker.

MR SPEAKER

Mersi. Mon a pran kestyon Onorab Roucou.

HON MICHEL ROUCOU

Mersi Mr Speaker. Minis mon konnen ou'n dir poudir *FIFA* pe finans laplipar bann - pour sa aktivite.

Eski Gouvernman li menm li i annan okenn depans ki i pou bezwen fer?

Aprè osi zot in dir pou dir se ki zot in fini selekte en *head coach*. Si ou kapab dir nou lekel silvouple? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Sa dezyenm kestyon mon ava les avek *PS* detay.

Lo kote *expenses* ki Gouvernman i en bon pe parey nou pe dir *in kind*. Par egzanz mon ava donn ou pour Lasante. Akoz ou bezwen annan fasilite lasante ki la ki vyab. Be i deza dan Bidze Lasante pou fer sa.

E tou keksoz ki ekstra i *FIFA* ki pe finanse e osi tou adisyonnèl se Federasyon Foutbol antyerman ki pe finans pou sa.

Larestan bann lozistik, *NSC* ki byensir i ava ed en pe avek lozistik transpor ensidswit ki i pou fer e anmezir ki nou vin pli pre nou ganny sa *bid*, sa osi

tou sa plan avek sa konsiltan I ava probableman asize avek bann dimoun.

E nou pe regarde i annan plis benefis kot nou kapab ganny plis an term ekonomik sirtou avek sa osi tou. E i enn parmi bann mezir ki ansanm avek Minister Finans, nou a pe kalkile pou nou kapab annan en formel syantifik pou nou kapab devwale.

So pe demann lo depans i pou annan me depans pa adisyonnèl ki deza la dan Bidze. Mersi.

MR SPEAKER

Mersi. Onorab Monthy ou ti'n lev ou lanmen pou en kestyon?

HON PHILIP MONTHY

Wi Mr Speaker mersi. Mon kestyon in parsyelman ganny adrese.

Me selman zis pou al en pti pe pli an detay, eski zot pe mazin - mon konnen zot in nonm anvoy lo Praslin - La Digue osi sa fasilite. Me i annan serten demann dan bann lezot distrik lo Mahe. Menm si pa en *arena* grander sa enn Roche Caiman, lo en nivo en pe pli pti,

Eski zot pe mazin desantraliz sa sport en pe lo Mahe, petet dan sid, annan en

arena? Akoz mwan dan distrik, menm si nou napa lans.

I annan en biznesmenn ki'n montre lentere, nou annan en lespas pou li kre enn sa pti *arena*. Eski zot pare pou donn bann sipor pou ki sa i kapab arive? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pou ou sizesyon, kestyon. Definitivman. Byensir, si i annan sirtou nou konnen nou pe fer konpetisyon lenfrastruktir sport teres - Sesel i ptipti, avek lezot bezwen dan pei.

E si i annan en fasilite ki sa teren i pou NSC, definitivman nou kontan *public private partnership*. Sa bann partenarya, absoliman. Si nou annan nou ti a byen swete. Mersi bokou davans Onorab e mon a pas laparol avek PS pou lot kestyon. Mersi.

MR SPEAKER

PS pou kontinyen adrese.

PS RALPH JEAN-LOUIS

Mersi Mr Speaker. Parey Minis in dir, definitivman nou kapab

asiste e nou kapab koz avek Federasyon *Football*, an menm tan *NSC* osi i kapab vini.

Mon pou tous kestyon ki Onorab Roucou ti'n demande ki nou'n mank li en pe. *Head coach*. An se moman i annan en *head coach* lokal ki pe travay avek lekip e sa msye ki'n vini i pou akt koman en *technical advisor* pour lemoman, antretan ki zot annan diskisyon avek Federasyon, si li i pou *take over national team full time*. Mersi Mr Speaker.

MR SPEAKER

Mersi *PS*. Bon nou pou aret sa kestyon la akoz nou bezwen pas lo *PNQ* e mon pe prezimen pou fini 12.30. So, mon ava remersye Minis ek son delegasyon e mon a swet zot bon depar e bonn kontinyasyon. Mersi.

Nou a pran en pti *pause* pou *sanitizing*.

(technical break)

MR SPEAKER

Bon, mon pa vwar delegasyon la. Avan mon al *PNQ*, mon ti annan en Kestyon Irzan lo ki ti'n ganny demande. Mon pa'n kapab met li lo *Order Paper* akoz sa *meeting*. Mon konsidere ti annan en valer dan lizans sa kestyon akoz

kondisyon. E mon'n envit Onorab Lemiel, ki ti met sa kestyon pou li anvoy son kestyon an ekrir kot Minis pou demann en repons an ekrir. E osi mon oule donn li posibilite pou li met son kestyon lo rikord Lasanble.

E si i annan en repons ki sorti kot Minis, nou a kapab partaz ek Lasanble. Onorab Lemiel ou kapab fer ou leksplikasyon.

HON SYLVANNE LEMIEL

Mersi Mr Speaker. Bonzour, mon a *welcome* Minis ki'n antre avek son delegasyon. E bonzour tou bann dimoun ki a lekout. Mr Speaker, mersi pou ou *allow* mwan, pou mon kapab donn en leksplikasyon pou mon Kestyon Irzan ki mon ti pe met devan Lasanble ozordi.

Distrik Anse Royale li menm, pe rankontre bokou problemm avek bann pye dibwa danzere lo later Gouvernman, enkli lo later prive, obor semen e dan diferan kontan ki pe menas lavi propriyete e bann zabitan.

La avek sa vandswet mon ti'n vwar li i enportan pou mwan kapab met sa kestyon devan Minis Lanvironnman, akoz nou pe ganny pa mal problemm kot letan ou anvoy kes kot en Minister, i ganny

anvoye kot en lot, kot en lot e apre petet ou ganny dir ki petet i pa tro responsabilite personn.

So, mwan keston li menm ki mon ti'n met devan Lasanble pou Minis ti al *comme swivan*; eski Minis pou Lanvironnman i kapab donn en leksplikasyon detaye, lekel ki responsab pou koup pye dibwa danzere lo later Gouvernman, ki en menas pou lavi e propriyete dimoun?

Dezyenmman, ki aksyon ki Minister Lanvironnman i kapab pran avek bann propriyeter later prive, ki les later abandonnen e pa koup pye dibwa danzere ki poz danze lezot dimoun?

Bon Mr Speaker, mon espere ki - i domaz Minis pa la, me selman mon espere ki byento nou ava kapab ganny en larepons pou zabitan mon distrik. E osi mon a sire ki nou tou la otour sa latab ki annan en distrik kot nou'n ganny elekte, nou tou nou pe pas dan menm problemn.

So, alors Mr Speaker, mersi pou *allow* mwan pou demann mon keston, e mon espere ki mon kapab ganny en larepons konkret tre byento. Mersi.

MR SPEAKER

Mersi Onorab. Bon, bonzour e byenveni Minis Errol Fonseka, Minis pou Zafer Entern e dan son delegasyon, bonzour Mr Ted Barbe, *Commissioner of Police*. Mr Francis Songoire, *Deputy Commissioner of Police* dan *Specialized Units* e ASP Joseph Bibi, Direkter Zeneral pou *Human Resources and Administration*.

Nou delegasyon i la pou pran keston *PNQ Leader* Lopozisyon. Onorab Pillay, ou keston silvouple.

HON SEBASTIEN PILLAY

Mersi Mr Speaker. Premyerman avan mon komans demann mon keston, mon oule demann ou, mon oule montre mon lapresyasyon ki mon'n ganny sans bouz mon keston pli tar, akoz mon ti annan en *courtesy call* bomaten avek Prezidan Kenya. E mon osi remerci ou pou donn Onorab Lemiel loportinite pou fer pase bann eleman kle lo son keston, ki ti neser pou Lotorite konnen.

Mr Speaker, mon oule dir bonzour Minis ek son delegasyon. Konmisyoner Lapolis ek son bann depite e mon oule swet tou dimoun ankor enn fwa bonzour.

Mon keston i lir koumsa; Swivan lanons ki *ANB* i pe

phase out, eski Lasanble i kapab ganny en leksplikasyon lo,

Ki pe arive avek bann ansyen azan ANB?

Ki striktir ki i annan an plas pou asire ki travay ki ti pe ganny fer atraver ANB i kontinyen?

Eski sa desizyon Gouvernman pou annan okenn lenpak lo okenn lenvestigasyon ki ANB pe fer? Mersi Mr Speaker.

MR SPEAKER

Mersi Onorab. Minis ou ava adres sa kestyon silvouple.

MINISTER ERROL FONSEKA

Mersi Mr Speaker. Mr Speaker, Mr Deputy Speaker, *Leader of Government Business*, *Leader Lopozisyon*, tou Manm Lasanble, tou dimoun a lekout bonzour. E Onorab mersi pou ou kestyon.

Kestyon ki demande, Premye kestyon i ki pe arive avek bann ansyen azan ANB?

Mr Speaker, an Novanm 2017 swivan en reform dan striktir Lapolis, ANB, savedir *Anti-Narcotic Bureau* ti ganny formen pou ranplas *National Drug Enforcement Agency*, (NDEA).

Pandan sa transformasyon, tou sa bann

azan ti ganny peye zot benefis. Sa ki ti anvi reste pou travay koman en *special constable* ti reste e bann ki ti fer bann louvraz administrative e lezot fonksyon entern ti reste koman bann azan.

Mr Speaker, apre plizyer konsiderasyon, depi ki nouvo ladministrasyon Lapolis in pran lofis, desizyon ti ganny pran pou reform ANB.

Komisyoner Lapolis ti fer sa lanons Vandredi le 16 Zen, 2022 pandan ki i ti pe selebre son 1an dan lofis e lans revii plan stratezik pou lannen 2023-2025.

Swivan sa lanons, Mr Speaker, Direkter Zeneral pou Ladministrasyon e Resours Imen in zwenn avek tou bann manm operasyonnel sa biro, e sa bann kondisyon swivan ti ganny met devan zot,

1) Si zot deside reste, zot pou ganny anploye koman en konstab.

2) Zot pou bezwen al swiv en kour *policing* pou 3 mwan dan Lakademi Lapolis ki deza an progre depi le 4 Zilyet 2022 e

3) Pou bann ki pa'n aksepte zwenn Lapolis koman en konstab, zot pou ganny peye tou zot benefis ki enkli zot

konpansasyon, gratwite lo en baz *pro rata* e tou zot konze anyel ki'n akimile

Sa bann zofisyè Mr Speaker, pe ganny peye zot 3 mwan saler koman notis.

Mr Speaker, mon oule enform Lasanble ki i annan 65 *staff* ki'n pas atraver sa prosedir. 19 in deside pou arete. 9 pe esper nouvo *posting* avan pran zot desizyon final, 19 i deza Lakademi e 18 pe deza angaze lo teren e zot pou al swiv zot kour kot Lakademi dan dezyenm staz.

Dezyenm kestyon Onorab Mr Speaker, i ki striktir ki annan an plas, pou asire ki travay ki ti pe ganny fer atraver ANB i kontinyen? Mr Speaker, les mwan komanse par dir ki tou zofisyè Lapolis i annan pouvwar pou *perform* sa travay ki bann azan drog ti pe fer.

Parey in deza ganny dir oparavan, Lapolis i an se moman pe pas atraver en reform. Sa i neser pou ki lafors lapolis i vin pli efikas dan sa servis e fonksyon ki zot pe ofer.

Mr Speaker, anliny avek revi ki'n ganny fer e dapre nouvo stratezi 2023-2025, i annan 4 pwen prensipal ki Lapolis pou servi koman bann pwen obzektif, stratezik e sa i

efisyan e efektiv, krwasans e konfidans. Konfidans byen enportan. Redwir domaz koze par drog ilegal, kree en lanvironnman pli sen e sof pou dimoun ki vin travay e vizit Sesel.

Dan nouvo striktir sa eleman drog, i tonm anba Seksyon Krim Organize. *Organized Crime*, sa seksyon an zeneral i ganny dirize par en Depite Komisyoner Lapolis ki ansarz bann looperasyon spesyalize ki enkorpor *CID*, *Scientific Unit*, *FCIU* parmi lezot. Ki vedir ki bann travay an relasyon avek sa konba kont lofans asosye avek drog, i kontinyen.

Mr Speaker, trwazyenm kestyon Onorab i eski sa desizyon Gouvernman pou annan okenn lenpak lo okenn lenvestigasyon ki ANB ti pe fer? Mr Speaker, Lapolis pa pe antisp okenn lenpak negativ lo lanket ki deza, ou ki an progre dan bann ka drog, akoz zisteman striktir i fer provizyon pou sa eleman lenvestigasyon.

Pou nonmen Mr Speaker, tou lanket pe ganny fer par bann zofisyè Lapolis, ki annan ase bagaz pou fer lanket dan sa bann ka spesyalize.

Mr Speaker, zis pou donn en legzanp, semenn pase nou tim envestigater in amenn en

madanm etranze lo rimann, pou lofans lenportasyon drog kontrole, apre ki i ti'n ganny atrape avek apepre 5 kilo edmi drog sispekte kokain.

So, Mr Speaker, pou terminen zis mon oule reasir tou Manm Lasanble ki sa transformasyon i la anliny ek nou plan stratezik. Sa louvraz i kontinyen e natirelman en louvraz ki nou pou bezwen tou sipor dimoun, akoz i en keksoz ki kontinyen andomaz nou popilasyon en kantite. Mersi Mr Speaker.

MR SPEAKER

Mersi Minis. Bon, nou pou pran kestyon, serten kestyon siplemanter sorti kot lezot Manm avan ki nou re pas lo loter kestyon. Onorab Vidot.

HON AUDREY VIDOT

Mersi Mr Speaker. Bonzour Minis avek ou delegasyon e tou Manm piblik ki a lekout.

Minis prenon kont konsern ki i annan paran ek sitwayen lo desizyon pou frenm ANB, e nou konnen poudir i annan demann pou entansifye *skills* pou nou bann zofisye Lapolis kapab lalit kont bann fleo drog, akoz nou konnen bokou nou bann lekol i *at risk* avek bann aktivite parey. Akoz konmela bann dimoun pe servi

zanfan pou servi sa bann keksoz.

Eski - kwa ki zot pe fer pou zot kapab otan posib gard, ankouraz sa bann zofisye pou reste dan lafors? E an plis, eski sa baz, lo baz konstab zot vwar i en fason pou zot ankouraz bann zofisye pou reste?

Eski zot pa krwar, par degrad petet serten ran sa bann zofisye pou ed zot kapab tenir sa bann zofisye pou reste dan lafors, pou donn e koudmen, prenon kont ki zot annan zot ki deza annan *training* ki mannyer pou lalit kont bann fleo drog, dan sa kanpanya pou nou vwar ki mannyer nou kapab sey elimin sa problem dan nou sosyete ozordi. Mersi.

MR SPEAKER

Mersi Onorab. Minis.

MINISTER ERROL FONSEKA

Mersi Onorab pou ou kestyon. Detrwa bon pwen la. Onorab les mwan dir lo komansman ki sa reform i osi rezon ki ti annan serten defayans dan ANB. Me mon oule osi reasir ou ki dan ANB ti annan detrwa, en bon pe bon zofisye osi.

Me selman ti annan osi menm sa bann bon zofisye ti mank en serten *training*, pou vin entegre dan nou sistenm Lapolis. Me ou propozisyon pou

regard zot leksperyans, i en keksoz ki an mars tou lazournen. I pa vedir ki akoz ou'n ganny anvoye pou fer, pou ganny la baz de *training* dan Lapolis, ki si ou annan sa bann *skills* ek sa leksperyans ki ou annan e napa en posibilite pou *acceleration promotion*. I depan lo ou *performance*.

E dan nou sistenm *strategic plan* pou Lapolis, tou dimoun i ganny regarde lo zot *performance*. So, sa i en keksoz ki *Commissioner* Lapolis, *DG* dan *Human Resources* toultan pe regarde e nou pe vwar kot dimoun ozordi ek sa bann nouvo keksoz ki nou pe anmennen, ki wi i annan dimoun ki pe vreman donn tou dan Lapolis e zot pe vwar zot lavansman i pe arive.

So, pou reponn ou kestyon, wi sa i pou posib. Me selman dan tou keksoz ki nou fer, nou bezwen merite avan nou gannyen. Mersi Mr Speaker.

MR SPEAKER

Klarifikasyon? Vitman silvouple Onorab.

HON ANDREY VIDOT

Wi Mr Speaker. Minis petet pa'n tous osi lo sa bout lo lapros petet pou degrad bann zofisyè ki zot ti kot *ANB*, Pete sa kad ki

ou pe mete pou konstab ki zot pe retenir, eski ou pa krwar, si sa zofisyè li ki'n byen *train*, i ti annan son ran en pe pli o e zot pa pe donn li sa loportinite dan lafors baze lo son ran - me zot pe met sa kriter pli ba, ki petet pa pe motiv li pou li kapab kontinyen son lenerzi, son lankourazman ki i anvi donner pou lalit pou sa...

MR SPEAKER

Mersi Onorab. Wi Minis. Ou a reponn sa silvouple vitman.

MINISTER ERROL FONSEKA

Wi. Mersi Mr Speaker. Mr Speaker, mon krwar mon'n fek dir ki loportinite i la pou tou dimoun e ler dimoun i demonstre zot abilite. I pa zis abilite osi nou pe koz lo la, i entegrite ki dimoun i bezwen annan dan sa kalite louvraz.

So, tousala met ansanm dan sa moman ki nou pe fer sa, nou apel sa *reform training*, tou sa bann *qualities* ki bon pou sorti e ler sa bann bon *qualities* pou sorti, nou pou konsider okenn keksoz.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Mr Speaker, mon ti a kontan profite letan

nou lo sa size *NDEA* remersi tou bann zofisye *ANB* ki'n dan lafors e ki'n fer en travay nob parey Minis pe dir.

Alors mon kestyon ki mon ti a kontan demann Minis, an vi ki ti annan *drug squad* mon rapel avan, in vin *NDEA* apre in vin *ANB*. Mon ti a kontan mon premye kestyon demann Minis, eski Minis par egzanp mon'n tann ou'n reponn Onorab Audrey. Eski lentegrite bann zofisye *NDEA*, an relasyon, nou tou nou Manm Lasanble, nou'n tann koz lo la plizyer fwa poudir *NDEA* pe fer se si, *NDEA* pe fer se la.

Eski lentegrite detrwa zofisye *NDEA* ki'n fer ozordi ,annan sa *phase out* parey kestyon pe demande? Mon premye kestyon.

Mon dezyenm kestyon mon ti a kontan demann ou, an vi ki drog ti en size ki ti pou *NDEA*. Si ti annan okenn arestasyon drog, se *NDEA* ki ti pou vin avek. La an vi ki i annan sa *phase out* avek *ANB*, toultan mon kontinyen dir zot *NDEA – ANB*, eski prezan drog i vin en size pou Lapolis an zeneral? Mersi bokou.

MR SPEAKER

Mersi. Minis.

MINISTER ERROL FONSEKA

Mersi Mr Speaker. Onorab mersi pou ou kestyon. Mon a reponn ou dezyenm kestyon, *law and order* i responsabilite tou dimoun, tou polisye dan liniform, pa dan liniform. E sa i en keksoz ki nou pe anmennen e i enportan sa. Akoz oparavan ler ou annan, mannyer ti ganny formen avan ti annan en kantite defaz kot en gard i dir ou sa pa son louvraz, louvraz *ANB*. E i vwar krim devan son lizye, i pa pe fer. E ki arive ler i ariv sa? Ou annan en kantite *productivity* ki manke dan Lapolis. E ou pe pey en gard pou fer louvraz kont krim e i pe fer en bout. E nou bezwen tir sa dan sa panse.

E levidans in montre ki i annan en motivasyon ki'n ganny vreman elve ek sa prop nide deza dan sa detrwa semenn ki nou pe travay lo la. Akoz la nou pe vwar tou gard pe al partou pe fer sa bann louvraz e zot *performance* in monte osi akoz zot annan en serten lentere, in donn zot sa lanvi travay.

Sa reform ti enportan. Nou koz lo *integrity of* dimoun ki travay dan sa bann louvraz, okenn Lapolis e ou mansyonn *NDEA*. *NDEA* ti annan en lepok, si ou rapel *back* dan sa lepok kot bann Irlande ti kontrol *NDEA*, ti annan en-

Personn pa ti konnen ki ti pe arive. Ti napa okenn *accountability*. Menm zot Bidze ti mars deryer serten sistenm. E parfwa ti ganny kontrole par dimoun ki pa menm ti dan *uniform*.

So, ti annan en ponnyen defayans. Dan sa moman ler zot ti ganny mete *from ANB* pou vin ek Lapolis, zis keksoz ki zot ti fer, zot ti sermante. Zot pa ti ganny okenn *training* Lapolis. Zot ti zis fer serman, ti donn zot sa dwa pou fer *arrest*, bann zafer koumsa.

Me la ki nou pe fer, nou bezwen donn zot en pe plis *training as well*. E parey mon'n eksplike lo kestyon Onorab pli boner, sa en loportinite pou zot *transition* dan sa moman, e ganny en oportinite pou devlope koman en polisye profesyonnel.

So, tousala i rezon ki nou bezwen amenn respe dan Lapolis. Nou bezwen amenn disiplin dan Lapolis. Nou bezwen annan sa *integrity* dan Lapolis. Ki ler dimoun i get en polisye, i konnen i pa en boug ki pe ganny enfliyanse pou fer bann keksoz mal ler li i bezwen pe fer bann zafer *law and order*. Mersi Mr Speaker.

MR SPEAKER

Mersi Minis. Onorab Aglae ou kestyon.

HON EGBERT AGLAE

Mersi Mr Speaker. Bonzour Minis, Komisyoner e le 2 ki lo *panel*. Minis, par natir travay *ANB*, eski ou santi poudir ou bann zofisye aköz i annan en laspe eleman sekirite osi ki atase ek sa kalite travay spesifik, sirtou kont lalit kont drog.

Eski bann zofisye Lapolis ozordi zot santi zot moralman, mantalman *high* pou met sa soulye ki ou pe anvoy zot ladan ozordi, aköz i annan en nivo proteksyon osi ki atase avek sa travay?

Dezyenmman mon ti a kontan demann ou Minis, konbyen zofisye *ANB* ki'n dakor pou pran sa pozisyon Konstab Spesyal? E eski zot *package* ki zot in sorti avek *ANB* ki ti en *package* mon mazine zot ti pe byen ganny peye, aköz natir sa kalite travay, pe ganny transfer avek zot ouswa ki zot pe fer serten laranzman? Mersi.

MR SPEAKER

Mersi. I annan serten pwen ou kestyon ki mon krwar Minis in adrese. Minis ou a re pase lo son kestyon silvouple, vitman.

MINISTER ERROL FONSEKA

Mersi Mr Speaker. Mersi Onorab. *In fact* bann kestyon

moral, mantalman, ki mannyer zot pe *feel*. Mon a dir *Compol* answer sa keston akoz zot, zot pe *deal* ek sa bann dimoun e mon'n tande sa bann rapor pozitiv. So, *Compol* petet ou kapab eksplik zot ki sa lantouzyazm ki egziste dan Lapolis. Apre *DG* i a reponn lo sityasyon *package*. Mersi.

MR SPEAKER

Mersi. *Compol*.

COMMISSIONER OF POLICE
MR TED BARBE

Mersi Mr Speaker. Bonzour tou bann Onorab. Wi, pou organiz *ANB* i ankor *ongoing*. Me *in the meantime* nou annan zofisye Lapolis, parey Minis in pas lo la avan ki fer sa travay. Mon pou al en ti pe dan *histories* zis pou mwan *highlight* en pe zafer. Mon al en pti pe dan *history*.

Ti annan en lepok, mon rapel mon ti *personal assistant* en Komisyoner, kot sa lepok ti *NDEA*, kot ti ganny dir *trafficking, massive cultivation* se *NDEA* ki *deal* avek. Bann pti *possession*, Lapolis ki *handle* sa.

When at that time ti fek *phase out drug squad*, e zofisye Lapolis e i en *module* lakademi, *Misuse of Drug Act* ek bann *police procedures and action* ti

ganny montre e tou gard ti pas atraver sa.

So, *all in all*, tou bann gard i azour avek travay drog si ou le. So, sa in ganny kiltive, in ale pou en bon pe letan ki apre nou'n vwar i pa pou fer en sans. I pa fer sans akoz nou oule *do away as much as possible* parey mon ti dir lot fwa, avek bann pti *task force*, bann pti group isi, bann pti group laba ki krwar ki i annan zis a pou li fer. So, nou zisteman.

E sa tranzisyon ki nou pe pas ladan, nou pa kapab kit personn deryer. E parey nou konnen, zofisye *ANB* i pa zofisye Lapolis. Nou annan enn de zofisye Lapolis *in between* ki'n ganny *embedded* ladan, me i plito bann zofisye ki'n sorti dan bann diferan lezot *entity*. Me pa Lapolis.

E i enportan si ou le pou mwan trase poudir sa *training* ki pe ganny fer e ki pe ganny *intensify* as zot ale. I enportan pou zot. Akoz zisteman nou pa oule kit personn deryer, zot bezwen *onboard* avek sa nouvo reform ki nou pe fer e sa i swiv avek tou bann bagaz. I vin devan, nou pou konnen lekel, lekel, eksetera parey Minis in kot lo la. Mon pa pou al ankor.

Me natir travay *ANB*, wi i enportan, i annan bann - I parey nenport ki louvraz e

zofisye Lapolis i tou pare pou fer akote bann dimoun ki pou *part of the team* ankor dan en lot manner *deployment*, selman sirman. Lapolis i *enthusiastic* pou fer sa travay. Napa naryen ki zot pe per pou fer akoz i form parti sa *swearing in and everything to do with crime combating*.

So, mersi bokou Mr Speaker.

MR SPEAKER

Mersi. DG pou adres kestyon konbyen e mon krwar lo reminerasyon osi ti annan en pwen. DG?

DIRECTOR GENERAL **JOSEPH BIBI**

Mr Speaker. Zis pou pas lo lakantite dimoun, lakantite azan ANB. 19 in deside pou zot arete. 9 pe esper nouvo *posting* pou zot pran zot desizyon final, 19 i deza Lakademi Lapolis e 23 i deza pe angaze lo teren e zot, zot pou al swiv zot kour lakademi dan dezyenm staz.

An se ki konsern zot saler Mr Speaker, saler sa bann zofisye pa'n ganny afekte avek sa sanzman, e rezon set akoz Lalwa pa permet nou pou nou redwi saler en dimoun ki sa ki i ti pe gannyen.

Me parey Komisyoner in fer, kekfwa mon pou al en pti pe

deryer, zis pou dir 2017 ler ti annan sa reform, kekfwa ki ti devret ganny fer, ti devret ganny fer en *redundancy* konplet, epi sa ki ti ava anvi zwenn ti a fer nouvo laplikasyon anba nouvo *Scheme* Lapolis.

Me sa pa'n arive e zot in ganny apwente koman bann *Special Constable* e *Special Constable* i en kad anba Lapolis, alors i fer ki sa saler ki zot pe gannyen, zot bezwen kontinyen resevwar. Mersi Mr Speaker.

MR SPEAKER

Mersi. Bon mon a pran kestyon Onorab Loze.

HON JOHAN LOZE

Mersi Mr Speaker. Mr Speaker, mon kestyon i swiv lo sa ki DG i fek dir. Lo sa kestyon ki zot pa kapab redwir saler debaz en endividi vi ki i pou en aksyon ilegal. *Now*, eski sa ki DG in dir la, i sa ki'n ganny eksplike ek bann zofisye ANB depi *day one* ki sa prosedir in komanse? E eski sa i en keksoz ki kler pou tou zofisye ANB ziska la ozordi koman nou pe koze la?

Zot in nonm nou 19 isi, 19 laba. Eski tou sa bann dimoun sa prosedir ti kler pou zot, *including* bann ki ti refiz sinyen inisyaman ler propozisyon ti

ganny mete devan zot, akoz zot, zot ti pe fonksyonn anba lenpresyon ki ti pe dir zot al konstab, e tous saler konstab.

Eski ou pe dir nou poudir sa in kler depi komansman ziska la? E si i pa'n kler, eski zot pou pare, re tournen, re ouver konsiltasyon ek tou sa bann zofisye e fer keksoz kler avek zot lo kestyon zot saler debaz? Mersi Mr Speaker.

MR SPEAKER

Mersi. Minis.

MINISTER ERROL FONSEKA

Mr Speaker - Mersi pou kestyon Onorab. Be mon en pti eblouir. *DG* in fek eksplik ou la ki in fer sa depi avan e la ou pe dir li dir ou, pou li dir ou ki in fer sa. Be in fini dir ou sa. Tout fason *DG* ki ti fer sa *process* e mon a dir li eksplik ou en pti pe plis detay ki in fer. *DG*.

MR SPEAKER

Yes *DG*, annou rebran silvouple.

DIRECTOR GENERAL

JOSEPH BIBI

Mersi Mr Speaker. Pou reponn kestyon Onorab. Mersi Onorab. Depi premye zour letan nou ti anbank dan sa proses, ti annan en pe - enn de bann zofisye ki pa ti ganny en

konpran. E menm sa ti annan bann ki ti retourn dezyenm fwa, en trwazyenm fwa, en katriyenm fwa ziska bomaten la, i annan ki osi in deside sanz son nide. Kekfwa i ti dir be mon pa pou - Kekfwa premye zour i ti siny non, me apre in re konsider in *join in*.

Alors i en tout en proses ki nou'n pas ladan. E pou fer konpran poudir tou sa bann zofisye ki nou'n vwar, nou'n eksplik zot kisisa ki *available on the table*. Menm nou ti dir zot, menm si nou pe ofer zot *the post of constable*, ki annan en dokiman ki dan zot posesyon, ki zot ti ganny sans al diskite pou vwar *whether* zot pou pran en desizyon wi oubyen non lo la. E nou osi eksplik zot poudir zot saler osi pou reste parey e zot annan en dokiman *to that effect*. Mersi Mr Speaker.

MR SPEAKER

Onorab mon krwar ou kestyon in ganny reponn. Si i annan klarifikasyon - annou terminen.

HON JOHAN LOZE

(Off-Mic)

MR SPEAKER

Wi-wi-wi. Termin avek klarifikasyon akoz mon annan lot Manm ki pe espere.

HON JOHAN LOZE

Mersi Mr Speaker. Mon annan en senp klarifikasyon pou *DG*. Mon klarifikasyon se eski sa bann zofisye *ANB* ki orizinalman ti ganny dir e mon repete, ti ganny dir ki saler pou koupe, eski laport i ankor ouver pou zot ozordi retournen, re aproz e re antre, mentenir zot lanplwa si laport i ankor i ankor ouver pou zot?

E Minis li sa ki in dir, i abitye dir nou li poudir swisid pa en irzans e dimoun i ankor pe touy zot lekor dan sa pei. Mersi Mr Speaker.

MR SPEAKER

Lekel ki pou adrese *DG*? *DG*, *yes*.

DIRECTOR GENERAL JOSEPH BIBI

Mr Speaker, mersi pou ou kestyon. E parey mon'n dir i ankor annan zofisye ki ankor pe vini. Semenn pase nou ti annan, ozordi bomaten nou'n annan. Demen osi pou annan. E ziska ler sa azan i ganny peye tou son *dues*, akoz i pe ale, i pou bezwen fer nouvo laplikasyon.

Me ziska la, ki lafen Zilyet pa ankor arive, laport i ankor over e parey mon'n dir i annan ankor bann azan pe vini, i

annan ki sanz zot nide. E bomaten menm mon'n fek vwar enn ki deside sanz son nide.

So, wi Mr Speaker, laport i ankor ouver.

MR SPEAKER

Mersi. Vi ki sa i en kestyon sansib, mon pou pran dernyen kestyon Onorab Cosgrow.

HON WALLACE COSGROW

Mersi Mr Speaker pou *allow* mwan koman dernyen enterven an apre *Leader* Lopoziyon.

Mr Speaker, premye kestyon se ki eski Minis i kapab dir nou, an vi ki *ANB* ti finalman ganny kontrole par Komisyoner Lapolis, ti tonm anba Lapolis, ki difikilte ti pou annan pou bouz sa bann zofisye *ANB* dan sa restriktirasyon, anba Lapolis avek zot bann ran ki zot ti annan?

E dezyenm, eski Minis pa santi, vi ki tou dimoun pou vin lo en ran *Special Constable*. Ki manner *the chain of command* pou marse aprezan dan sa nouvo restriktirasyon ki zot in fer? Pou nepli *ANB*, mon pa konnen ki manner i pou apele.

E trwazyenm, eski Minis i kapab dir nou an term reminerasyon bann ki'n deside ale, kan eski zot pe plan pou pey sa bann dimoun ki'n deside

pou pa pran sa *offer* ki'n met lo latab, kan zot deside pey sa bann dimoun zot bann benefis? Mersi.

MR SPEAKER

Mersi. Minis ou a reponn oubyen edik ou manm *panel*.

MINISTER ERROL FONSEKA

Mersi Mr Speaker. Mersi Onorab pou kestyon. I annan en keksoz ki ou bezwen konpran la, sa reform i pe ganny fer aköz parey zot konnen, parey tou piblik i konnen, ANB ti'n perdi son lentegrite koman en *entity* ki piblik i *trust* avek.

Ti enportan ki - pou ki rezon? Pou rezon ki ti komanse depi ler bann Irlande ti la. Rezon ki ti napa okenn kontrol lo sa bann azan e sa bann keksoz ki zot ti ape fer kont sa louvraz ki zot ti sipoze pe fer. E nou ti vwar sa koripsyon ki ti egziste. E Seselwa i konnen e nou pa kapab, ler nou annan en problemm koumsa nou bezwen rezourd sa problemm byen. Netway li byen.

I parey ou fer en aksidan, ou al lopital, ou bezwen netway sa boubou avan ou tret li. Me selman par kont ki mon pe dir ou osi, ti annan detrwa zofisyè serye dan ANB. Nou pa bezwen oubliy zot. E sa reform i osi

anliny ek fason ki nou pou travay, ki nou enkli tou polisye pou reazir kont okenn krim ki enkli drog.

E drog, *transnational crime*, en keksoz enportan ozordi ki nou, nou bezwen pran sa o serye pou anmenn nou devan dan *Law and Order* pou bann defayans ki pe ganny fer ek bann zenn manrmay osi an menm tan.

So, oubliy ANB koman sa group dimoun. Get Lapolis koman sa striktir e parey nou'n eksplik ou, sa i pou tonm anba *Organized Crime*. E anba *Organized Crime* i donn zot osi lezot loportinite aköz *Organized Crime* i pa *deal* zis ek *drugs*. I *deal* ek *human trafficking*, *financial crime*. En kantite lezot keksoz ki *Organized Crime* i tonm ladan.

So, la ou pou vwar bann ki anvi travay pou ganny plis loportinite e plis *training*. Zot bezwen annan bann lezot *training*, *especially* lo bann *issue financial crime*. Zot bezwen plis *training*.

So, nou pe devlop en sistenm ki dimoun i kapab fer plis keksoz, ganny pli bon *training dan policing*, dan sa bann *issues* ki dan sa rezyon *transnational crime*. Bann *crime* pe vin defann la. So, tousala pe form par nou reform ki nou pe

fer. Se tou ki mon pou fini avek.
Mersi Mr Speaker.

MR SPEAKER

Onorab ou pa pou kapab re demann ou kestyon.

HON WALLACE COSGROW

Mr Speaker, mon pa pe ganny mon larepons. Mon'n demann li de kestyon senp, i fer en pake letour avek mwan i sant zistwar.

MR SPEAKER

Be i son repons.

HON WALLACE COSGROW

De kestyon senp.

(Interruption)

MR SPEAKER

Order silvouple! Order silvouple!
Bann Manm ki pe enteronpe arete.

Mersi Onorab, mon pou pa lo kestyon loter kestyon, Onorab Pillay ou siplemanter.

HON SEBASTIEN PILLAY

Mersi Mr Speaker. Mersi pou bann larepons ki nou'n gannyen. Premye kestyon, annou sey reetabli kronoloji levennman pou nou kapab ganny en konpran egzaktman ki'n arive, ki pe pase e kot i pou ale.

Premyerman, sa premye let ki ti ganny *issued*, ki ti pe fors bann azan ANB pou aksepte sa lof. So, sa i kler in ganny *rescind*. I nepli an plas. Ki ti donn zot 3 zour, swa zot tonm dakor, swa zot pa tonm dakor. Sa in ganny *rescind* e Lapolis in admet an piblik la ki sa let ti mal.

Dezyenmman, nou kler prezan ki bann azan, azan ANB ozordi ki pou transfer dan Lapolis lo swa ran *Special Constable* oubyen *whatever* ran ki Lapolis i ava determinen pou gard zot saler. Sa in ganny dir kler sa.

Pezan premye kestyon ki vini lo la, i byen pou sa bann zofisyè gard zot saler, i byen sa, napa problem pou zot.

Prezan annou regard zot frer ki dan Lapolis, ki zot, zot pou lo menm ran ki zot saler pou bokou pli ba, e ki Minis pe demann zot pou osi fer *Organized Crime policing*. Eski Lapolis pa krwar sa pou kree en disansyon dan lafors dan plas anmenn plis linite dan lafors? Premyerman, sa i enn.

Dezyenm kestyon prezan Mr Speaker.

MR SPEAKER

Mon krwar in deza 2 si pa plis Onorab. Annou ale.

HON SEBASTIEN PILLAY

Mersi Mr Speaker. Mr Speaker, i konsern lavi 65 dimoun, so permet mwan. Mon pa pe fer okenn dezord.

MR SPEAKER

Ale, ou. *Ok.* Pa tro bokou kestyon selman.

HON SEBASTIEN PILLAY

Akoz si ou tenny mon *micro*, i riske ariv problem ek micro ankor demen.

Mr Speaker, mon dezyenm kestyon, tre senp. An relasyon ek sa bann zofisye ki pe vin *Special Constable* ki pe gard zot saler. Eski zot ranplasman ler zot pou sorti *from* sa *training* ki zot pe gannyen kot Lakademi, eski zot pou retourn travay dan *Organized Crime* pou *deal* avek *anti-narcotics* oubyen zot riske ganny *redeploy* dan lezot landrwa?

Prezan dernyen kestyon, Mr Speaker, dernyen kestyon. eski nou kapab ganny en lasirans ek Minis ki tou travayer *ANB*. Mon pa konn zafer lentegrite, sa Lapolis i a fer son lenvestigasyon, i ava determin lentegrite sa bann dimoun.

I pa mon rol pou al determinen lentegrite bann zofisye Lapolis. Me eski nou kapab ganny en lasirans sorti

kot Minis Fonseka, ki dir nou son Minister in pran letan pou adres konsern bann ansyen zofisye *ANB*. Kot in li menm li personnelman in zwenn avek sa bann ansyen zofisye, pou li asire ki dan en moman ekonomik difisil, napa okenn endividi, okenn Seselwa ouswa son fanmir ki pa'n dormi aswar, ki'n per ki mannyer demen papa oubyen manman pou anmenn manze dan lakour.

I enportan sa Mr Speaker, ki nou ganny en lasirans sorti kot Minis, pou ki Lasanble i kapab *follow-up* lo sa lasirans. Mon remersi ou Mr Speaker.

MR SPEAKER

Minis ou ava adres sa bann pwen.

MINISTER ERROL FONSEKA

Mersi Mr Speaker. Mersi Onorab pou sa plizyer kontradiksyon ki mon'n tande dan ou bann kestyon. I annan zis en keksoz mal, ki nou ti pou fer e sa sete si nou pa ti fer naryen, nou ti kit li mannyer i ti ete. So, sa i keksoz pli mal ki nou ti pou fer e les sa deteryorasyon ki arive dan *ANB* kontinyen.

Nou'n pran en desizyon pou netway li. Nou'n pran en desizyon pou donn loportinite pou bann ki anvi progre. Nou

pe fer bann sistenm ki zot kapab vin ladan, progre e *still* zot pe *retain* zot prop kondisyon ek larzan e tou sa bann sityasyon i bon.

Now, si ou pe dir mwan ki ler i annan enn ki pou ganny sa larzan diferan ek en lot, loportinite dan Lapolis i pou tou dimoun. So, napa okenn sityasyon ki en dimoun pou santi pli feb. Si i donnen, i pe monte. E parey nou pe dir, sa bann dimoun pou al anba *Organized Crime*. *Organized Crime* savedir i pou fer plis ki zis sa rol *anti-narcotics*. I pou fer bann lezot krim lo la.

Mr Speaker, mon krwar *DG* in eksplik byen sa prosesis ki nou'n mete an plas ek sa bann manrmay ki sorti dan *ANB*, e nou a swiv sa a lavenir, me mon satisfè mannyer sa pe ganny, sa prosesis mannyer pe ganny marse. Mersi Mr Speaker.

MR SPEAKER

Mersi Minis. Bon nou'n ariv a lafen nou sesyon kestyon. Mon remersye delegasyon Minis ek son bann zofisye. Mon swet zot bon depar e bon kouraz dan zot travay enportan. Lasanble a pran *pause* e nou a re pran travay 2er edmi. Mersi.

(BREAK)

MR SPEAKER

Byen, nou annan *Second Reading a Bill, Judiciary Bill*. Onorab Georges ou pare pou posede avek sa?

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi tou bann Manm Onorab e tou dimoun ki pe swiv nou.

Mr Speaker, avek ou permisyon anba *Order 69* mon ti a prefer pa *proceed* avek *Second Reading* apre midi e *postpone the Second Reading* pou en lot zour. Probableman semenn prosenn si *ABC* i dakor pou met li lo *Order Paper then*. Mersi.

MR SPEAKER

Wi. *Well* vi ki nou'n fek fer *First Reading* sa *Bill* osi, kekfwa i pli apropiye pou nou *postpone*. Bon be nou a prosede - mon aksepte Mosyon Onorab Georges. Mosyon, i pa en Mosyon, propozisyon.

Nou a posede avek Mosyon alors e mon annan Mosyon lo *Order Paper* dan nimerò enn i Mosyon Onorab Regina Esparon. Onorab ou pare pou prezant ou Mosyon?

HON REGINA ESPARON

Mersi Mr Speaker. Wi Mr Speaker, mon'n pare. Mosyon ki mon pe met devan Lasanble pou aprouvasyon i lir koumsa;

Lasanble i demann Gouvernman, pou fer en levanter lo tou lavant later *landbank* e later Gouvernman pandan sa dernyen 10 an, pou donn en apersi lo kwa ki'n vremen arive lo sa bann tranzaksyon.

MR SPEAKER

Bon mon a ganny segonnman pou sa Mosyon silvouple. Onorab Larue.

HON FLORY LARUE

Mr Speaker, mon ti a kontan segonn sa Mosyon e mon ti a kontan koz lo la silvouple.

MR SPEAKER

Byen. Mosyon in ganny segonde. Onorab Esparon ou ava adres ou Mosyon silvouple.

HON REGINA ESPARON

Mr Speaker, sa Mosyon ki mon met devan Lasanble i enn ki tre enportan pou anmenn en pe laklerte lo bann tranzaksyon later, ki'n pase dan sa bann dernyen lannen. E sa Mosyon pe demann en levanter pour sa dernyen 10an.

E les mwan eksplike Mr Speaker, 10an i koman e

benchmark ou pwen depar ki mon'n site pou komanse. Me Mr Speaker, sa pa pou anpes Gouvernman al pli lwe ki sa 10an, e mon panse ki o fiy e anmezir ki sa legzersis pou ganny fer, Gouvernman a kapab deside si anvi en rikord kredib pou pli long letan, i a kapab fer li pou kekfwa 20 a 25an depandan lo resours ki i annan, e abilite finansyel ki a son dispozisyon.

Les mwan eksplik vre rezondet deryer sa Mosyon Mr Speaker. Pou bokou letan nou'n tann en kantite konplent e kritik sorti kot menm piblik lo bann move zesyon, ou manboulouk dan bann tranzaksyon later ki'n arive ou prezimen arive.

E lo nivo distrik, ler ou zwen piblik, en kantite konplent i vin ver nou e osi kot biro *DA* ki'n annan en kantite retar dan bann prose kot i konsern later. Kot lapreferans, koripsyon e faver in antre pou dalon, e i annan dimuon ki'n menm ganny plis ki en morso later. Swa dan *landbank*, dan le pase. E kot in napa latransparans dan serten alokasyon. E sa i pa zis dan later *landbank*, i menm dan bann lezot bout later Gouvernman, e osi dan later endistriyel.

Mr Speaker, i kler ozordi ki i annan dimoun ki'n ganny later *landbank* ki pa ankor devlope ki'n pey par anba R100mil e pe vann plis ki R3milyon. E dan mon distrik i annan legzanp. E mon kontan ki nouvo Polisi Later in donn en dele letan koman en kondisyon pou devlop ou later ler alokasyon in fini ganny fer. Si non, i pou ganny rebran.

E Mr Speaker, si ou fer en revi lo bann deliberasyon Lasanble ki'n pase oparavan, ou pou konstata ki souvan dan bann deba sa size napa latransparans dan bokou bann tranzaksyon later, in toultan monte. Nou'n tann zistwar bann ptipti bout, e osi saga bann sa 52 bout.

Devan *TRNUC*, sa size move zesyon later in en size ki'n monte tanzantan. Bokou bann ka ki pe rod konpansasyon in vin lo sirfas, e mon asir ou devan Tribinal Later osi i annan bokou ka e diferan konplent.

Me mon oule fer kler Mr Speaker, depi la lo komansman mon prezantasyon ki mon deba pa pou lo la, me mon'n oule zis mansyonnen an pasan pou revey memwar bann dimoun ki a lekout lo bann move zesyon ki'n arive lo bann size later dan le pase.

E ki petet dan sa levanter i a osi anmenn en pe plis laklerte lo kwa ki ti vremen pase, parey Mosyon pe demande.

De lot kote Mr Speaker, ler en levanter avan ganny fer, i a osi ede pou ki Gouvernman li osi i a vremen konnen e i a *take stock* lo konbyen later i annan.

Parski ozordi sa anviron 1500 ekek dimoun ki'n fer laplikasyon ki pe esper en bout later en pe partou, Mahe, Praslin e la Digue, zot pa vremen konnen kote ki annan later Gouvernman ki pa ankor devlope, e ki kapab fer konstriksyon lo la.

De lot kote Mr Speaker, Gouvernman osi pa tro konnen ki kantite later i annan, ki swa lo *freehold* oubyen ki lo *lease*, e dan ki distrik sa bann later i ete.

E dan ka later ki lo *lease*, si sa later pe vremen ganny servi pou sa menm reason ki i ti ganny donner, oubyen si bann kondisyon *lease* in ganny kase, oubyen pa pe ganny respekte. Gouvernman a osi kapab fer en kontrandi.

Anmezir ki mon ti pou prepar mon Mosyon e mon'n koz ek bokou dimoun kot Departman Later ek *Survey*, zot fer mon konpran ki wi i annan

bokou dezord e parfwa i konfiz zot dan zot travay.

Sa i akoz i annan en kantite manboulouk ki'n pase ki personn pa oule pran responsabilite. E sa ki la i anvoy blanm lo sa ki'n ale e a lafen dizour se sa dimoun oubyen kliyan ki dan bezwen ki vir an ron e pe espere,

Enn;- swa en larepons pou son let. Dezyenmman, ou en laklerte lo son demars, oubyen trwazyenmman solisyon pou son problem.

Annou pran bann ka aktyel, ozordi ler en dimoun i ganny demande pou idantifye en bout later i mars partou pou rode kote ki annan. Me par kont, si Gouvernman in fer sa levanter apart konn bann *mismanagement* e manboulouk ki'n pase, i a osi konnen lekel bann bout later ki ankor anrezistre anba son non, ki ankor lib, e lekel ki'n ganny devlope. Oubyen annan sa potansyel pou devlopman e kote i sitye.

I a osi fer pou bann manm piblik ki ganny demande pou fer sa idantifikasyon, e osi pou dimoun ki pe fer tranzaksyon later, zot a konnen si sa later i baliz avek Gouvernman, oubyen si i baliz avek prive.

E la Mr Speaker, dan sa prose nou osi kapab demande

ki letan ki Gouvernman pe met son rezis azour pli tar, i menm osi kapab annan lo son bann plan kadastral e la nou pe refer lo sa *GIS cadastral plan* lo son *website*, en sit kot bokou dimoun i servi pou gete kote tel ou tel morso later i sitye, e vwar son demarkasyon e vezetasyon.

Gouvernman i menm kapab, les dir met en remark parey GOS pou tou later Gouvernman ki pou li. E bann ki tonm dan reserve i osi kapab demarke, les dir *Government reserves*. En *code* ki letan en dimoun i *search*, i tape, i a konnen sa enn i dan rezerv.

Mr Speaker, akoz mon konn dimoun, ki'n monte desan, anmenn 4 a 5 limero later kot bann zofisyé Later, 2 ou trwa fwa, e zot dir i *committed* dan mon distrik. Mr Speaker, mon konn omwen en dimoun ki'n idantifye plis ki 30 morso, i annan plis ki 7an ankor pe monte desann, pa ankor kapab ganny en morso later.

Me kan si ti annan en levanter, e kot Biro Later, zot menm zot ti pou konnen lekel later ki lib e ki konstriksyon i kapab ganny fer lo la, sa ti pou fasilite sa en ki pe monte desan pou idantifye en morso later ki ankor lib. Sa dimoun pa ti pou

bezwen pe kit son louvraz, pou monte desan pou al peye sak fwa i al fer *search* kot biro lanrezistremman, ki parfwa i fini an ven e li i kontinyen vir an ron.

E pou Lotorite Distrik sa a fer keksoz pli fasil, ler nou pe rod teren oubyen pe planifye en proze kot nou osi nou a konnen lekel later ki pou Gouvernman ki lib e sa i a ed nou pou planifye bann proze distrik pli byen.

Mr Speaker, nou tou koman *MNA* ki la anndan, nou *involve* dan planifikasyon proze dan nou distrik, e nou ganny pa mal difikilte pou idantifye later Gouvernman ou prive. Pou vwar si proze pa pe *encroach* lo later prive, si nou pa al pas letan kot Biro Lanrezistremman pou verifikasyon.

Alors atraver sa legzersis ki mon'n eksplike Mr Speaker, tou dimoun ava konnen ki bout later ki ankor pou Gouvernman e lekel later ki prive. E sa pou osi fasil pou manm piblik ki pe fer laplikasyon ler zot pe fer zot *search* Atraver sa *survey* zot a deza konnen ki par egzantp *H3359* i en later Gouvernman, i tel grander, eksetera. Oubyen *H3357* i en later prive, oubyen i tonm dan reserve.

Mr Speaker, en lot problem ki bann kliyan i

souvan rankontre avek later Gouvernman, i sa problem ki pa ankor *survey* e mazorite dimoun ki ou pou koz avek i dir ki parfwa zot bezwen esper en kantite letan menm si zot in idantifye en kare . I kapab pran parfwa 2 a 3an pou *survey*, oubyen pou fer *mitigation* e later pa ankor annord. E rezon se ki napa ase *surveyor* kalifye pou *survey* bann later e met zot annord lo rikord.

E sa *back log* travay i souvan fwa anpakte lo travay sa bann profesyonnel e met bokou retar, dan serten alokasyon e menm parfwa dan bann proze ki Gouvernman I anvi demare avek.

Mr Speaker, mon pou zis sit ou en senp legzanp ki mannyer sa bann keksoz i ganny met retar. Tou dimoun i konnen i annan en elarzisman semen ki'n komans fer depi 2016 dan larantre Vilaz North East Point. Ozordi plis ki 7an apre nou ankor pe espere pou sa semen demare. Sa akoz sa semen kot i pase pou son lagrandisman i pou *encroach* lo en later prive.

Negosyasyon in ganny fer ek sa msye pou en pe letan pou rann li en bout later dan son balizaz kote gos, e pou li donn

Gouvernman en bout dan son balizaz kote drwat.

Mr Speaker, vizit part vizit. zofisye Later, zofisye Lagrikiltir. Tou keksoz in fini annord, in dir li *ok*, in fini annord. Me selman problemm ki nou pe fer fas avek se sa problemm *survey*.

La i annan plis ki 4 mwan, Later in fini ganny *survey* e la nou problemm se ki pa ankore kapab fer alokasyon avek sa msye aköz i ti pe fer *mitigation*.

Sa i bann keksoz ki met retar Mr Speaker, ki bezwen ganny adrese. E la si nou oule donn sa bon servis, i pou osi neser ki Gouvernman i donn *training* plis dimoun dan sa domenn pou ogmant zot kapasite e *service delivery*.

Ler mon pe dir sa i fer mwan mazin en lot ka, dan mon distrik menm, ki Onorab Pillay mon asir ou konn tre byen. Kot en porsyon en morso later ki ti'n ganny transfer lo non e zeritye, e son lannen answit en lot zeritye ki ti annan li zis 1/6 dan sa morso, en sizyenm dan sa morso, ti esanz sa later antye ek Gouvernman pou en lot bout.

Kot sa fanmir pe monte desann e pe sey negosye ek bann zofisye. E sa lepok ki sa tranzaksyon ti ganny fer Mr Speaker, ti napa okenn *due diligence* ki ti ganny fer. Lesanz

ti ganny fer e se selman kan sa madanm pe al devlop son later ki i vwar ki sa morso later nepli pou li, me in ganny anrezistre lo non Gouvernman.

E la pou li rektifye sa problemm, i bezwen monte desann, e la sa dimoun ki'n fer sa frod i nepli dan sa Departman, e sa madanm son sel rekour se pou li al met zafer Ankour. E ozordi, divizyon later pe fer demars pou zot *subdivide* sa later e *allocate* li avek en lot dimoun.

E la Mr Speaker, ler sa levanter ava ganny fer, i pou osi ede etabli bann fe ki'n arive lo bann tranzaksyon malonnet, e ler sa avan ganny fer i a donn Gouvernman sa posibilite pou met keksoz a zour, e rektifye bann anomali ki ava retir bann fristrasyon.

E dan ka kot i annan bann morso later ki lo bay, Gouvernman a osi konnen konbyen ki bay e konbyen ki son bay pe fini. Konbyen ki lo bay 90an oubyen ki lo bay 60an. E an gro, Gouvernman ava pe osi met en pe lord dan sa dezord e kontrovers ki annan lo bann size later.

E Mr Speaker, dan sa transformasyon ki sa nouvo Gouvernman pe antreprann, i vremen neser pou li konnen e met annord son rezis pou

akonpli demann ki annan an se moman lo lalis later.

Fodre note ki an se moman depi Zanvyé 2012, Gouvernman in aste 22 bout kare later avek prive e in esanz 51 morso kot in pran later prive e donn zot later gouvernman. Swa dan *landbank* ouswa dan lezot morso ki ti anrezistre anba non Gouvernman. In annan *allocate* 789 morso later dan *landbank*. Lavant 343 lezot morso ki pa ti neserman later *landbank*.

Mr Speaker, zis an 2018 a 2019 in annan 444 nouvo laplikasyon e 286 aplikan ki zot laplikasyon in matir, i fer 730. E an 2020 ti annan 118 nouvo aplikasyon e 315 ki zot laplikasyon ti matir ki fer 435.

E zis la dan sa detrwa lannen i fer environ 1165 demann pou later. E kekyon ki bon demande, eski Gouvernman i annan sa kapasite pou fini donn tou sa dimoun en morso later? Sa sif 1165 i zis bann dimoun ki'n fer laplikasyon dan sa 3 a 4 dernyen lannen. E kekyon ki enteresan, eski Gouvernman i konnen ki kantite later i annan pou li kapab balans demann avek son stok later? Larepons i non.

Mr Speaker, ler Gouvernman pou pe fer sa

levanter i pou osi annan serten morso ki probableman i pou bezwen ganny *re-survey*, akoz bann taso pa annord, oubyen bann dimoun prive in *encroach* lo la, eksetera. E sa i bezwen en legzersis kontinyel ki ganny fer tanzantan.

Parey nou konnen ki i annan serten later ki tonm dan reserve, swa zot bann later ki kot zot ete, i annan serten lapse konservasyon, e proteksyon swa lo nivo nasyonal ou enternasyonal, parey Rezyon Morne Seychellois e Trois Freres, Mare Aux Cochons, lo Mahe. Oubyen parey Fond Beaufais, Fond Ferdinand e Vallée de Mai lo Praslin.

Kot i annan sa lapse proteksyon, tousala Mr Speaker, ler en levanter a ganny fer, i a ganny demarke e byensir osi e ganny met a dispozisyon piblik, sa bann lenformasyon dan en *database* byen kler ki pou benefisye tou dimoun.

Mr Speaker, en lot size ki konsern bokou piblik, ki sa levanter a kapab rektifye, se sa problem kot ler en dimoun in fini idantifye en bout later, oubyen menm ganny donner en let ki promet li ki demars pe ganny fer pou *allocate* tel morso later ek li, e letan ki li sa dimoun pe fer demars pou

koste son pti larzan ansanm pou pey sa bout later, soudan kot Biro Later, limero later i sanze e sa menm morso i ganny donnen avek en lot dimoun, anba en lo limero.

Ki vreman malonnet. E dan mon distrik sa in arive, e mon osi kon en ka ki'n arive dan distrik Cascade ki'n ganny met a mon latansyon.

Se pour sa ki Mosyon pe dir ki en levanter a permet konnen kwa ki'n vreman pase ek bann tranzaksyon.

E bi sa Mosyon se pa pou montre ledwa lo personn, me senpleman pou met keksoz drwat e kot lerer in ganny komet i a kapab ganny repare, sa osi a ganny fer. Akoz pour le moman sa bann dimoun pe ganny dir si zot *aggrieved* rod rekour Ankour e nou konnen ki sa i kapab pran en kantite letan.

Mr Speaker, letan mon pe konklir, mon pou dir ki a ler aktyel Departman Later pe demann Lotorite Distrik, ki enkli *DA* ek *MNA*, pou idantifye, later Gouvernman dan zot distrik e met a latansyon Departman Later. E sa mon panse ki i bann lezot morso later ki pa tonm dan *landbank*, me ki eparpiye en pe partou, ki pa tro fasil pou idantifye.

E mon krwar Mr Speaker, ki sa Mosyon pe ariv a en moman oporten pou nou Lasanble debat lo sa Mosyon e fer resorti, fortman bann defayans ki egziste, ki pou ed Departman Later pou met en pe lord dan sa dezord. E parey mon'n dir i pou ede pou annan en *database* ki azour e korek pou kapab ed sa menm piblik ki pe rod en morso later.

Mr Speaker, avek sa 2 mo mon oule met sa Mosyon devan Lasanble pou aprouvasyon. Mersi.

MR SPEAKER

Mersi Onorab. Mon a aprezan apel Onorab Flory Larue pou adres Mosyon.

HON FLORY LARUE

Bonn apre midi ankor Mr Speaker. Mersi. Mr Speaker, nou pei isi Sesel i pou tou Seselwa, sa fodre pa nou bliye. Avek nou pti git later e nou kantite lanmer, tou sa bann propriyete, bann propriyete Leta i pou tou Seselwa. Sa siperfisi limite ki nou annan, i sa sel resours ki nou koz lo la, letan nou dir ek Seselwa ki Gouvernman i kapab fer disponib later pou zot fitir.

Pour konstrir en fanmir en zabitan i met bokou zefor pour kapab aste swa en lakaz ki'n

deza konstrir, swa en *condominium*, swa en *flat* ou pour konstrir son lakaz i fer en laplikasyon pou aste en later.

Sa bann later ki'n ganny dedye pour konstriksyon lakaz i apel *landbank*. Me i osi annan lezot later ki tonm anba Minister Later ki pou lezot devlopman pei.

En labank li i soutenir son lekor a longer ditan akoz bann manm i kontinyen met larzan dan kof, pou ki i touzour annan en rezerv disponib si enn son manm i oule pran en *loan*. Me nou, sa resours later ki nou annan i en resours ki limite, e a en serten moman i pou vin bokou pli difisil pour kapab kontinyen met later akote pou vann avek sitwayen.

Later *landbank* i en resours ki pou fini, alor pour kapab kree en lasosyete stab, nou bezwen konn partaz sa resours e fer sir ki i ganny servi pour etabli en sosyete Seselwa, ki an retour ganny sa later i donn pei en stabilite pour konstrir en lasosyete for avek bann fanmir ki annan en se zot.

Dan lavi politik pei, later in zwe en rol mazer dan direksyon ki nou pei in pran. In ganny servi koman en zouti pou kree distorsyon ant sitwayen. E pour kree en kontrol lo sitwayen e lafason ki zot ganny

later.

Nou'n annan en politik ki pou ganny akse ek later koman en sitwayen, ou ti bezwen montre sipor pou en serten parti politik. Ou lavenir antye ti relye avek donn sa sipor.

Akse avek later Sesel in osi zwe en rol lo personnalite en Nasyon antye, kot laliberte lekspresyon in ganny anglouti pour detrwa zenerasyon pou zis annan en loportinite pour akse avek later.

Nou'n annan en listwar kot later in ganny sezi avek serten, akoz afilyasyon politik avek en rezon *d'être* pou fer lozman e devlopman nasyonal me apre nou vwar ki listwar bokou later in ganny detournen pour anrisir serten.

Sa pa vedir ki zefor pou donn sitwayen zot prop lozman koman en nasyon pan marse, me i plito ki menm si bokou in benefisyé atraver sa plan fer disponib later, son fason zerans in fer ki bokou in benefisyé pou agrandi zot prop larises, selman atraver zis tranzaksyon later Leta.

Mr Speaker, mon pa pou kapab fer sa Mosyon san pas atraver serten listwar spesifik. Bokou sa bann keksoz ki mon koz lo la i relye avek fe. Sa bann dokiman i la dan Biro Later. Alors mon pou mansyonn

serten non Mr Speaker. Akoz i reel e i en fe.

Ansyeen Prezidan Rene in deza dir nou ki annan later se annan larises e annan larzan. Savedir later ti pouvwwar.

Mosyon Onorab Esparon i demann Gouvernman pou regard distribisyon later, pour etabli listwar sa bann tranzaksyon. Mon santi Mr Speaker, ki sa dernyen 10an i en bon komansman me i annan serten listwar later ki bezwen ganny detaye depi bokou lannen pase, akoz menm sa lepok politik later ti ganny servi pour kontrol lespri, latitud e lavenir nou pei.

Pour komans avek sa ki ti ansariz nou pei, zot in pran later dan bann sipoze rezerv ouswa tre a lekar avek kominote pour konstrir zot lakour. Premye tranzaksyon ki montre sa fason fer i date Mr Speaker, depi 1971 devan en noter apele Valabji ki ti vann *Chairman Land Committee* sa letan, Msye France Albert Rene 2 bout later dan rezerv ki apre i ti transfer lo son madanm an 1973.

Zot fanmir e zanmi pros ti osi ganny privez, pou ganny akse avek gran morso later ki ti pou Gouvernman a bann pri vremen feb ou atraver loportinite ki ti limite zis pour zot, e ankor sa bann

tranzaksyon i dan rezerv, akoz i annan bann *pockets* kot bann frer i reste tou ansanm obor kanmarad dan sa rezerv.

Mr Speaker, mon'n servi bokou mon letan dan sizyenm Lasanble, pou montre Seselwa ki mannyer sa bann labi later in afekte nou devlopman striktirel. Me fodre pa nou oubliye ki in osi afekte fason viv Seselwa anver kanmarad.

Mr Speaker, apre sa legzanp ki mon'n donnen date 1971 nou vwar ankor ki Msye Rene ti servi son pozisyon pou fer disponib later pou son 3 zanfan. Sa bann zanfan ki sa lepok ti anba laz ti ganny 3 kare later Gouvernman Barbarons, ki ti plis ki 4000 met kare sakenn ki ti ganny aste lo zot non. 2 ti ganny later menm zour e trwazyenm ti ganny later an 2011.

E an plis 3 zofisye Gouvernman pres avek Prezidan ki zot ti deza annan later, e zot in kontinyen apre sa ganny plis later Gouvernman ti aste 3 morso later ankor e zot ti fer kado sa bann zanfan sa bann later zis detrwa mwan apre. Sa i fer ki sak sa bann zanfan i annan later ki plis ki 8000 met kare sakenn.

Mr Speaker, mon pran sa loportinite, pou fer en pledwari avek sa bann zanfan, lefe ki pei

pe travay ver rekonsilyasyon e nou pe pas atraver en transformasyon, pour konsider zot pozisyon anver sa bann propriyete Leta. I kler ki zot ti ganny sa bann later mal apropo e pa'n swiv Polisi ou menm zwenn kriter, pou rann Gouvernman sa bann later pour benefisyè lezot sitwayen mwen fortinen.

Deza ki laplipar dimoun i ganny 1000 met kare e zot, zot 3 ansanm zot annan plis ki 24,000 met kare parmi zot.

Mon fer sa demann lefe ki sa 3 zanfan i annan zwisans lo plis ki 100,000 met kare later ki osi Barbarons. Sa Mr Speaker, dan li menm i merit koz avek zot konsyans.

La osi Mr Speaker, a lekar apropo sa 100, 000 met kare, i osi annan en travay pou Departman Later fer akoz Madanm Sarah Rene ti dir *live* lo televizyon ki i pou rann sa 80,000 met kare later ki pou Capricorn Estate ki son propriyeter i Katiti *Properties*.

Alors mon demande ki'n arive avek promes ansyen Premye Madanm, pou rann later Gouvernman avek Leta? Sa i en keksoz ki Departman Later i bezwen regarde.

Mr speaker, later in deza ganny rann pou benefis Leta e sa i montre ki i annan ki vwar

sa tranzisyon koman neseler. Enn bann travay in vwar kot 10 bout later ki ti ganny donnen ganny retournen avek Leta.

Mr Speaker, letan nou koz lo labi later, en landrwa kot nou vwar sa legzanp vreman kler I La Digue. La Digue, nou'n vwar kot ankor en ansyen premye Madanm Prezidan ti ganny en bout later Gouvernman pou mont en lakaz ki ozordi i en *guest house*, kot dimoun ti'n deza fer demann pou sa later La Digue, me zot pa ti ganny akse ek sa later.

Nou'n vwar La Digue kot en ansyen Minis ki li i ti annan 50 bout, in servi son pozisyon pou *swap* later, pou li kapab ganny bann later ki pres avek lanmer, avek bann valer egzorbitan.

Dan sant La Digue, Mr Speaker, nou vwar en parti politik anba giz *delinking* in pran plizyer later dan sant La Digue, antye. Ozordi Digwa i vwar li vreman difisil pou kapab devlop zot sant, akoz en kantite sa bann later i pou en sel parti politik. Sa dan li menm i montre ki mannyer kominote in ganny afekte par ki mannyer later in ganny zere.

Kantite devlopman nou ti pou kapab vwar lo sa zil Mr Speaker, si sa bann later ti ankor pou Gouvernman. Ankor

avek sanzman ki nou pe pas ladan e transformasyon, mon espere ki sa parti politik i kapab servi zot konsyans pou rann bann Digwa zot later.

Delinking koman en giz Mr Speaker, in fer ki en sel parti politik i annan later dan tou distrik Sesel. I fer ki zot prezans i partou e sa i donn zot en pouvwar ekstra.

Me pa krwar lentansyon ti zis pou kapab donn dimoun akse avek zot koman en parti. Zot ti servi sa *delinking* pou aste en bout later ki ti sipoze Biro Brans Anse Polite pou Parti Lepep/ US. Sa bout later ki annan en gro batiman, ki paret en lakaz rezidansyel avek en *swimming pool*, pa'n zanmen ganny servi koman en biro brans, me selman in ganny site koman sa.

Nou vwar ki sa parti politik, son bann *Leaders*, ki zot ki'n lans sa *delinking* in servi zot pozisyon dan parti pou aste sa later avek zot parti e fer li vin en propriyete prive.

Kestyon lo sa later ti ganny demande avek Minis dan ansyen Gouvernman par Onorab Wavel Ramkalawan sa letan, e Minis ti dir nou ki sa later i ankor pou Parti US/Lepep. Me dokiman ki ti'n disparet kot Rezistrar e mon krwar i ankor disparet kot

Rezistrar, ki mwan mon annan en kopi, i montre ki ansyen Prezidan ki propriyeter sa later e non pa en parti politik.

Sa dan li menm Mr Speaker, avek en lenvestigasyon detaye, i a kapab montre ki mannyer labi pouvwar ek pozisyon, in fer ki tranzaksyon later i fer ki dokiman i disparet kot rezistrar.

Mr Speaker, letan nou koz lo *delinking* e nou koz lo parti politik, isi dan nou Lasanble nou annan en Komite ki apel *FPAC* e Oditer zeneral in fer en rapor apropro sa bann later US e mwan koman en Manm sa Lasanble mon ankor pe esper *Leader* Lopozisyon, Chairman *FPAC*, pou dir nou ki dat pou depouy sa rapor Oditer Zeneral, pou montre ki mannyer sa bann tranzaksyon in pase. Annou pa bliye Mr Speaker, sa se later Leta. Later tou Seselwa.

Alors mon krwar in ler pou *Chairman FPAC* depese donn nou en rezilta lo sa rapor.

Sa menm parti politik ki son *Leader* ti vann li en Biro Brans Anse Polite, i vwar ki in mont en fondasyon. In mont son fondasyon Mr Speaker, i deside i bezwen en later pou li fer en batiman lo la. E la nou vwar en lot labi avek en lot

kalite later Leta Mr Speaker. Later konble.

Sa bann later kot nou lanvironnman ti ganny sakrifye e ti ganny peye par piblik Seselwa, ki sipoze par Polisi reste later *lease hold*, nou vwar ki sa parti politik ki mont son Fondasyon *Jj Spirit*, li i aste sa later *freehold* e non pa *leasehold*.

Sa bann later i sipoze retourn dan lanmen Leta. Me la dan sa ka zot servi zot pouvwar ankore zot pozisyon e zot pran sa later e zot kree en batiman ki apel *Jj Spirit Foundation*. E li laba in fini ganny vann, kot Espace. In fini ganny vann. Ankore i annan bann detay en pe pa kler lo ki mannyer sa lavant in pase e ki pozisyon sa dimoun ki'n aste sa propriyete.

Tousala Mr Speaker, i dan nou listwar resan e pou nou kapab met en lord ek nou later, pou nou kapab konnen ki mannyer nou pou bouz devan, nou bezwen regarde ki mannyer sa bann tranzaksyon in ganny fer.

Mr Speaker, ler nou pe koz lo Minis ek bann dimoun o pouvwar, nou vwar dan eleksyon 2015 kot en Minis - en dimoun ki tipe vin Minis, ti donn son sipor pou er kanpanye e dan sa 2 semenn ant premye *round* ek dezyenm

round li i ganny 2000met kare later kot *ex Hunt Deltel*, Anse Royale pou li kapab fer sa travay.

En dimoun ki ase zenn e i ti ganny en bout later letan bokou dimoun dan sa rezyon ti ankore lo lalis later, bann ki'n fer 20an, 30an ki zot, zot pa'n gannyen. Sa manmzel ti kapab ganny en bout later 2000met kare kot *ex Hunt Deltel*.

Mr Speaker, sa ti ariv an Desanm 2015 e later i ganny aste e anrezistre dan sa bann letan Nwel, Lannen, politik, parti, later ti ganny anrezistre Mr Speaker.

Nou vwar dan en lot *landbank* dan nor Mahe, en lot fiy en Minis i ganny li 2 morso later. Ki sa later Mr Speaker, in ganny demarke koman en *buffer zone*. En *buffer zone* ant en *residential area* ant en danm delo. Lezot dimoun ki'n sey anmenn devan sa *plot number* pou rod sa later, in ganny dir ki sa later pa disponib.

Me nou vwar en fiy en Minis, en ansyen Vis-Prezidan i ganny akse avek sa later. Pa enn, me 2 morso later dan *buffer area* e la ozordi nou vwar en gran *guest house* lo sa propriyete.

Dan san menm *landbank* Mr Speaker, i annan en dimoun i o plase dan ansyen

Gouvernman, li i fer *tender*, i ganny en bout later. Son msye *actually* sa madanm, son msye i ganny en bout later e letan i fini ganny later, prezan i *lease* en bout obor son later ki menm grander, ki fer i ganny 2 bout later dan en *area landbank*. Ki pran loportinite en zenn ki pe ganny later, li i ganny 2 morso.

Pourtan Mr Speaker, mon konn en zenn spesifik ki li pandan sa bann letan i ti fer 3 aplikasyon later e i ti pe rod spesifikman dan sa *zone* e i ti ganny dir napa later.

Mr Speaker, dan sa menm *area* dan nor Mahe, nou ti vwar ki ti annan en dimoun ki ti ganny 10 bout. Ganny donnen avek li an 2008. Me sa propriyeter avek tou sa bann lager ki nou'n fer pou rann bann later, in konpran nou e sa ti en *win* pou nou lo sa kote latab. Akoz i ti fer ki sa propriyeter li, i ti rann Gouvernman sa 10 bout ki ozordi nou pe rod semen pou ganny akse avek sa bann later pou kapab fer li disponib,

Mr Speaker, sa i bann listwar ki mon'n pas lo la plizyer fwa e Seselwa i bezwen kontinyen mazine ki sa bann keksoz i bezwen ganny regarde a profon. E la sa Mosyon i a donn loportinite sa Minister pou li fer sa travay.

Prozeksyon mondyal i montre ki an zeneral i pou annan en logmantasyon dan popilasyon lemonn, e sa i osi ganny ekspekte isi e sa logmantasyon dan demann pa reflekte sa resours limite ki nou annan, Mr Speaker.

Teren Sesel i ganny dekrir koman difisil avek bokou plis later dan montanny, e sa kou devlop later dan sa bann lokasyon i enn bann baryer pour fer disponib sa resours avek sitwayen.

Mr Speaker, nou'n vwar ki mannyer koripsyon in afekte demars pou bokou dimoun kapab komans ganny en bout later pou etabli zot fanmir. Planifikasyon lenfrastruktir akote dan en Gouvernman letan nou pe vann sa bann propriyete, i osi met retar sitwayen e osi met retar sa Departman.

Nou'n vwar plan *centralized sewage*, i enn bann pli gran *failure* ki sa Gouvernman in kapab anmennen lo kote lenfrastruktir, Mr Speaker. Akoz sipor ouswa deplwayman sa kalite sistenm *centralized sewage*, ti pou fer ki dan sa dernyen 25an nou ti pou kapab donn 2 fwa plis dimoun later si nou ti annan *centralised sewage*.

Akoz ozordi avek sistenm

septik tank nou pa kapab fer sa. Alors letan en Gouvernman i *fail* dan son bann promes lenfrastruktir, i fer ki nou fail nou pep.

Mr Speaker, letan mon pe konklir lo sa Mosyon, mon bezwen met devan Minister Later ki nou annan en letablisman apele *Anti-Corruption Commission*. E letan zot pou fer zot bann resers entern, zot pou bezwen servi sa fasilite pou ekspoz bann dimoun ki'n servi zot pozisyon pou abiz zot pouvwar pou ganny plis ki en morso later, Mr Speaker.

Akoz letan nou fer sa, nou pou kapab pe delivre pou lefitir, letan nou pou regarde ki mannyer dimoun in abiz zot pozisyon, nou pou anpes li arive dan lefitir.

Nou bezwen regarde nou listwar pou vwar kote sa bann labi in ete, pou nou kapab retire, pou nou kapab bouz devan.

Bokou later in ganny vann pou milyon Mr Speaker, fodre nou kapab vwar si sa larzan i kapab retour dan kof leta pou kapab kontinyen *improuve* sa servis later.

Mr Speaker, avek sa de mo mon ti a kontan donn Onorab Esparon mon sipor pou sa Mosyon. Mersi.

(APPLAUSE)

MR SPEAKER

Mersi. Mon ava apel Onorab Deshiela Bastienne pou fer son ladres lo Mosyon.

HON DESHIELA BASTIENNE

Mersi Mr Speaker. Bonn apre midi Mr Speaker, bonn apre midi tou Onorab e bonn apre midi tou dimoun a lekout.

Mr Speaker, premyerman mon oule remerci Onorab Esparon pou anmenn en Mosyon vremen enteresan kot i konsern later dan nou pti pei Sesel.

Mr Speaker, Mosyon pe demande ki Lasanble i demann Gouvernman pou fer en leverter lo lavant later *landbank* e later Gouvernman pandan sa dernyen 10an pou donn en apersi lo kwa ki'n vremen arive lo sa bann tranzaksyon.

Mr Speaker, i annan bokou koze e mekontantman lo lafason ki bann later *landbank* e osi later Gouvernman in ganny zere pandan sa dernyen 10an e osi menm plizyer lannen avan.

Prosedir ti sipoze ki later *landbank* i ganny vann avek Seselwa selman. E fodre ki sa endividi napa okenn morso

later dan Sesel. Me malerezman sa pa'n toultan leka. I osi annan en Polisi ki en Seselwa ki annan en morso later dan *landbank*, pa sipoze vann sa later apre en serten kantite lannen.

Me ankor, sa pa'n toultan le ka. E dan lenstans kot en frer ou en ser Seselwa pe sey rod en morso later pou li fer en lakaz. En lot Seselwa pe pas anba, anba, pe bann later avek etranze.

Mr Speaker, se la kot tou keksoz in komans al mal e kot sa ki ti vreman bezwen en morso later in vwar li lannen apre lannen ankor lo lalis ekspre. I annan aplikan ki'n menm fini pey valer en morso later *landbank*, e i ankor pe espere menm pandan ki i annan, zot, zot pe rod sans van sa ki zot in gannyen.

Mr Speaker, mon rapel dan lannen 2001 letan mon ti pe fer resanz en morso later Beau Vallon pou met en *bus stop* dan lentere piblik, nou ti demann sa Minis konsernen pou vann nou en morso later *landbank*. I ti pare pou pran sa ki pou nou, me i ti dir avek nou Polisi mon Gouvernman, si ou annan ene bout later ou pa *entitled* en lot morso.

Me Mr Speaker, ki nou ti dekouver? Detrwa letan apre,

se li menm li ki ti annan plis kare later dan Sesel. Mr Speaker, ler nou fer refleksyon lo sa bann sityasyon later *landbank*, dan sa Mosyon i osi fer referans lo later Gouvernman e byensir se bann later ki lo prosedir *lease* e later ki tonm dan *zone IEA* e ki zot osi i bezwen ganny touse.

Ler nou fer en bon analiz nou vwar ki lafason ki nou bann later in ganny zere, i tonm dan menm laliny, dan menm fason fer. E sa se partaz an fanmir, dalon. Diferan kalite faver ou pouvwar dan Gouvernman e osi atraver gous.

Dan ka Perseverance, an Avril 2021, mon ti ganny en lenformasyon ki i annan 35 kare later *landbank* ki ti'n pare pou met a dispozisyon dimoun ki ti sipoze napa okenn morso later. Zis 2 mwan pli tar an Zen 2021, mon ganny dir ki later in fini ganny distribye e i reste zis 4 kare. Ziska ozordi mwan koman *MNA Perseverance*, mon pa ankor ganny okenn lenformasyon lo sa 4 kare, si i ankor lib, si i ankor annan e lekel ki sipoze gannyen.

Mon demande, eski lafason ki sa bann kare later *landbank* in ganny distribye, in en prosedir normal, ti al dapre lalis, ouswa nou'n fer plezir nou dalon?

Ti a bon nou konnen si tou sa bann dimoun ki'n ganny sa bann later *landbank* ti vreman napa okenn morso later oubyen ni en lakaz. Kestyon i kontinyen ganny demande, akoz deplizanpli bokou sityasyon later pe vin o kler.

Mr Speaker, dan mon lanmen la ozordi mon annan en dokiman. I en dokiman lo later, sityasyon later dan Perseverance. Serten endividi i annan 3 a 4 morso later dan Perseverance. Ler ou gete, zot sipoze pa al fer menm kalite devlopman lo 3 diferan numero *parcel*. Menm devlopman, me selman lo 3 diferan numero *parcel*. E sa ki pli fer lapenn ankor, sa bann later ziska ozordi pa ankor ganny devlope. *Lease* in ekspire, zot 5an, en bann 7an.

Akoz sa bann menm dimoun zot annan tou sa morso later? Ki prosedir ki zot in pas ladan atraver pou ganny tou sa sa morso later zot menm? Nou ti a kontan konnen. Ti napa lezot aplikan osi ki ti ape esper en kare later pou zot osi fer en pti devlopman?

Mr Speaker, ziska ozordi i annan dimoun ki pe rod later. I annan biznesmenn ki serye e ki par epou investir. Me zot ganny dir napa later. I annan zenn ek lezot dimoun ki pe

sipliye pou ganny en pti *workshop* dan Perseverance, en pti landrwa pou zot fer zot langar sarpantye. Pou zot fer en pti garaz, pou zot sorti dan kwen lakaz. Sirtou lo sa *housing estate*.

Me ki nou pe dekouver? Later i la, i ape dormi, i pa pe devlop e dimoun pe profite pou zot fer zot bann aktivite anti-sosyal lo la, ouswa zot pe servi koman *dumpsite*.

Mr Speaker, mon pou siport sa Mosyon anmennen par Onorab Esparon e mon pou sipliye ki Gouvernman i pran kontrol lo sa bann morso later ki la, ki'n ekspire, ki pa pe devlope e ki naryen pa pe ganny fer lo la dan lenstans ki lezot dimoun pe marsande, pe mars partou, pe rod en landrwa pou zot kapab fer en pti biznes.

Menem parey loter Mosyon in demande, mon osi mon pou siporte ki Gouvernman i fer en leverter lo lafason ki sa bann later in ganny distribye, e ki in vreman arive atraver sa bann tranzaksyon. Mersi.

(APPLAUSE)

MR SPEAKER

Mersi Onorab. Mon napa okenn lezot entervenans. Bon mon annan aprezan. Bon

Onorab Loze.

HON JOHAN LOZE

Mersi Mr Speaker. Bonn apre midi tou dimoun a lekout. Bonn apre midi tou Onorab Manm, koleg. Zot a *bear* avek mwan ozordi. Mon lasante i pa a 100 pousan, me toudmenm mon pou seye.

Mr Speaker, Mosyon ki devan nou Lasanble i esansyelman en promes elektoral LDS. Mon dir ki i en promes elektoral LDS akoz dan bann lannen *leading up to* zot viktwar dan eleksyon prezidansyel, LDS isi dan Lasanble, deor dan zot bann kanpany, partou kot zot in pase, zot in dir avek lepep Seselwa ki fer zot konfyans, donn zot pouvwar. Zot pou al fouye, zot pou al rode. Zot pou serse, zot pou devwale.

I domaz mon *chère* koleg e zanmi lekol, Onorab Norbert Loizeau pa la, akoz mon pou sit en parol ki i kontan dir. Zot pou kler sa gro tors partou kot bezwen ganny klere.

Résultat des courses Mr Speaker. Lepep Seselwa in fer zot konfyans, in donn zot sa pouvwar e in donn zot tou sa ki zot ti pe demande. *You got the whole bag of goods*, dan son antyerte. Tou sa ki zot in demann lepep Seselwa, in donn

zot. Zot in ganny en *super majority* dan Lasanble Nasyonal, ki zot in servi resaman pou amenn konstitisyon nou pei, pou permet met solda asiste Lapolis.

Zot in ganny Egzekitiv ki zot ti demann lepep Seselwa pou donn zot, pou zisteman rode, serse, kler sa gro tors 6 batri. Rod tou sa bann lenzistis. Al fouye partou kot i annan problem e devwale, e rektifye e anmenn en rezolisyon dan sa bann keksoz.

Me ki nou pe vwar? Apre ki zot ganny sa ki zot in demande, olye egzekite parske sa ki zot ti pe demande sete Egzekitiv, ki zot in gannyen *by the way*, en? An ka zot pa rapel, mon a *remind* zot. An Oktob, *ahhh* zot rapel, *ok*. Lepep Seselwa ti donn zot pouvwar egzekitiv dan sa pei pou zot egzekite e fer tou sa bann keksoz ki ot in depi 2015 zot pou fer.

Olye fer sa ki zot in dir zot pou fer, zot retourn la ankor devan nou e zot retourn lo menm kanpany elektoral ki zot ti fer depi 2015 an montan ziska 2020 letan zot in ganny elekte!

Ou le dir mwan zot ti dir Seselwa elekte zot pou zot kanpany ankor? Lenpresyon ki mon ti'n gannyen mwan, sete

ki de le moman ki zot ganny elekte zot komans bouz lo sa bann dosye, zot komans fer sa bann lenvestigasyon e zot komans aport remed e rektifikasyon.

Mon pa ti'n deza tann zot dir elekte pou nou vin koz ankor lo menm keksoz, ki nou'n koze pandan sa dernyen 7an. Zot konpran mon konfizyon la, zot konpran bout ki mon pa pe konpran zot la? Zot dir elekte zot pou zot fer en keksoz, apre zot pa fer. Zot retournen, zot asize zot koz lo la ankor.

Apre ki zot in koz li la pandan 7an, zot retournen zot re koze. Me pour kwa sa pep ti elekte zot li? Akfer ti met zot la? Pa dir mwan zot in ganny elekte zis pou met palto. I bezwen i annan en rezon ki in elekte zot. Pou trous lanmans semiz e fer serten keksoz. Me i paret mwan zot pa pe fer.

Zot koz bokou lo *failure* lezot dimoun, me i paret mwan ki zot, zot pe *fail* dan gard zot parol avek sa pep ki apel Seselwa. Sa i en morso en keksoz ki mon ti anvi dir zot ozordi apre midi.

En lot keksoz ki mon anvi dir zot. *Landbank*. Mon krwar i ti komans an 1993 letan ki *Minister Esmé Jumeau* ti *Minis Community Development*. E *landbank* ti ganny met an plas

akoz esansyelman program devlopman lakaz, Gouvernman ti pe al dousman. Ti pe al tro dousman e demann parey *justly* Onorab Flory Larue ki'n koz avan mwan in dir i toultan ogmante e i toultan aport bokou presyon lo *whoever is the incumbent Government*. E zot, zot pou ganny doub presyon zot, akoz zot pa oule fer lakaz pou donn dimoun. So, zot presyon pou terib e mon annan bokou senpati pou zot.

Be an 1993 letan sa program *landbank* in komanse, e *having said that* mon oule dir, mon oule klarifye mon *statement*. Mwan mon ti a byen kontan si zot ale zot fer en *survey throughout*, zot gete kwa ki'n mars mal. Sa mon napa problemm avek. Mon asir ou Onorab Esparon ki mon napa *issue* avek sa mwan.

Me letan in komanse an '93, si ou pou ale ou pou gete, ou pou vwar i annan en kantite later ki'n ganny vann avek nou Seselwa. E '93 an montan in annan problemm ekonomik, a la menm *enstan* in annan en kantite larzan ki'n antre dan nou sosyete e sa i ganny reflekte atraver lafyerte sa pep Seselwa. E enn bann keksoz ki ou pou vwar se ki Seselwa ki'n ganny later, in investir, in fer li devlopman enkrwayab dan sa

pei.

Partou kot ou pou pase, kot in annan devlopman *landbank*. Ou pou vwar ki Seselwa, en kantite an gran mazorite. Zot in investir zot lasyer e zot in fer bann zoli, zoli keksoz. Zot lafyerte koman sa bann endividi, koman sa bann fanmir ki'n mete i fer nou tou fyer dan sa pei letan ou gete.

Si ou pou pas en distrik parey Glacis, en landrwa parey Sorento, ou pou vwar bann zoli, zoli devlopman ki sa pep Seselwa in fer. *Worth millions*. E mon krwar se lanmenm Sorento, kot si mon pa tronpe Vis-Prezidan Ahmed Afif i annan 2 morso li, dan *landbank* laba. Ki ti ganny tire e met a kote lo son non, sa apre ki li i ti annan en lot morso Later ki i ti transfer lo son madanm.

E i bann devlopman enkrwayab ki bann dimoun in fer atraver zot bann lenvestisman ki zot in fer. Be ...

(Interruption)

MR SPEAKER

Arete silvouple. Prosede.

HON JOHAN LOZE

Mr Speaker, mon kapab *proceed? Thank you very much.*

Mr Speaker. (Mr Speaker, Onorab Larue silvouple)!

(Interruption)

MR SPEAKER

Onorab Larue, Onorab Larue. Personn pa'n enteronp ou letan ou ti pe koze. Permet lezot koze silvouple.

Onorab Loze prosede.

HON JOHAN LOZE

Mr Speaker, mon mansyonn sa akoz nou ganny dir ki later ti ganny servi pou manipil dimoun. Ti en gro demon politik, ti ganny servi pou kontrol dimoun. I byen, si ou pa ti siport enn ou pa ti gannyen, sa ki zot pe dir mwan. Selman Vis-Prezidan Afif in gannyen, Prezidan Ramkalawan in gannyen Anse Royale. Mon zis poz sa la pou zot analize.

Be later dan bann pti pei zil i toultan en problem li. In toultan en *issue*. E mwan mon ti a vremen kontan si zot ti ava kapab *go back*. E nou fer li depi avan Lendependans. Nou get vre sityasyon later mannyer ti ete dan sa pei.

Akoz mon pa konnen si zot rapel mwan. Onorab Georges, resaman detrwa semenn pase, in koz lo sitasyon later dan bann 1950 Sesel. I ti pe koz lo Lalwa *Rent Board* e i ti dir pandan sa bann letan ti napa

bokou later, dimoun ti napa bokou lakaz, dimoun ti lwe, ti ganny met deor dan milye lannwit, zis ti vwar zot pase.

E petet ti a byen nou *go back*, nou gete akoz ki sityasyon ti koumsa dan nou pei e kwa ki'n sanze. Kwa ki'n kree sa demokratizasyon dan *ownership*. Akoz ki in ganny pouse pou Seselwa annan *ownership*. Annan en bout dan son pei akote tou sa ki'n al mal. Akote tou bann magouy ki zot pe dir.

Be Seselwa in gannyen later dan sa Sesel ozordi. An gran mazorite. Seselwa in ganny akse. In ganny akse non selman avek later, me in ganny akse avek kredi pou konstri. In ganny anmennen *every step of the way*. E wi i annan keksoz ki'n mars mal. E sa osi mon dakor avek zot.

Fouye, rode, eklersi. *Sort out*. Me pa sa rezon zot in ganny elekte. Zot bezwen retourn la ankor? Akoz mwan mon dir zot en laverite. Mon komans per mwan isi anndan. E la mon annan krentif pou Onorab Esparon la, akoz i enn mon manm koleg ki mon byen estim li.

Wi, wi, mon byen estim Onorab Esparon mwan. Petet zot, zot pa pou konnen e zot pa pou krwar. Selman li Onorab

Esparon i kapab demann madanm Lemiel, lafason ki mon koz lo li e ki mon'n toultan koz lo li. E keksoz ki mon toultan dir lo li.

Be, malparl dimoun, mon a kit pou ou sa Onorab Arissol.

Be, ki pe fer mwan annan krentif pou Onorab Esparon Mr Speaker, avek ou permisyon mon pou dir ou, ozordi Sesel nou annan nou en Gouvernman kot Depite Sekreter Zeneral parti O Pouvwar mazoriter par en *super majority*, i anmenn li en Mosyon dan Lasanble Nasyonal Sesel, lo later. Koman i fini anmenn son Mosyon, ou vwar en zofisye Gouvernman i mont lo televizyon i satye li. Pa pwent ledwa.

Mwan mon kanmi mwan koman en Manm Lasanble Nasyonal mwan. Mon kanmi mwan koman en Manm Lasanble Nasyonal. E mon kanmi pou zot. Zot Depite Sekreter Zeneral i ganny *chastise* par en zofisye Gouvernman e napa enn zot ki kapab dir li naryen.

MR SPEAKER

Onorab aret en pti kou. Mon pa tro sir ki referans ou pe fer avek lo en Manm dan Lasanble. Me selman ou konnen poudir si ou fer en lakizasyon - en

alegasyon, ou bezwen *substantiate*. Alors mon pe demann ou pou vey byen, sirtou referans avek Manm dan Lasanble avek en endividi.

Letan mon pe adres sa, petet zot ape demande akoz mon pa'n reponn lo komanter lo Vis-Prezidan e Prezidan, sete lareg Lasanble i dir ou, ou kapab. Ou pa devret adres *conduct*. E dan son *statement* i dir poudir Prezidan in ganny en bout later. Si sa i vre i pa en *matter of alegasyon to the conduct*. So, sa enn mon pa'n enteronpe.

Me selman mon demann Onorab Loze pou fer atansyon silvouple e annou evit akizisyon. Mersi.

HON JOHAN LOZE

Mersi Mr Speaker. Mr Speaker, mon pe koz an sipor koleg Manm e mon pe koz anver *the dignity of the House*. Lendepandans Lasanble Nasyonal. Ki ler mon koleg Manm in anmenn li en Mosyon, ki zofisye Gouvernman pa mont lo televizyon apre pou *chastise* li, dir li vin demann mwan lenformasyon. Pa pwent ledwa lo mwan.

Be Lasanble Nasyonal nepli annan drwa anmenn Mosyon dan sa pei? E zofisye zot prop Gouvernman pou mont

lo televizyon pou *slap zot around?* Donn bann pti kalot lo lebra ler zot in fini anmenn en Mosyon?

Mr Speaker, se sa mon problem. Koman en Manm Lasanble Nasyonal Sesel *I protest in the strongest terms!* Nou devret et endepandan pou nou koze. Nou pa kapab koze, koman nou fini koze, en Mosyon sa Manm ki'n amenn sa Mosyon, en zofisye Gouvernman i mont lo televizyon i dir ou ti'n merit vin kot mwan avan. Ou ti a vin demann mwan lenformasyon mon ti a donn ou. Me Mosyon i anmenn dan Lasanble pou Sesel antye tande. Nou fer deba, nou koze. Nou. Parey sa *newfangled word* ki Prezidan i kontan servi, 'nou edifye'.

Be ki mannyer nou pou edifye, par deryer ledwa vin kot ou, deryer rido? Sa mon problem. Sa ki mon ti pe koz lo la mon Mr Speaker. Mon pa pe pwent ledwa lo en Manm mwan. Me plito lo Legzekitiv ki *operate* dan en fason drol konmela.

Sanmenm sa ki mon pe dir Mr Speaker, mon annan en pe krentif ler bann Mosyon koumsa i vini konmela. Mon annan kreatif akoz i annan *blow back* apre. I annan *blow back* lo Lasanble Nasyonal. Me

selman mwan, *by all means* annou fouye.

Annou pa fouy zis 10an. Fouy 20an, annou fouy depi avan '71, ki'n ganny mansyonnen taler. Akoz nou'n dir Mosyon i pou 10an. Apre Onorab i koze i komans '71. *Let's go further back.* Annou gete mannyer ti ete dan sa pei avan. Annou gete ki mannyer ti ete pou nou pep. Annou get martir ki sa pep Seselwa ti pase akoz later dan sa pei Sesel.

E Onorab Georges in komans mansyonnen lot zour li. Ki sityasyon, vre sityasyon nou pep ti ladan e in toultan ladan akoz later dan sa pei Sesel. *And I'm not taking anything away from, the Motion brought by* Onorab Esparon devan Lasanble Nasyonal.

Be annou gete, annou fouye. Annou al gete lekel ki ti annan later dan lepase. Annou al gete lekel ki ti *land owner* e lekel ki ti *serve* dan sa pei. Reste lo later, travay lo later e ganny viktimize lo sa menm later kot ou ti travay. Sete sa bann kondisyon.

E liberasyon sa pep in vin osi liberasyon *ownership of property* ki nou'n anmennen *all these years*. E wi sa i bezwen kontinyen. Be i pa ase osi, sa ki nou nou'n fer i pa'n ase. Tou nou byen fe e tou nou mal fe,

balans zot ansanm, i *still* pa'n ase pou sa pep. Mon pa pe dir nou'n *fail* sa pep parey serten in akiz nou taler. Mwan mon krwar nou'n byen *serve* lenter sa pep. Be i pa'n ase. Bezwen ankor plis.

E sa ki bann manev leze ki zot pe fer pou pli pa ase ankor akoz zot, zot annan en *reluctance* terib zot lo sa bann kote koumsa zot.

Be nou bezwen pouse, al pli devan ek sa bann keksoz ki nou pe fer. Nou pa kapab zis fouy dan lepase, rode ki'n arive, ki pa'n arive. Be nou bezwen annan en plan pou lefitir.

E mwan letan mon asize isi anndan, souvan i annan bann keksoz ki vini, nou ganny dir. Mon dir be sa pe anmenn nou devan ouswa pe anmenn nou 1000an an aryer?

Akoz ozordi letan ou pe gete ou pe dir ek en dimoun i bezwen pey en bout later R500 mil i annan li en *development covenant* 5an lo la, apre i bezwen prouve i kapab *raise* 1.2milyon pou li fer son konstriksyon. I en pe lour pou anmennen we!

Me dir mon en keksoz, sey eksplik mwan kwa ki pou kas lebra sa pei, si nou pran en bout later *landbank*, ozordi Onorab Arissol i vini, ou apel li

dan biro, ou met li asize ou dir li nou pe vann ou *parcel H110*. E koman i asiz devan ou, ou dir bon Onorab Arissol, mon pe transfer *parcel H110* lo ou, *free of charge against the loan* ki ou a peye ant 5 a 10 *percent every month*.

Ou konnen ki sa i fer, imedyatman i liber Onorab Arissol pou li pran son *parcel* later ki ou'n transfer lo li *freehold* pou li al avek dan son labank. I asize laba labank devan Mr Saeed i dir gete Mr Saeed, vwar la mon annan mon later, mon oule met lipotek. Komans mon konstriksyon demen bomaten.

Zot realize ki liberasyon zot pou anmennen pou sa pep? Olye sa bann sot isi, sot laba. Prouv isi, prouv laba. Kliyan later i vin dan biro, koman i vini ou lev son morso later, ou donn li *freehold against a loan of between 5 to 10 percent*. Zot decide, zot ki dan Gouvernman. I peye tou le mwan. Imedyatman i pran son later, I al kot labank, i met angaz lo lipotek, i komans son konstriksyon

Pou *boost* lekonomi, enn. Pou *boost* lekonomi Sesel. De, pou ed sa bann zenn profesyonnel ki zot pe koz lo la zot tou. Trwa, pou sekiriz fanmir Seselwa e devlopman sa

pei ki apel Sesel. Mon pa anvi asize, zis koz lo promes lepase e ki lepase i kapab fer pou nou, pou enform nou dan lefitir. Be nou, nou pa kapab enform nou lekor en pe nou?

La mon'n donn zot en senp keksoz la. Annou aret met en *burden* pey dimoun, fer dimoun pey later kot i ne *upfront*. E mon konnen zot pou demann mwan, be zot pa ti kapab fer sa zot. Annou fer li la, e si zot, zot pa kapab fer li la, mon garanti zot 2025 mon pe vin fer.

(APPLAUSE)

HON JOHAN LOZE

Dir mwan sa ki zot oule, 2025 mon pe vin fer.

Mon pou al devan kongre mon parti, mon pou met tou sa bann nide devan zot e mon pou petisyon zot pou aprouve. *Once* Kongre mon parti in aprouve, mon ensiste ki mon parti i met sa dan nou Manifesto. *Once* in antre dan nou manifesto, 2025 letan nou antre dan la Gouvernans, nou pou fer li! Nou pou fer li!

Nou pe vin *strip away* tou sa bann zistwar 500 mil, prouv 1.2, tou sa bann *jumping through hoops* ki zot in mete la, *we are going to kill it with fire* e met en keksoz senp an plas ki a benefisyé sa pep ver lefitir.

Nou pa pou avans devan par foy dan lefase perpetyelman. *This is what you have been doing* depi 2015. Depi 2015 zot in pas zot letan zis foy dan bin lefase. *To the extent* la ki bann zofisye zot prop Gouvernman pe dir zot be arete la en kou. Arete. Pa *point* ledwa la, vin kot mwan vin demann mwan ki pou fer.

Be otan ki zot kapab fer sa ki byen, mon pou siport zot. Otan ki zot kapab fer sa ki byen.

Be i annan de fwa i kler ki zot lentansyon i pa zis pou fer sa ki byen. E mwan mon pa pe kestyonn lentansyon Onorab Esparon la mwan. Akoz in vini, in prezant son Mosyon byen li. In vini in prezant son Mosyon byen, dan en fason senp. Apre olye 10an nou'n komans al dan Prezidan Rene, sepa ki si sa. *Fine, sort out* sa bann zafer zot, zot in ganny dir zot pou fer, fer. *Go ahead* fer, *sort out*. Me selman mon pa krwar lentansyon i bon.

However mon ti a kontan si zot fer sa ki zot in dir zot pou fer dan plas zis vin koz lo la e annan en fason fer pou lefitir dan sa pei akoz zot o pouvwar ozordi *mes chers amis*. Zot in ganny gouvnanans sa pei pou zot fer en keksoz avek, pa pou zis zot asize, koze, *jaw, jaw, jaw* san ki zot zanmen kapab fer

naryen! Mersi Mr Speaker.

(APPLAUSE)

MR SPEAKER

Mersi, nou ava apel Onorab Michel Roucou.

HON MICHEL ROUCOU

Mersi Mr Speaker. Bonn apre midi tou mon bann koleg. Bonn apre midi tou zabitan Mont Fleuri.

Mr Speaker, ler mon'n asize mon'n ekout bann Onorab ki'n koz avan mwan, espesyalman Onorab Loze, kot i pe dir pou dir se ki 2025 i pe vin fer sa ki nou, nou pa pe fer. Mwan mon anvi dir ek Onorab Loze se ki Gouvernman ozordi ki la atraver ou Mr Speaker, se ki nou pa'n kit en aryeraz 12 milyon. Nou pa'n kite aryeraz 12 milyon. Kontrer nou pe travay pou fer anmas sa bann aryeraz ki zot, zot in kite Mr Speaker.

Mr Speaker lo *lease*, zis lo *lease* Mr Speaker i annan -

(Interruption)

MR SPEAKER

Permet li koze. Onorab. Ale. *Order!* Onorab Roucou kontinyen.

HON MICHEL ROUCOU

Zis lo *lease* Mr Speaker. Zis sa kantite larzan ki pei in perdi zis akoz ti annan bann faver politik ki ti pe ganny fer. E ozordi nou Gouvernman ki la, nou pe fer sir ki nou vin met tou keksoz an plas.

Mr Speaker, mwan mon napa en bout later. Mon reste mwan dan en flat dan en kominote ki vreman zantiy. E pour lemoman nou napa plan, mon ek mon fanmir pou nou sorti dan en *flat* 2 lasanm, ki nou vreman kontan kot nou pe reste.

Mon pa reste tro lwen avek en rezerv ki Gouvernman, ki apel Kan Tobrouk. Tanzantan mon vwar dimoun sorti dan plizyer distrik ou menm dan mon distrik menm, ki kontan servi sa landrwa pou admir son labote, akoz i pa ankor annan sa sitan kantite devlopman.

Be selman Mr Speaker, ki nou ti vwar dan lepase? Koman en dimoun i ganny aproz pou li vin en kandida dan en eleksyon, i ganny li en bout Kan Tobrouk. An se moman la, nou annan nou apepre 3 kandida *US* ki'n ganny asiste ek later Kan Tobrouk. E an menm tan ki nou vwar? Mon ti a voudre bann ki pe esper en bout later dan mon distrik i ekout sa byen, ki nou vwar?

Zot, zot ti pe ganny

demande pou espere, Mr Speaker. E ozordi anba Gouvernman *LDS* Mr Speaker, ankor dan detrwa semenn i pou annan bann bout later ki bann Seselwa pou ganny *allocate* avek atraver Minister pou Later. La Gogue, Anse Etoile, Mr Speaker. Ex Mellon i annan 35 bout later ki'n ganny tire, ki byento pou ganny *allocate*.

Beau Vallon lo lanmar Mr Speaker, laba osi tou nou pou annan bann Seselwa ankor ki pou ganny *allocate* ek en bout later. Mr Speaker, zis pase, gete si i annan en politisyen ladan. Mon garanti ou napa. I bann senp Seselwa ki pou plis ki 10an zot ti pe esper en bout later. E ozordi anba Gouvernman *LDS*, zot rev pou reisir akonpli. E mwan menm annan zabitan dan mon distrik ki pou ganny asiste Mr Speaker.

Mr Speaker, mwan koman en zenn, letan ou pe get kantite later ki annan dan nou pti pei ozordi, ler ou pe get kantite dimoun ki pe esper en bout later, enn ler mon asize mon fer sa refleksyon. Lo kote mon zanfan demen, akoz nou pe reste dan en flat. Nou pa pou kapab kontinyen reste ansanm an menm tan ki zanfan pe grandi.

Mon mazine demen, ek bann labi ki'n pase, bann ki

annan plis ki 10 bout dan lepase ki'n gannyen - e osi annou pa bliye Mr Speaker, ki nou annan bann dimoun dan lepase, ki zot bann later in ganny vole, ki ozordi zot pe demann Gouvernman ki la pou rod en fason pou rann zot, zot later.

Annou zis reflexir byen, si vreman ozordi nou Gouvernman pa ti'n vin sey met en lord dan sa zafer later la. Ki problem nou ti pou ladan.

E byento La Digue e osi Praslin, pou annan en legzersis ki Minister pou later pou monte pou al fer, pou zot kapab konnen lekel bann *owner* bann bout later ki pa ancor devlope.

Mr Speaker, Onorab Loze in dir poudir lepep Seselwa in donn nou en mazorite ozordi. E ki dapre Onorab Loze, naryen pa pe ganny fer. Mr Speaker, i annan louvraz pe ganny fer. Espre ki PS Morgan ti mont lo televizyon, ki ti demann ek Lepep Seselwa pou ed osi dan bann distrik e menm bann *leaders* dan bann distrik pou idantifye bann bout later dan bann distrik.

Mr Speaker, mwan dan mon distrik mon annan bokou, bokou zabitan ki pe esper en bout later ozordi. Ki'n apros mwan, ki dir mwan, *MNA* apre tou sa letan, ozordi mon'n arive

vwar en laklerte.

Mr Speaker, mon a donn ou en lot bout ki mon'n ganny sans pou mwan *witness*. Mr Mervin Nourrice, ler mwan mon pa ti dan sa Lasanble, mon ti toultan tann mon predeser pe nonm son non. Kan ki Mervin pou ganny son bout later, kan ki Mervin. Tanzantan sa ti monte. Parey Onorab Pillay lot fwa i dir tanzantan mon nonm Farah. Farah in fini ganny son bout later akoz tanzantan mon mansyonn son non.

Farah in gannyen, in telefonn mwan in dir mwan mersi. Mr Speaker, Mervin idantifye en bout later pou li fer son devlopman akoz i pe reste dan enn sa bann *low-cost house* Corgat Estate Mr Speaker. E apre tou sa letan ki i pe espere, nou'n al vwar ki problem Mr Speaker.

Ler li in idantifye sa bout later, i pa'n ganny konsilte li, poudir - i pa'n ganny kriye dan biro pou dir ek li koumsa, Mervin me sa bout later i annan ros lo la, i annan gale, eski ou pou kapab devlope? Non, zot pa'n fer sa. Zot in pran son file zot in ekrir ladan, zot in fou laba.

E la aprezan avek nouvo Gouvernman Mr Speaker, Mervin in ganny kriye apre ki in tournen ler sanzman in arive,

in al laba. *PS* Morgan in kriy li avek son lekip. In dir li, Mervin vwar la, nou'n vwar ou *file* ki ou ti pe demande. Sa bout later, eski ou pou kapab *build* lo la, akoz bann ki'n kapab *assess* sa bout later i dir poudir pou depans sitan bokou lo la pou li kapab fer son lakaz.

Mervin in dir zot wi, donn li. Sa problem ki ti pe arive Mr Speaker. Se ki ler en dimoun ti vwar en bout later, i pa ti ganny kriye apre. I pa ti konnen ki ti pase. So, vwar. I ti tande poudir later in fini ganny vann avek entel, ek msye entel, ki li aprezan i vwar li in ganny kit deryer.

E nou, nou Gouvernman ozordi Mr Speaker, nou Gouvernman pe lev nou bann frer ki'n espere plis ki 10an. Mr Speaker, tanzantan mon'n vwar bann fanmir ki'n vini pou sey rod en fason pou gete ki'n arive ek zot *case*. I annan ki zot *file* napa naryen ladan. Dokiman in perdi.

Mr Speaker, apre osi nou annan en bout later dan mon distrik ki mwan mon ti ava enplor avek Minister pou Later, sey koz ek sa madanm, dir li donn zot akse pou al vizit sa bout later ki laba anler. Dapre zabitan i pe dir poudir sa madanm in *encroach*. Sa later Mr Speaker, i ti ganny pran par

en ansyen Minis, ki apre in pas avek en dalon. E bokou dimoun ler zot pou al marse Kan Tobrouk zot pou vwar en gro baro, en gro miray ki'n ganny mete ki bann larestan later par deryer pa pe kapab ganny akse avek.

E dapre mon ganny en konpran, Minister pou later in kriy li. Tanzantan pe dir li vini, i pa zanmen raporte. E sanmenm landrwa kot rafal eleksyon, tou bal ti ganny donneren la. *Disturb* bann dimoun dan zanmirant.

Mr Speaker, sa Mosyon ki Onorab Esparon in anmennen, pou nou i vremen enportan. I enportan pou pep Seselwa konnen poudir se ki i annan louvraz pe ganny fer, malgre ki zot pa vwar sa Minister tou lazournen mont lo televizyon, dir kwa ki pe ganny fer, i annan louvraz pe ganny fer.

E mwan mon oule dir avek *PS* Morgan ek son lekip, kontinyen sa bon travay. Kontinyen, ki bann fanmir. Mr Speaker, parey mon'n dir, pou annan 35 bout plot later ki pou ganny donneren La Gogue. Mr Speaker, 40 dan Beau Vallon e sa pou anmenn soulazman pou bann fanmir.

E Mr Speaker, mwan dan mon distrik mon vwar bann dimoun ki vremen determinen

pou zot fer zot lakaz. Mon annan en zenn fiy ki tanzantan i pe fer resers menm pou li kapab ganny en bout pou li devlope, Mr Speaker. E mwan mon pou donn mon sipor Mr Speaker.

E mon apresye akoz mon vwar keksoz pe bouze anba nou nouvo Gouvernman la e napa okenn faver ki pe ganny fer. Tou dimoun pe pas par menm laport pou zot kapab ganny asiste avek en bout later.

Mr Speaker, mwan mon pou donn mon sipor sa Mosyon e mon pou lev mon lanmen tre, parey Onorab Loze i kontan dir. Byen o menm, akoz mon anvi vwar ki nou pei i bouze. Mersi Mr Speaker.

(APPLAUSE)

MR SPEAKER

Mersi Onorab. Mon krwar i en bon moman pou pran en pause. Nou a retournen 4er edmi.

(BREAK)

MR DEPUTY SPEAKER

Bonn apre midi tou dimoun. Nou pou kontinyen avek nou deba lo Mosyon table par Onorab Regina Esparon. Mon ava envit *Leader* Lopozisyon

Onorab Pillay pou pran laparol silvouple.

HON SEBASTIEN PILLAY

Mersi Mr Speaker. Ou dan sez. Bonn apre midi tou koleg Onorab e bonn apre midi tou dimoun a lekout.

Mr Speaker mon'n ekout atantivman deba lo sa Mosyon e mon krwar priyori ler mon'n ekout *mover* Mosyon mon'n si oule konpran en pti pe son lentansyon e tonasyon son prezantasyon.

Me apre mon bezwen dir ki ler mon'n ekout lezot entervenans ki'n koz an sipor son Mosyon mon vwar ki si oule zot in detri sa Mosyon orizinal ki'n vin devan Lasanble.

Mon pou dir sa akoz ou konnen nou mon ti krwar a en moman donner nou'n fer, nou'n anbark dan en *time machine* e nou ti'n retourn an 2016, e pas par 2017 ankor. Akoz nou'n *endup* tann menm retorik menm keksoz ganny dir, menm largiman, menm nou'n mansyonnen.

E pour mwan i soulev en pwèn kardinal i se ki si ou annan tou sa lenformasyon e ou annan tou sa bann keksoz e ou dan Gouvernman, e ou pa ankor kapab fer naryen *about it*, e aret koz lo la?

Ou ti a pran lentansyon ki sa Mosyon in vin avek akoz *genuinely* mon annan gran respe pou Onorab Esparon - akoz mon bezwen dir i en dimoun ki'n vwar mon grandi e mon konn son fanmir, i konn mwan tre byen. Nou reste dan en kominote kot nou annan nou en fason kominote ki nou respekte kanmarad e ki lentansyon se rod meyer keksoz pou dimoun.

E se sa ki Onorab Loze ki mon apresye dan mon lentervansyon apre midi in fer. In si oule met lo lanfaz ki lepep Seselwa in regard sa ki nou, nou'n fer koman en Gouvernman e in regard sa ki zot, zot in propoze pou fer koman en Gouvernman e in donn zot - in fer zot konfyans pou zot realiz sa bann keksoz ki zot, zot ti dir zot pou fer koman en Gouvernman.

Be nou pa kapab retourn ankor pou rekomans koz lo menm keksoz ki zot in fini ganny en manda pou travay lo la. E la atraver ou Mr Speaker mon ava *address the Chair*, mon ti a kontan zis dir Onorab Larue mon konnen poudir ou annan en gran lanmour pou Prezidan Rene, e mon konnen ou santi ki Prezidan Rene in fer pou petet e ou fanmir osi bokou

faver e ou apresye sa bann faver.

HON FLORY LARUE

(Off-Mic)

(laughter)

MR DEPUTY SPEAKER

Onorab, Onorab Larue pe lev en *point of order* parske ou non, in ganny mansyonnen.

HON FLORY LARUE

Mr Speaker. Fodre i *substantiate* keler ki mon fanmir in ganny later ouswa okenn naryen avek Albert Rene *ok*? Si nou pe koz lo later mon'n ganny faver fodre sa parti i *substantiate*, akoz li in ganny later avek Gouvernman son parti li, *ok* i fek ganny later li i pa dir Sorento in ganny later. Mersi Mr Speaker.

MR DEPUTY SPEAKER

Point taken. Onorab ki annan laparol mon krwar nou ava pran konsey Speaker ki in donn nou avan *break* konmsi *let's try to avoid* sa bann kontrovers. *Silvouple proceed.*

HON SEBASTIEN PILLAY

Mersi Mr Speaker. Mon pa ti konnen poudir mon parol pou ensit sa kalite reaksyon ase vyolan. Me mon ava pran ou konsey, mon pa'n dir Onorab in

ganny later mon servi sa mo faver. Petet si sa i ofans Onorab mon ava dir poudir bokou Seselwa atraver travay ki Mr Rene in fer koman en Prezidan in resevwar faver ki in sanz konteks lavi bokou nou.

In sanz konteks lavi bokou nou enkli pou Onorab Larue par lefe ki in annan en redistribisyon later ki'n arive atraver Polisi Later ki Gouvernman Mr Rene ti anmennen. Mr Rene ti annan bokou zanmi pros. In en zanmi pros Onorab Georges Mr Speaker, akoz en moman donnen Onorab Georges ti ansarz *Law Centre* anba Prezidan Rene.

E i montre ou ki poudir pandan letan ki Prezidan Rene in O Pouvwar in annan plizyer dimoun e plizyer endividi ki'n agrandi zot larises. E ozordi bokou nou pe kestyonn la fason ki zot in agrandi sa larises. Me sa ki reste, sa ki reste enkontournab, se ki a en moman donnen dan nou listwar 96poursan later ti dan lanmen 4poursan nou popilasyon.

E se pour sa rezon ki nou'n annan sa bann prosedir apre kot later in ganny konble, e apre nou'n annan bann *landbank*. Rezon akoz mon'n antre dan sa deba, set akoz ler mon'n ekout Onorab Esparon

in sitye son Mosyon lo later *landbank*.

Me apre ki mon vwar nou'n vwar atraver ou Mr Speaker ankor enn fwa fotespere mon pa ofans Onorab Larue ankor - in antre dan later *US*, in antre dan later Prezidan Rene, later isi, later laba ki ler mwan mon gete in sorti lo Mosyon later *landbank* ki Onorab Loze in nobou retournen e re *focus*, ki sete *landbank* ki mannyer in ganny donnen, ki mannyer in ganny *allocate*.

E sa ki reste kler se ki ozordi nou annan bokou Seselwa ki *own* zot prop lakaz, ki pe reste lo en later ki swa apre zot in vann, me zot in ganny li atraver aste en later *landbank* e fer zot lakaz.

E nou bezwen admet osi wi ki i annan Seselwa ki'n ganny later *landbank* ki pa'n servi, e ki ankor pa pe servi. So la realite nou pa pou kapab kasyet ki in annan dan prosesis kot in annan bann alokasyon ki en dimoun ki'n ganny *allocate* en later i pa'n servi li oubyen in servi.

Me kestyon ki mon pe demande se kote later *US* koman en parti politik ti antre dan sa Mosyon? Kote later La Digue ki antre dan sa Mosyon?

Akoz pou mwan si atraver

ou Mr Speaker ankor enn fwa mon pou dir Onorab Larue si ou annan tou sa bann levidans, ou konbyen limero Mrs De Silva anmenn tou ou bann levidans kot Mrs De Silva, anmenn tou ou bann dokiman, e ACCS i ava fer son lenvestigasyon. E si ou ti'n pran letan pou konsilte bann manm FPAC dan Caucus ou ti ava konnen kote FPAC i ete lo sa size.

Dan plas vin fer bann stement dan Lasanble ki zis *inflammatory* e derogatwar dan sa konteks pou sa Mosyon. Prezan osi i reste en fe ki enportan, e la mon pou adres sa size faver atraver Gouvernman. Mon pou koz pou tou dimoun ki'n siport Gouvernman ki o pouvwar e ki mon bann koleg MNA lo lot kote latab, ki kopi zot mon war zot mont plizyer montanny pas devan plizyer lakour e mon ti a kontan demann zot en kestyon.

Ozordi mwan kot mon asize mon vwar bann menm dimoun i anba mon Gouvernman in la pe kontrol later, sa bann menm dimoun i la ozordi akote zot *leadership*, pe zwir bann menm pozisyon. Mon pa pou nonm non serten dimoun, me aparaman dapre mon resers Sesel i annan petet enn ou de msye ki konn tou later Gouvernman kot i ete.

Be ozordi se sa bann menm msye ki al eksplik tou proze Gouvernman ki pou ganny fer. So eski montre ledwa lo enn oubyen lot pou avans sa Mosyon?

Sertenman non, e bokou, bokou dimoun e mon krwar menm zot, zot realize ozordi zot Gouvernman pe tonm dan menm pyez ki zot Gouvernman ti tonm ladan, ki se ki sa ki'n travay pou met li la pa pe ganny rekonnnet atraver sa Gouvernman ki li in met la.

Pa ankoler ek mwan, pa ankoler ek mwan akoz sa i en santiman ki malgre bokou zot pa pou aksepte, me i en santiman ki zot annan.

E mwan mon asize koman en obzervater prezan akoz mon konn sa fot, mon pou admet ek mon bann siporter e mon bann dimoun ki ti ede pou met nou la ki nou pa'n fer ase pou zot e mon pou demann zot en gran leskiz, mon pou annan sa kouraz pou demann zot sa leskiz.

E mon pou dir ek zot koumsa ki nou, nou annan leksperyans sa fot. Me sa parti ki dan Gouvernman ozordi pa pe realiz sa e se sa ki Onorab Loze in sey fer zot konpran.

Zot pas en kantite letan blanm nou pou tou sa ki'n arive anba soley dan sa pei, me zot

aklanmen ler Prezidan en lot pei i vini i dir Sesel i annan 46an devlopman, zot bat lanmen. Pou mwan sa i en dekoneksyon total avek sa ki zot dir ek sa ki zot fer.

Akoz zot pas tou lazournen *remind* nou ki manner 43an Seselwa in pas dan martir e en boug i sorti deor i dir ek zot 46an devlopman e zot aklanmen.

So annou get la realite. Ki Mosyon pe rode? Mon krwar dan son lentansyon Onorab Esparon pe realize dan Glacis parey dan bokou lezot landrwa, nou annan bokou dimoun, annan *graduates* ki'n vini parey mwan menm. Ki oule fer nou lakaz e ki oule ganny en bout later ki ou kapab fer ou lakaz la.

I annan osi pa zis *graduates* ki i oule fer son lakaz me osi annan lezot dimoun ki oule fer son lakaz i oule ganny en bout later pou fer son lakaz. Me i annan en problem ki nou bezwen adrese e se sa se ki menm si ozordi dan nou konteks aktyel nou donn en dimoun en bout later pou li fer en lakaz, in komans vin en legzersis dan lenposib.

Avek kou konstriksyon ki manner i ete, avek bann demann ki vin avek bokou fanmir menm bann ki dan

middle income pe war zot tonm pli ba dan en *bracket* li ba ozordi, aköz difikilte zisteman pou realiz sa. E sa i en realite ki nou pe fer fas avek ozordi.

So kestyon pou Seselwa, se eski nou oule en Gouvernman ki ou reste *focus* lo lepase, oubyen eski nou oule en Gouvernman pare pou nou bouz sa pei devan parey US i pare pou prezant zot an 2025? Aköz sa ki nou pou annan 2025 se ki nou pou annan leksperyans fer sa bann fot ki nou'n aprann pou pa repete.

E ler mon tann Onorab Roucou dir nou poudir Farah in ganny son later, ki annan plizyer dimoun dan Mont Fleuri i dir ou *return* zot *call* en, *return* zot *call*. Aköz i pa ase pou vin koze dan Lasanble pou vin zis repet menm kalite largiman, me i enportan ki nou reste konekte avek nou zabitan. I enportan.

E sa ki neserer pou nou apresye koman en Lasanble, koman en kolektiv koman en Lasanble, i se ki i si nou fer sa fot pran 2 boul beton anmar ek nou lipye e pa bouz devan sirtou dan moman kritik ki nou ladan, nou pou pe fer en deservis sa pep. E pa sa rezon aköz sa pep in met nou la anndan dan sa Lasanble.

So ler nou regard en tel Mosyon in vin devan Lasanble,

nou bezwen get li dan konteks ki sa Mosyon in vin devan Lasanble. E son konteks mwan mon'n ede ilistre atraver *PNQ* ki mon'n anmennen. Par egzanp mon ti anmenn *PNQ* lo sityasyon siman dan pei e mon ti menm dir ek Minis ki sa *batch* siman ki vini pou fini vitman, e ki Minis i dir mwan zot *on top of things* e ki'n arive? Sa *batch* in fini.

Ou konnen se sa ki nou oule, nou bezwen pous Gouvernman zot Gouvernman ansanm ek nou, pous zot pous Gouvernman pou li reakte e dil ek bann sityasyon ki nou pe fer fas avek.

Bomaten Mr Speaker mon tann ou menm ou demann en kestyon tre, tre pertinan, en kestyon tre, tre enportan ki ou'n demande. E sa kestyon se ki nou'n aprouv sa bann larzan dan Bidze e ou pe arive avek? Akoz ou osi ou anvi war efikasite ou Gouvernman, ou pa oule ou Gouvernman i ganny war par efikas. Mon korek la?

Be ki nou'n tande, sa larepons ki nou'n ganny en *set* en leskiz e mon rapel en Onorab Gervais Henrie ki ti dan Lopozisyon zanmen ti pou aksepte en larepons koumsa atraver ou Mr Speaker. Mon pa pe *impute*, pa ti pou aksepte sa

larepons. Ou konn tre byen ou.

E ozordi zot pe aksepte bann menm larepons ki bann *One Party Assembly* ti aksepte dan lepase e i fer mwan demann mon lekor, eski nou'n al dan en *time machine* e retourn 20an pase?

I pa mon lentansyon pou vin dan Lasanble pou vin fer tapaz e fer largiman kan nou pe ariv a en moman desiziv dan nou devlopman, kot nou pe fer fas avek en koz enternasyonal e kot nou pe vwar nou pe bezwen demann plis, ki Gouvernman kapab fer pou ed nou popilasyon pou li kapab *overcome* bann sityasyon difisil ki i pe pas ladan.

Se sa ki nou bezwen fer, koman en Lasanble. E la mon pou montre zot ki mannyer nou bezwen konekte sa ki nou fer koman en Lasanble e mon pou vin lo sa Mosyon.

Nou ganny nou en Lalwa ki Gouvernman i pase rekomandasyon avek *Declaration of Assets* e largiman ki Gouvernman ti fer ler i ti dir ki *assess* ki lo bann *spouse* e nou fanmir bann *public officers*, pa pou ganny deklare e bann largiman ki ti ganny fer lo kont labank mon asire zot rapel ki mannyer zot ti koz lo kont

labank i prive, kont labank i pou sa dimoun.

Me ozordi pou en dimoun ganny akse ek okenn led e sipor son kont labank pa prive. Zot pe kre sa ki zot menm zot bann i rapel sa ki *SNP* ti dir 2 nivo dan sosyete Seselwa. En *elite* avek larestan dimoun e i nou devwar koman ban Manm Lasanble pou anpes sa arive. I nou devwar pou fer sir ki Gouvernman i realiz lo bann lobligasyon ki i annan.

E lobligasyon Gouvernman otour lozman, otour later, i baze lo zot Polisi. Me sa Mosyon ki i pa ti pe vin lo sa bann keksoz, sa Mosyon li i ti pe koz lo regarde ki'n arive kantite ki'n reste akoz i an en pwen ki'n ganny dir eski Gouvernman li menm i konnen ki kantite larler i annan?

Sete sa en pwen kardinal otour sa Mosyon. E si sa ti'n vin *focus* sa Mosyon, nou ti a ganny sipor, be sa Mosyon in dezenere dan en kalite *mudslinging contest* pou sey anvoy labou lo nou kanmarad, zisteman akoz nou oule *score* pwen politik ki nou'n sey *score* 6an pase ki nou pa ankor kapab fer naryen avek.

Mwan tou sa ki arive avek mwan dan Lasanble mon *move on the next day* mon pa *dwell* lo la. Mon pa reste lo la akoz i pa

healthy pou en imen anmenn sitan kantite fristrasyon dan son lavi, i pa bon pou li i pa bon pou son fanmir i pa bon pou son kominote. E si ou en politisyen ou en dimoun ki annan en pozisyon enportan dan pei, ou annan en rol pou zwenn i pa byen pou ou pei. Sa i 4 *cost* enportan ki nou bezwen balanse koman *MNA*.

E nou, nou bezwen kapab sirmont sa bann keksoz pou nou bouz pli devan, so ler nou koz lo sa ki nou'n benefisye ek later nou koz lo sa ki'n gannyen sa ki pa'n gannyen, i pa zis dimoun ki ti'n siport sistenm *SPUP/SPPF/Lepep/US* ki'n ganny later dan Sesel, i enkli en kantite dimoun ki siport *LDS*.

Nou oule koz lo later *lease* atraver ou Onorab Roucou in mansyonn sa R12milyon, be annou al Providence nou a gete konbyen sa bann dimoun ki vremen siport *US*? Annou al get konbyen ki siport *LDS*. Be i pou inevitab dan en pei kot en dimoun pou siport en parti pou siporter en lot parti, pou bezwen benefisye avek sa ki Leta i annan pou ofer.

Nou nonm 4 politisyen in ganny later dan Kan Tobrouk par egzanp Mr Speaker, e la mon pou *advice* en zenn politisyen, i danzere sa kalite retorik la. Eski i vedir ki demen

akoz Onorab Andre i politisyen son garson pa devret ganny en later? Eski i vedir ki demen akoz Onorab Monthy i en politisyen i pa devret ganny en later?

I pa sa ki ou'n dir, ou pa ni'n menm nonm *proper channel*, ou, ou referans ki ou'n fer Onorab i le fer ki en dimoun i en politisyen.

Me ozordi i annan plizyer politisyen ki dan Gouvernman ki Minis ki'n ganny later atraver Gouvernman ki ti la avan. Ou asire, ki ou'n pas *proper channel*? Onorab, mwan parey mon'n dir mon pou en ipokrit si mon retourn ladan. La mon tann zafer *flat* ki'n gannyen dan Kan Tobrouk atraver Minis Bastienne pou al fer kanpanya politik, tousala i bann keksoz ki nou kapab dir *ok*.

MR DEPUTY SPEAKER

Address the Chair, silvouple address the Chair.

HON SEBASTIEN PILLAY

Mr Chair sa i bann keksoz ki pe ganny dir e *sorry* mon pou apresye ki mon'n al en pti pe an deor mon pa devret koz lo la.

Me sa ki mon reste konvenki *about*, sa devlopman ki nou'n *achieve* sa *middle class* ki nou'n kree - ler mon pe koz sa *middle class* mon pe koz ou

sa endividi ki ozordi ou *income* in ariv par lao 15mil in ariv dan 15mil, R16mil e de ptitapti perdi sa pouvwar ekonomik ki ou ti annan, akoz lemonn e lekonomi pe evolue.

E nou koman politisyen nou bezwen rod fason pou protez sa *middle class*, akoz se zot ki form baz nou *public service*, se zot ki form baz tou ban dimoun ki travay. E se pour sa rezon ki fer zot annan en *foyer*, fer zot annan en lakaz i en keksoz ki enportan.

E se pour sa rezon ki Onorab Loze in koz lo sa ki nou koman en Gouvernman nou kapab fer pou zot. Politik sa, i pa akoz ki zot pouvwar ozordi zot pou pouvwar pou lavi. 2025 Seselwa i kapab dir be *ok* annou donn sa bann boug en sans pou nou get si zot pou kapab travay e zot a tir nou si zot pa kapab.

Parey Seselwa in donn zot, zot sans e zot pa kapab travay a tir zot. Pa ankoler pa nerve zot, sa i la realite politik. I pa mwan kont zot sa i normal se sa demokrasi. Me i paret zot in bliye mon krwar zot anvi *entrench* zot lekor dan pouvwar, e ekspekte ki zot pou gard pouvwar *forever*. Nou a gete si zot pou gard 43an. Nou a gete, zot ki dir pa mwan.

Me selman la realite se ki sa ki nou n kapab akonplir pou

sa pei pandan sa 43an dan 60an zot zanmen zot pou fer! Akoz sa pei se nou ki'n batir li, zot pe debout lo sa ki nou, nou'n fer. E ler mon dir nou, mon ti a kontan ankor atraver ou Mr Chairman ledikasyon bann manm ki nouvo, ler mon dir nou, ler nou koze dan Lasanble nou *mean* nou, nou koz pou Seselwa, nou pa koz zis pou nou.

E sa ki enteresan Mr Chairman ler ou ekout bann dimoun ki mon parti in *bear* zot, mon pa *mind* mon *ok* ek sa mwan, pe replike, pe mank respe dan Lasanble, pa pe montre en konportman ki a laoter, i montre ou ki mannyer poudir vreman *l'homme* dan lopilans i oubliy son nesans, vreman *l'homme* dan lopilans i oubliy son nesans Mr Speaker. Vreman.

Me Mr Speaker, mon pa oule ankor enn fwa personn taler a ganny kriz pou fer *matter of point of order*. Mon pa oule personn ganny kriz pou *raise point of order* Mr Speaker.

Mon ti a kontan dir Onorab Esparon sa bann keksoz swivan, si nou pe fokaliz lo later Leta, enn bann pwen enkontrolab ki nou pou bezwen fer fas avek se lefe ki nou'n deklar en bon porsyon nou teritwar koman bann rezerv, pa

zis an sa ki konsern larter me an sa ki konsern nou teritwar.

I pou bann pwen ki koman en Lasanble nou pou bezwen diskite dan le fitir, ki mannyer nou pou dil ek prezerv nou pei nou osi *allow* devlopman arive, nou pou bezwen osi fer fas avek bann Kod *Planning* ki egzize ki konstriksyon i ganny fer dan en serten fason dan bann landrwa kot ou konzeste.

I annan bokou kominote kot ou annan landrwa ki konzeste, bann kominote par egzantp dan lavil, dan Lari Angar kot ou napa landrwa pou konstrir, dan St Louis ou napa landrwa pou konstrir. Eski en dimoun pou konstrir vertikalman. Ki kantite i pou ale vertikalman, ki bann oter *building* ki i nou pou *allow* pou ganny konstrir dan nou, dan bann landrwa?

So tousala i bann kestyon ki koman en Lasanble nou pou bezwen komans adrese, komans regarde zisteman pou nou kapab aport en solisyon. Akoz mwan rezonableman non anvi aport en solisyon pou sa bann dimoun ki pe ekout nou pou Seselwa ki pe ekout nou.

Akoz ler nou regard sityasyon kot nou pe ale, deplizanpli avek difikilte pou kapab fer lakaz e konplet en lakaz, mezapar problem ki ou

annan avek bann later zeritye.

Mezapar problemn ki ou gannyen avek akse pou later kot *right of way* i vin en problemn, kot bann desizyon parfwa lo *right of way* i ganny donnen dan en fason, dan en lot i ganny donnen dan en lot fason. Tousala i bann keksoz ki nou pou bezwen met an perspektiv, an relasyon avek en size ki anmenn nou pou konsider later e lenvanter lo later.

So si ou ti'n konsider elarzi *scope* ou Mosyon, fer en levanter lo tou later Leta e regarde ki mannyer sa bann later Leta pou ganny *allocate* pou ganny donnen avek endividi, mon krwar ou ti ava annan ou en pwen pli sible pou nou kapab lager lo la.

E ler nou pou al lo later *landbank* i pou zis an relasyon avek sa ki'n ganny donnen, eski i pou an relasyon avek sa ki kapab ganny donnen ankor? Eski demen nou pou annan ankor *landbank*?

So vwala mon bann kontribisyon ki mwan mon annan pou sa Mosyon, e mon swete bann dimoun ki'n ekout nou e mon konnen lepep Seselwa pe ekout nou. Nou apresye lefe ki mon ti a kontan ki nou annan en Lasanble ki konsider sa bann size lo son

merit, lo son spesifisite, e lo ki mannyer vreman sa bann size i kapab amelyor e aranz lavi nou pep *going forward*.

E an konklizyon Mr Speaker mon oule dir sa, wi nou'n konble later, nou ti bezwen konble later malgre kan serten pa ti oule mou konble later, akoz nou ti bezwen fer devlopman.

Wi nou'n bezwen fer *housing estates*, malgre kan ler nou ti fer *housing estates* serten ti apel sa bann lakaz Kan Lapen. Wi nou'n bezwen fer *flat*, pa tou keksoz dan sa ki nou'n fer nou'n get li absoliman byen. Mon ti a kontan krwar pandan sa plizyer lannen ki nou'n, o pouvwar zot be, nou'n ede sa pep nou, malgre zot oule fer nou krwar *otherwise*, nou'n ede sa pep. Mersi Mr Speaker.

(APPLAUSE)

MR DEPUTY SPEAKER

Mersi Onorab. Mon ava donn parol Onorab *Leader of Government Business*. Onorab Georges.

HON BERNARD GEORGES

Mersi Mr Speaker. Bon apre midi Mr Speaker. Bonn apre midi tou bann manm Lasanble e tou dimoun ki pe ekout nou.

Mr Speaker mwan mon pou koz lo sa Mosyon apre midi.

Mon pa pou koz lo mankman siman dan pei, lo Bidze spor ki ou ti demann en kestyon bomaten, lo *declaration of assets*, lo oter batiman Viktorya, mon pa pou demann annan respe dan Lasanble, me i enteresan pou vwar lekel sa dimoun ki pe koz lo annan respe dan Lasanble.

Mon pa pou dir annou pa retourn dan lepase apre koz lo lakaz Lapen. Mon prefere reste lo Mosyon Onorab Esparon, ki annan en sel bi, e sa se pou demann Gouvernman regard dan alokasyon *landbank* e fer en lodit tou sa ki'n arive ek sa program, dan en fason san ki i demande dan en fason pou nou konnen kote nou'n al mal dan lepase e ki mannyer nou kapab evite pou nou repet sa bann fot.

Setou ki sa Mosyon pe demande. I pa pe demann okenn gran filozofi lo ki mannyer politik i devret ganny fer isi Sesel, oubyen ki mannyer dan sa Lasanble nou devret konport nou, i pa pe demann okenn sa bann keksoz i pe demann en keksoz senp.

Ti annan en program, *landbank* i annan touzour en program *landbank*. Onorab in dir ki in annan dimoun ki'n

benefisye. Me in osi annan serten derapaz. E i pe demande annou annan en lenvanter pou gete e annou fer sa pou sa dernyen 10an, zis pou donn nou en la persi lo kisisa ki'n vremen arive dan alokasyon sa *landbank*.

Setou Mr Speaker, pa plis ki sa. E mon krwar ki si nou reste lo sa *focus* nou ava konnen egzaktaman kisisa ki'n byen e kisisa ki'n mal. E mon krwar ki o komansman nou bezwen aksepte, akoz i pa pou onnet si nou pa aksepte, nou bezwen aksepte ki in annan bokou ki'n ganny fer pandan sa dernyen 10, 20, 30, 40, 50an pou ed bokou Seselwa pou zot ganny en twa lo zot latet.

Sa i en *sine qua none*, nou pa kapab dir i pa'n arive akoz nou bezwen onnet avek nou lekor. E nou bezwen dir wi, i nannan bokou dimoun ki'n benefisye. E sa se pa akoz en Gouvernman i pli bon ki en lot. Se akoz tou Gouvernman i bezwen fer tou sa ki zot kapab pou zot demokratiz alokasyon later ki annan e fer sir ki otan dimoun ki posib i annan en pwa lo zot latet.

Pa Parti *DP* ki'n evante, pa Parti *SPUP* ki'n evante, pa Parti *SPPF* ki'n evante e sertenman pa Parti *LDS* ki'n evante. Tou Gouvernman isi Sesel, tou

Gouvernman dan tou lemond antye, i annan sa koman en son bann pilye devlopman ki absoliman neser.

Me si se en Gouvernman ki'n la pandan 40an ki ou ekspekte ki ti pou fer sa bann keksoz? Se zot ki'n pran manda akoz zot pa'n gannyen, zot in pran par fors, se zot ki'n tenir par lafors e se zot ki komans bann proze.

Alor zot pa kapab asize ozordi dir be annou felisit nou lekor pou sa ki nou'n fer, akoz en keksoz ki zot pa konnen, se si en lot Gouvernman ti'n ganny en sans, ki kantite plis ki sa lot Gouvernman ti'n kapab fer dan plas sa ki zot, zot in fer?

Akoz Mr Speaker annou pa bliye ki bann devlopman *landbank*, e la mon pe koz *landbank*, ti komans byen avan koudeta.

Santa Maria Anse La Mouche, Turtle Bay Au Cap, Reef Estate, tousala byen avan ki zot ti vin o pouwar, later ti'n koman ganny arpante, *plot* ti'n komans ganny fer e bokou, bokou Seselwa ti aste zot later pou fer zot lakaz a sa lepok. I zos ki sa avek devlopman pei natirelman in bezwen in ganny *speeded up* e se sa ki ti arive anba zot ladministrasyon.

Alor pa vin isi pou fer nou krwar, ki napa okenn dimoun

ki ti pou kapab fer sa ki zot in fer e komans koz lo Manifesto ki nou'n pran en langzman avek lepep, ki nou bezwen delivre eksetera. Set egzakteman sa ki zot, zot annan dan zot Manifesto ki nou, nou annan dan sa ki pou nou e ki sa Gouvernman ki pou swiv pou annan dan son Manifesto.

Annou pa anbet nou lekor pou dir ki i annan zis en Gouvernman dan sa pei ki'n kapab donn lakaz avek later Lepep Seselwa. Akoz si nou pe fer sa, osi nou pa pe onnet avek nou lekor e nou pa pe onnet avek sa bann dimoun ki'n met nou isi pou koz pou zot.

Me Mr Speaker si program *landbank* i en bon program, e mwan mon premye pou dir ki i en bon program. Akoz etandonnen ki nou pei i ptipti, ki resours endividyel i manke, i lobligasyon en Gouvernman pou li pran later ki annan, oubyen rod later ki i napa, pou li kapab fer alokasyon avek bann dimoun ki pe rod en bout later.

Sa set en program *obvious*. Set en program ki tou Gouvernman pou fer. E si zot, zot ti o pouwar ler sa ti ganny fer, be tan mye, zot ki'n etablir sa program, i pa vadir ki sa i pa ne bon program i en bon program, me parey tou

keksoz dab lavi pa tou keksoz ki roz. Pa akoz zot in komans en program *landbank* ki nou bezwen aksepte ki zot in fer li dan en meyer fason posib.

E se la kot mwan mon annan en problemm avek sa ki zot, zot in dir lo sa lot kote latab. E se pour sa rezon ki mon war bokou merit dan sa Mosyon Onorab Esparon apre midi.

Akoz Onorab Esparon pe dir nou annou fer en lenvanter pou gete kote keksoz in derape, si tou later ti'n ganny *allocate*, premyerman si tou later ti'n ganny pran dan en bon fason.

E si tou later ti'n ganny *allocate* dan en fason zis, e si tou dimoun ki ti'n ganny *allocate* en bout later ti'n servi li pou rezon ki i ti'n *apply* pou sa bout later, nou pa ti pou annan en deba la apre midi, akoz tou keksoz ti pou normal.

Me nou tou nou konnen dan sa Lasanble ki premye problemm avan alokasyon later se pran later avek dimoun.

Bokou sa bann later ki dan *landbank* ozordi se bann later ki'n ganny pran Mr Speaker nou bezwen aksepte malapropo par Gouvernman Mr Rene e fer pou repoz politik, pir e senp! Nou pa kapab bliye sa, si zot, zot anvi bliye *mes amis* lo

lot kote latab, nou, nou pa pou les zot oubliye.

Akoz si Onorab *Leader* Lopozisyon in dir ki nou, nou pa pou fer dan 60an sa ki zot, zot in fer dan 43an mon a dakor avek li pou en rezon. Akoz nou dan 60an en koudeta nou pa pou fer nou, en disparisyon nou pa pou fer nou! En dimoun al dan prizon malapropo nou pa pou fer nou! En *binbag* lo latet en boug pou touf li, pou zet li dan delo sale nou pa pou fer nou!

(APPLAUSE)

HON BERNARD GEORGES

Sa kantmenm nou la pou 200an nou pa pou fer, akoz sa se pa nou *legacy* Onorab Pillay atraver ou Mr Speaker sa se zot *legacy* e set en *legacy* ki zot pou bezwen viv avek. Onorab Loze mon'n les ou koze.

Mr Speaker ler ou pran en keksoz avek en dimoun avek en move lentansyon, napa naryen ki ou pou kapab fer avek ki pou fer sa keksoz vin byen. Ler ou pran later avek en dimoun pou pa pey li, ou pran sa pou en rezon politik, apre ou fer en *landbank* avek ou donn lezot dimoun, pa pou zanmen kapab zistifye sa keksoz ki ou'n fer koman byen.

Pa akoz 100 dimoun in benefisyé, akoz en move keksoz ki ou n fer ki pou fer li vin byen, alor nou bezwen o depar dir li zot dan zot laplikasyon zot program, zot ti annan en defayans depi son premye zour.

Dezyenm keksoz, e la mon anvi ki zot reflexir vremen tre, tre byen. Si bokou dimoun in benefisyé atraver *landbank* e mwan mon premye pou dir ki mon kontan malgre ki mon annan enn sa bann distrik ki mon annan mwens later posib.

E mwan mon napa en *landbank* avek 40, 120 oubyen 200 *plots* parey serten zot i annan, mwan mon *landbank* dan mon distrik si i annan 5 *plot* bokou, me *at least* i annan 5 dimoun ki'n kapab benefisyé.

Alors zot pa kapab dir ki i pa en bon keksoz wi i en bon keksoz e mon kontan ki serten dimoun in kapab benefisyé atraver later ki zot pa ti pou kapab gannnen si Gouvernman pa ti ede atraver *landbank* kot zot sibvansyon pri later, e zot sibvansyon pri devlopman sa later.

Me pour tousala annou reflexir tre byen, eski, e la konpran mon byen, mon napa naryen kont bann dimoun in ganny en bout later dan en zoli landrwa e ki'n fer en lakaz 3 letaz avek 5 ou 6 lasanm

Sorento par egzant, Carana par egzant, Ex Deltel Anse Royale par egzant. Mon napa naryen kont zot, me sa ki mon anvi ki nou reflexir lo la ozordi, se eski *landbank* ti merite *target* sa bann dimoun? Oubyen eski *landbank* pa ti devret pou ban dimoun mwen fortinen?

Pou bann dimoun ki ti pa ti pou kapab *afford* fer en lakaz 4, 5, 6 lasanm. Akoz si ou kapab fer en lakaz 4, 5, 6 lasanm, mon krwar Mr Speaker ou pa bezwen al aste en later dan *landbank*, ou kapab aste en later prive akoz ou annan le mwayen.

Eski nou pa'n al mal kot nou'n fer en serten dimoun ganny en privez e kit serten deryer - parey sa zenn arsitek dan mon distrik ki'n retournen ki'n fer en laplikasyon pou *landbank* e ki 10an pli tar i en mwen zenn arsitek e la se prezan ki i paret ki i pe kapab al ganny en morso later.

Eski i annan en derapaz la? Dan alokasyon, eski zot satisfé ki alokasyon in byen ganny fer, ki bann dimoun ki merite ki'n gannnen e ki bann ki pa merite pa'n gannnen. Demann zot lekor sa keston tanto ler zot mont kot zot, oubyen taler ler zot pe vot lo sa Mosyon.

Akoz se la mon krwar enn bann keksoz ki Onorab Esparon dan sa Mosyon pe rode, pou nou pa fer menm fot demen. Pou nou pa pran later pou fer serten dimoun byen pase e pour fer plizyer dimoun pa byen pase. Pou nou zer nou patrimwann bokou pli byen, dan en fason bokou pli zis, dan en fason bokou pli ekitab, pour ki plis dimoun ava benefisy e non pa serten ava byen pase e bokou i ava *still* pe espere.

En lot keksoz, dan later *landbank* mon konnen zot in aksepte, zot tou ki'n koze zot in aksepte ki in annan serten defayans e zot konnen in annan serten defayans. Zot konnen i annan dimoun ki'n aste later *landbank* pa'n fer naryen.

Zot konnen i annan dimoun ki'n aste later *landbank*, ki non selman pa'n fer naryen me ki vann later *landbank* en mwan ou de mwan pli tar a en pri egzorbitan. Zot konnen sa. Dan isi menm dan sa Lasanble nou pa pou repete aköz nou lo sa kote latab nou pa kontan fer sa. Isi menm dan Lasanble dan lepase nou'n koz lo la e nou'n mansyonn non.

Oubyen ki'n aste en later *landbank* pou R75mil, e ki'n revann li pou €75mil. Oubyen ki'n fer tousala e ki'n dir annou esper 7an, dan 7an ki nou ava

anrezistre dokiman, tousala se bann keksoz ki nou konnen.

E ki la sa Gouvernman in met en fren. La sa Gouvernman in anmenn en program poudir si ou pa *build* lo en later *landbank* dan X letan, later pou retourn pou Gouvernman en dimoun ki a kapab *build* i ava *build*, ou pa pou asiz lo la.

Parey bann later ki ti asiz lo la Providence bann later *Industrial Estate* e ki'n sanz lanmen pou bann pri egzorbitan e bann gro *building* ganny fer ler sa set en later bann later ki ti sipoze ed bann pti biznes pou zot devlope.

Tousala pa'n ariv anba nou manda Mr Speaker. O kontrer anba nou manda nou pe sey netway sa bann problem ki zot in kit deryer.

E se sa ki Onorab Esparon pe rode ozordi dan son Mosyon. I pe rod annou kler en tors wi, en tors 6 batri lo sa bann defayans, pou fer sir ki i pa ariv ancor, pou fer sir ki i aköz nou, nou'n al devan Lepep pou demann zot en manda 5an ki dan sa manda 5an nou kapab montre lezot sa ki nou'n fer pou repar bann problem ki zot, zot in kit avek nou.

Si in annan Mr Speaker en bon lentansyon dan en program *landbank* e si in annan bon laplikasyon dan

bokou ka, e mon pa pe dir ki tou bann ka ti bann move ka - lwen de sa, ki nou pe dir se ki in annan tro lapreferans - in annan tro faver.

Mwan mon konn serten ka mwan mon konn serten ka kot dimoun in ganny later *landbank* e ki'n vann li pli tar e san ki zot in fer naryen a en pri 10 a 20 a 30 fwa sa ki zot in peye, be sa se konmsi Gouvernman in vin kot ou in dir ou be la en tyek R3milyon met lo ou kont. Akoz se sa ki'n arive setou ki zot in fer.

Eski zot ava dir mwan sete sa lentansyon deryer en Program *landbank*? Mr Speaker en sel kou mon war tou dimoun lo lot kote latab zot in bizi lo zot *computer* ek lo zot telefonn, en sel kou zot bizi pe travay pa kapab get mwan. Demann zot lekor sa kekyon *that's all* setou ki Onorab Esparon pe demann zot ozordi.

(Interruption)

MR DEPUTY SPEAKER

Silvouple!

HON BERNARD GEORGES

I fermal en, i fermal sa roten. Onorab Pillay mon rod zot pou maltret zot, sa se mon rol dan

sa Lasanble. Mon vin rod ou pou maltret ou.

(Interruption)

MR DEPUTY SPEAKER

Order!

HON BERNARD GEORGES

Mr Speaker parey tou keksoz dan lavi, parey tou dimoun dan lavi, napa perfeksyon, perfeksyon pa egziste isi ba.

Sa ki Onorab Esparon pe demann nou ozordi, se annou rekonnèt ki dan en program ki ti annan bon lentansyon in annan problem, in annan faver in annan lapliferans in annan voler later. Mersi Onorab, mersi.

HON JOHAN LOZE

(Off-Mic)

HON BERNARD GEORGES

(Mersi Onorab Loze in annan voler later. Repet sa deor taler *ok*, repet deor dan semen taler nou a gete ki nou a fer.)

Problem Mr Speaker se ki ler zot realize ki divan in vir kont zot, zot pa kapab fer naryen, zot komans akiz dimoun, se a zot problem, se sa zot problem, ler roten i fermal lo zot, zot rod akiz dimoun, zot rod akiz Onorab Larue.

(Interruption)

MR DEPUTY SPEAKER

Zot ava les Onorab Georges fer son lentervansyon silvouple nou pa bezwen sa bann kalite entervansyon koumsa. Mersi.

HON BERNARD GEORGES

Mr Speaker mon oule *pause* la en pti kou poudir ou ki osito ki mon'n fini taler, mon pou lev en *matter of privilege* kont Onorab Loze, akoz in fer en lakizasyon apre midi la, ki nou tou nou'n tand e ki nou bezwen pran en ka avek li.

Akoz sa bann kalite keksoz nou pa kapab annan dan sa Lasanble. Son prop *Leader* taler in demann nou annan respe pou Lasanble, la li i pe akoz dimoun voler. *Ok?* Taler nou ava -

(Interruption)

MR DEPUTY SPEAKER

Order silvouple! *Order!* Onorab Vidot silvouple permet Onorab Georges fer son lentervansyon. Mersi.

HON BERNARD GEORGES

Mon retourn lo mon pwen Mr Speaker. Sa ki Onorab Esparon pe demann nou apre midi, sa ki

Onorab Esparon pe demann nou apre midi se aksepte ki dan en bon lespri, ki dan en bon lide, ki dan en bon plan in annan lapliferans, in annan serten de rapaz.

E i pe demann nou annou fer, annou demann Gouvernman fer en leverter, pou nou al *find out* egzakteman sa bann dimoun ki'n benefisye ki pa ti'n devret, egzakteman sa bann dimoun ki'n ganny lapliferans pour ki non selman ki zot, zot ava ganny anmenn devan, pou nou konnen egzakteman lekel sa bann dimoun, me osi pour ki nou pa repet fot ki sa Gouvernman ki ti la pandan 43 an in fer.

Se sa ki i pe demann nou apre midi e se pour sa rezon Mr Speaker ki mon pe demann avek nou Lasanble ozordi apre midi, pou siport Onorab Esparon dan sa demann ki i pe fer. Mon remersye ou.

(APPLAUSE)

MR DEPUTY SPEAKER

Mersi Onorab. E mon a donn laparol loter Mosyon Onorab Esparon pou son *summing-up*.

HON REGINA ESPARON

Mersi Mr Speaker. Dabor mon oule remersye Onorab Larue pou segonn sa Mosyon.

Mr Speaker en lozman pou abrite i priyorite e swe tou dimoun ki pe anvizaze form en fanmir. E aste en propriyete pou konstrir i rev tou zenn ki'n fini tou son letid pou viv dan konfor e dan sekirite e epanouir pou lefitir.

E en manman ki annan son zanfan i son dezir pou war son zanfan ganny en twa par lao son latet, ki demen i kapab apel '*chez moi comme*' dir Onorab Arissol.

Mersi Onorab Bastienne pou fer sorti problem ki egziste dan distribisyon later Perseverance, kot ou'n santi ki in napa lazistis dan lafason ki keksoz in ganny fer - sirtou later endistriyel e pe demann Gouvernman pou repran kontrol. E gete kwa ki pe vremen arive danm sa bann distribisyon. Zisteman Mr Speaker egzakteman parey Mosyon pe demande.

E Onorab Loze in dir ki nou pe al kler sa tors pou gete kote ki keksoz in al mal. Se rezilta sa levanter ki pou dir nou Mr Speaker, e in fer resorti ki *landbank* ti komans an 1993 e ki ti pou bon fer sa levanter depi 1993. Nou apresye sa sizesyon Mr Speaker, me

selman nou met li 10an ki pou tonm 2012.

Me selman se pa, sa pa pou anpese ki Gouvernman i al pli lwen ki s Onorab Loze. Parey mon dir e wi si resours imen e finansyel i kapab *go back* depi 1993 ou '71 parey ou ti pe dir Gouvernman a fer li. E Onorab Georges in fer nou konpran ki devlopman *landbank* ti komans byen lontan menm avan koudeta.

Me lesansyel se war vremen kwa ki pase. E kot i mal, e in annan lenzistis, sa osi a ganny rektifye. Mr Speaker atraver ou, mon oule enform Onorab Loze ki mon pa per *challenge* Onorab, akoz mon'n konsilte avek *DG* e *PS* e osi *Technical Advisor* kot Departman Later pou ganny detay e statistik, avan nou'n anmenn sa Mosyon. *Rest assured* Onorab ki mon napa okenn krentif.

Mr Speaker Onorab Pillay in fer resorti ki wi i annan serten move administrasyon ki'n arive e ki i annan dimoun ki konnen kantite lenformasyon lo later Gouvernman. E mon pou dir Departman Later, servi sa bann dimoun pou ede met en lord kot i annan sa dezord.

I in fer resorti ki menm sa ki annan later ozordi, napa sa *building* kapasite e pe trimouse

pou kapab met en twa lo zot latet. E Mr Speaker mon kapab azoute ki sityasyon lemonn osi pou kapab agrav sa sityasyon.

E pwen esansyel sa Mosyon, se pou demann Gouvernman pou *take stock* e regarde ki kantite later ki i annan dan sa *stock*, e balans sa vizavi demann pou later ki pe kontinyen ogmante. En pwen ki i bezwen ganny reflexir lo la parey Onorab Pillay in dir nou.

Me pe enport Mr Speaker lesansyel in ganny dir e mon oule met sa Mosyon devan Lasanble pou laprouvasyon ki ganny lir koumsa;

Lasanble i demann Gouvernman pou fer leverter lo tou later *landbank* e later Gouvernman pandan sa dernyen 10an, pou donn en apersi lo kwa ki'n vremen arive lo sa bann tranzaksyon.

Mon remerci tou manm ki'n entervenir lo sa Mosyon e demann tou Manm pou siport sa Mosyon. Mersi Mr Speaker.

MR DEPUTY SPEAKER

Mersi Onorab Esparon. Donk moman in arive pou nou pran en vot lo Mosyon ki devan Lasanble Nasyonal ki dir;

Lasanble i demann Gouvernman pou fer leverter lo tou later *landbank* e later Gouvernman pandan sa

dernyen 10an, pou donn en apersi lo kwa ki'n vremen arive lo sa bann tranzaksyon.

Tou bann Manm i an faver mon demande pou endike silvouple? Mersi. Okenn manm ki kont? Mersi.

Donk rezilta vot pou sa Mosyon, i annan 21 manm ki'n vot an faver, okenn manm pa'n vot kont, me i annan 7 manm ki'n abstenir. Mosyon Onorab Esparon in ganny aprouve. Mon vwar lanmen Onorab Georges anler *Leader Government Business*.

HON BERNARD GEORGES

Mersi Mr Speaker. Parey mon ti'n promet taler Mr Speaker mon pe *raise en point of order* anba *Order 59(4) sorry 59(5)* eskiz mwan kont Onorab Loze ki'n akiz mwan konmkwa mon en voler later e sa i al kont *Order 59(5)* ki dir ki "*the conduct of inter alia members will not be referred to except on a motion moved for that purpose.*"

Alors sa ki mon pe demann li se anmenn son Mosyon. mon pa pe demann li *retract* me mon pe demann li anmenn son Mosyon devan Lasanble pou nou argye son Mosyon. Prezan i ava fer sorti son pwen. Mersi.

MR DEPUTY SPEAKER

Mersi Onorab pou sa lentervansyon. So mon panse krwar wi ki *Order 59(5)* i demann zot ava rapel zot *Standing Orders* ki ler Speaker pe koze silvouple i demande ki bann Manm i gard silans.

Mersi bokou. *Order 59(5)* i dir ki si en Manm i oule lev en size ki kestyonn konportman en seri dimoun dan sa ka, *Leader Government Business* zot bezwen fer li alor atraver en Mosyon. I pa pe demann okenn leskiz or pou *retraction* me i pe *challenge* manm ki'n fer referans avek li pou anmenn en Mosyon. Onorab Aglae mon war ou lanmen anler.

HON EGBERT AGLAE

Mr Speaker mon osi mon oule *raise en point of order* akoz 59(5).

MR DEPUTY SPEAKER

Yes.

HON EGBERT AGLAE

Parey Onorab Georges atraver ou in fer referans avek Onorab Loze lo nou kote komanter, ki in fer *off-mic* Onorab Larue osi in fer menm komanter ler Mosyon in *wrap-up* e zot in dir '*nou bann voler later!*' E si Onorab Larue ...

MR DEPUTY SPEAKER

Silvouple permet mwan ekout Onorab Aglae.

HON EGBERT AGLAE

Wi sa i mon pwen Mr Speaker. E mon ti a kontan petet Onorab Larue i *substantiate* sa ki i pe dir si i annan voler later isi lo sa kote latab. Mersi.

MR DEPUTY SPEAKER

Nou konnen poudir sa size i en size kontansye, mon ti ava zis demann bann Manm pou nou *relax* en pti pe nou'n ariv lafen lazournen. Onorab Larue i akoz ou non in ganny mansyonnen ki ou pe lev ou lanmen?

HON FLORY LARUE

Mr Speaker Oditer Zeneral in dir ki *US* in vol later e mwan koman en Manm mon met en case kot Parti *US* ki zot in vole later kot *Anti-Corruption Commission*. Alors esper zot case ava zot sot anler poudir zot pa'n vol later, zot tou la zot Manm *US*, Lepep zot! Mersi Mr Speaker.

(Interruption)

MR DEPUTY SPEAKER

Mersi. Nou'n byen komanse depi bomaten nou *The National Assembly* pa pe kapab *degenerate into disorder this*

afternoon. Onorab Loze ki ou pwen?

HON JOHAN LOZE

Mersi Mr Speaker. Mr Speaker avek tou respe pou *Leader Biznes Gouvernman* Onorab Georges, mon oule reasir li ki mon pa pou anmenn okenn Mosyon kont li, mon krwar bann *case* ki'n pas devan lakour depi 1998 i konn sa pli byen ki mwan li. I konnen ki'n arive dan son listwar personel lepase.

So si sa ki mon'n dir in ofans li, *I take it back*, be li i konnen ki'n arive pli byen ki mwan, pli byen ki ou menm Mr Speaker. Apre mon annan en *feeling* Onorab Larue pa ti pe koz pou nou li, i ti pe akiz Onorab Georges la aprezan i pa konnen ki i pou dir.

MR DEPUTY SPEAKER

Non. Onorab la ou *out of order* parske ou'n byen fer pou *withdraw the statement* ki ou'n fer, me la aprezan ou pe *impute* ankor *improper motives* ki ou pe al kont *Order 59(7)(d) and this is not right*.

Onorab *Leader* Lopoziyon ou lanmen i anler silvouple *put your team in order*. Pou zot *behave* dan Lasanble Nasyonal. Silvouple.

HON SEBASTIEN PILLAY

Mersi Mr Speaker. Mr Speaker anefe mon pe al ed ou e mon poudir Lasanble an antye annou konport nou. *Ok?* Nou fer,

(Interruption)

HON SEBASTIEN PILLAY

Mr Speaker zis ekout mwan zis ekout mwan en pti kou - ekout mwan en pti kou - ekout mwan en pti kou. *Ok?*

Onorab Georges koman en Manm ki annan plizyer lannen leksperyans ou konnen tre byen poudir keksoz i ganny dir *off-mic*, keksoz in ganny dir *off-mic* lo mwan osi, nou tou lede keksoz i ganny dir *off-mic* lo nou. Akoz sa i natir nou pozisyon, annou pa pran li personel. Mon dakor ek sa ki Speaker in dir nou'n byen komanse.

Nou'n fini sa Mosyon nou'n pran en vot, Mr Speaker *the house in* fini vote. Mon ava demann ou pou gid the house pou nou prepare ki travay ki nou annan demen. Mon oule zis *remind* bann manm FPAC mon'n donn zot en travay pou fer *regarding* rapor FA4JR, silvouple *go through the report* pou nou prepar nou pou nou *public hearing* Vandredi.

Mersi Mr Speaker. *Over to you* e ki nou kapab termin Lasanble byen. Mersi Mr Speaker.

MR DEPUTY SPEAKER

Mersi Mr Speaker. Ou annan en *point of order*?

HON BERNARD GEORGES

Absolutely Mr Speaker mon pa pe large mwan, si zot, zot anvè large sa zot problem. Mwan mon pa *concede*. Mon pa pe *concede* mon pa pe aksepte avèk tou respe ki mon annan Mr Speaker pou okenn zot lot kote, mon pa pe aksepte *on-mic* or *off-mic* sa bann ...

(Interruption)
(Off-Mic)

HON BERNARD GEORGES

... ou war, ou war Mr Speaker ou war prezan akòz ki mon pa kapab aksepte?

Leader Lopoziyon pa kapab gard son tim *in check*.

(Interruption)
(Off-Mic)

HON BERNARD GEORGES

Nou bezwen aksepte Mr Speaker mon pa ankò fini koze e mon pa pe *concede*. Mon pa pe aksepte sa bann kalite *I need*

to weigh my words carefully, mon pa pe aksepte sa bann lakizasyon Onorab Loze. I pa kapab fer en lakizasyon apre dan en sanblan ki i pe tir en lakizasyon i fer enn pli move ankòr.

I mean this is just not right. E mon pa pe demann li *apologies*, mon pa anvè *apology* Onorab Loze mwan. Mon pa enterese avèk son *apology* akòz son *apology* pa kont pou naryen dan sa Lasanble akòz nou'n fatige avèk son bann kalite demagozi pandan en bann letan. Sa ki mon pe fer mon pe dir li si i pa pe anmèn en Mosyon *I'm going to bring a matter of privilege - this thing must stop!* Mersi.

(APPLAUSE)

MR DEPUTY SPEAKER

Mersi Onorab. Mon doute si ou annan en *matter of privilege* parski i ti pe *refer to your member, you cannot claim a matter of privilege as Leader of The Opposition* konmkwa ou tim, lo ou *conduct* ki ou pa kapab kit *your team in check* *which I asked you just few seconds ago* pou ou fer. *Proceed* silvouple.

HON SEBASTIEN PILLAY

Mersi Mr Speaker. Ou a realize poudir mon ti'n fer sa, e ki *the matter was closed* e ki Onorab Georges in reouver li dan en fason *vindictive*. So prezan si i oule vin *vindictive* mon *challenge* li.

Onorab Loze in fer sa komanter *off-mic*, i pa'n *directly at* ou, i pa'n nonm ou non, i pa'n nonm ou non li. Ou'n *raise en point of order* san ki Onorab Loze in fer referans avek ou direkteman i pa'n nonm ou non li, i pa'n nonm ou non li, i pa'n nonm ou non!

(Interruption)

HON SEBASTIEN PILLAY

E Mr Speaker mon apresye sa ki Speaker in fer ozordi apre midi Speaker in *very fair*, in les ou fer ou *point of order*, ou'n *go beyond* ou *point of order* akoz ou koman *Leader* lot kote ou devret gid ou *Caucus* e pa fer dezord dan Lasanble.

E ou pe ganny repons *overall*, so bann manm *US* pou fer zot travay anba Konstitisyon i Lopozisyon i ganny demande pou fer, e sa Lasanble ki la pa pou parey sizyenm Lasanble, kot zot pou mars lo mou manner zot anvi. So *you can forget that* ozordi.

(APPLAUSE)

HON SEBASTIEN PILLAY

Forget sa ozordi e si ou pou anmenn ou *matter of privilege* nou a get ki i kapab fer. Akoz *matter of privilege* dan sa Lasanble ler ou, ou anmennen akoz ou apel Mr Georges i a pas par devan tou dimoun.

MR DEPUTY SPEAKER

Onorab, la.

HON SEBASTIEN PILLAY

Ok, mon *retract*, mon *retract*.

MR DEPUTY SPEAKER

Wi akoz *the tone that you are addressing*, you should address *the Chair* akoz la ou pe koz *directly across the aisle* avek ou koleg e ou pe pran en ton en pe -

HON SEBASTIEN PILLAY

Ok, mon *retract*, mon *retract*.

Atraver ou Mr Speaker mon oule met lo rikord.

Mwan, mon'n anmenn *matter of privilege* dan sa Lasanble e mon *matter of privilege* pa ganny lir. I ganny enterprete *from the Chair*, mon'n aksepte ou konnen, akoz

mon konnen poudir mon dan en Lasanble mon en minorite e mon pou sibir sa bann kalite aksyon.

E mwan non bi se travay atraver sa ki konstitisyon i donn mwan pou anmenn respe pi sa Lasanble e anmenn respe pou Lopozisyon.

E mon krwar nou pe akonplir sa nou. So Onorab Georges i napa okenn leson pou pran ek li nou, napa okenn leson pou pran ek li e son bann lakizasyon ki i pe fer mon krwar Onorab Georges i annan ase leksperyans pou li konpran ki ozordi mon pa konnen - si akoz son mikro pa'n marse yer, me ozordi son reaksyon pa byen ditou.

(Interruption)

MR DEPUTY SPEAKER

Ok Onorab!

HON SEBASTIEN PILLAY

Oik mon *retract*, mon a *retract*, mon a *retract*.

MR DEPUTY SPEAKER

Ok that's enough, akoz aprezan, annou pa fer sa deba *about* nou personnelman, ouswa *about* parti politik. I annan tou son drwa pou fer sa ki in dir, fer koman *Leader of Government Business*.

E mon krwar nou'n ase annan en *heated debate* pou ozordi. Demen nou rebran avek Mosyon Onorab Waven William bomaten, e alor mon ava swet zot bon rantre dan lakour. Mersi pou zot partisipasyon ozordi apre midi. Bonswar.

(ADJOURNMENT)